

# ରୋମିୟ ମଣ୍ଡଳୀର ବିଶ୍ୱାସୀ ମାନଙ୍କ ନିକଟକୁ ପାଉଲଙ୍କର ପତ୍ର

## ରମିଅ ମଣ୍ଡଳିର ଲକ୍ଷ୍ମଣରୁଟାନେ ପାଉଲ୍ ଚିଠି ଲେଖିଲାଟା ଏ ବଇଟାନେ ଜାନ୍‌ବାଟା

ରମିଅ ବଇ ପେରିତ୍ ପାଉଲ୍‌ର ଲାଗି ଲେକାଅଇରଇଲା । ଏ ବଇ ଜିସୁକିରିସ୍‌ଟ ଜନମଅଇକରି ୫୪ ଅନି ୫୮ ବିତ୍‌ରେ ଅଇରଇଲା ।

ପାଉଲ୍ ରମ୍ ରାଇଜେ ଜିବା ଆଗତୁ ଜିଉଦି ବିସ୍‌ବାସି ଆରି ଜିଉଦି ନ ଅଇରଇବା ବିସ୍‌ବାସିମନ୍‌କେ ତିଆରବାକେ ଏ ଚିଠି ଲେକିରଇଲା । ଜେନ୍ତାରିକି ସବୁ ଲକ୍ଷ୍ମଣ୍ ବିସ୍‌ବାସ୍ କରି ନାମ୍‌ବାଇ ୧୪:୧୭ । ଏଟାର୍‌ପାଇ ସେ କରନ୍‌ତି ନଅରେ ରଇବା ବେଲାଇ ରମିଅ ବିସ୍‌ବାସିମନ୍‌କେ ତିଆରବାକେ ଏ ଚିଠି ରଇଲା ।

ରମିଅ ବଇ ସବୁ ଜାଗାର୍ ଆରି ସବୁ ବେଲାର୍ ବିସ୍‌ବାସିମନ୍‌ରପାଇ, ଏଟା ଗଟେକ୍ ଗୁରୁତୁ ସଙ୍ଗର୍ ବଇ । କାଇକେବଇଲେ, ପାଉଲ୍ ଏ ବଇଟାନେ ଜିସୁକେ ବିସ୍‌ବାସ୍ କଲେ ଆମ୍‌କେ କେନ୍‌ତି ମୁକ୍ତି ମିଲ୍‌ସି, ସେଟା ନିକସଙ୍ଗ୍ ଗଟେକ୍ ଗଟେକ୍ କରି ବୁଜାଇଦେଲାଆଟେ । ପାଉଲ୍ ପୁରନା ନିଅମ୍‌କେ ମିସା ଜିସୁକିରିସ୍‌ଟର୍ ସୁବ୍ କବରୁଟାନେ ମିସାଇଆଟେ । ଏ ବଇଡେଇ ୧:୧୭ ଟାନେ ରଇବା ବାକିଅକେ ନେଇକରି କେଡେକ୍ କେଡେକ୍ ପଣ୍ଡିତମନ୍ ଦାବିକରି ଏଟା ଏ ସବୁବଇର୍ ମୁଲ୍ ବଲି କଇଲାଇନି । ଜନ୍‌ଟା ଇତି ଜାନାଇଲାଇନି କି, ମୁଇ ବାକିଅ ଜାନାଇବାକେ ଲାଜ୍ ନ ଅଇ । କାଇକେବଇଲେ ଜେଡକି ଲକ୍ ବିସ୍‌ବାସ୍ କରବାଇ, ସେ ସବୁ ଲକ୍‌ପାଇ ଏଟା ପରମେସରର୍ ବସୁ । ପରୁତୁମେ ଜିଉଦିମନ୍‌ରପାଇ ଆରି ଜିଉଦି ନ ଅଇଲା ଲକ୍‌ମନ୍‌ରପାଇ ମିସା ।

ପରୁତୁମ୍ ବାଗେ ୧-୧୨ ଚିକିନିକିର୍ ବିସଇ ଆରି ଦୁଇରେ ଅଇଲାନି ବିସ୍‌ବାସି ଇସାବେ କେନ୍‌ତି ଚଲାଚଲ୍‌ତି କରବାର୍ ଆଟେ, ସେଟା ତିଆରଲାନି ।

**ଏ ବଇବିତ୍ତରେ ରଇବାଟା**

- ୧. ପାଉଲ୍ ନିଜ୍ଜକେ ଜାନାଇଅଇକରି କାର୍ଟାଗେନେ ଚିଟି ଲେକ୍ଲାନି, ସେଟା କଇକରି ଆରାମ୍ କଲାନି । ୧:୧-୧୫
- ୨. ମୁନୁସ୍ତଜାତିର ରାଇଜ୍ ଆରି ଜିସୁକିରିସ୍ଟର୍ ଲାଗି ମୁକ୍ତି ଅଇବାଟା । ୧:୧୬;୧୧:୩୭
- ୩. କିରିସ୍ଟର୍ ଟାଗେନେ ରଇକରି ଜିଉନାକାଉନା କର୍ବା ବିସଇରେ ପାଉଲ୍ ତିଆରଲାଟା । ୧୨:୧-୧୫:୧୩
- ୪. ସେ ରମିୟ ମାଣ୍ଟୁଲିର୍ ଲକ୍ମନ୍‌କେ ଦନିଅବାଦ୍ ଦେଇକରି ଲେକା ସାରାଇଲାଟା । ୧୬

**ପାଉଲ୍ ଜୁଆର୍ ଜାନାଇବାଟା**

<sup>୧</sup> ମୁଇ ପାଉଲ୍ ଏଟା ଲେକ୍ଲାନି, ମୁଇ କିରିସ୍ଟ ଜିସୁର୍ ଗଟେକ୍ ସେବାକାରିଆ । ପର୍ମେସର୍ ମକେ ବାଟଲା ଆରି ତାର୍ ନିମାନ୍ କବର୍ ଜାନାଇବାକେ ସର୍ପିଦେଲା । ରମ୍ ରାଇଜେ ରଇବା ତମର୍ ସବୁଲକର୍ପାଇ ମୁଇ ଏ ଚିଟି ପାଟାଇଲିନି ।

<sup>୨</sup> ପର୍ମେସର୍ ଏ ବିସଇ ଆଗେଅନି କାତା ଦେଇରଇଲା, ଆରି ସୁକଲ୍ ସାସ୍ତରେ ସେ ସବୁ ଲେକ୍ବା ପାଇ ତାର୍ ବବିସତ୍ତବକ୍ତାମନ୍‌କେ ତିଆରଲା । <sup>୩</sup> ଏ ସୁବ୍‌କବର୍ତେଇ ପର୍ମେସରର୍ ପଅ, ଆରି ଆମର୍ ମାପୁରୁ ଜିସୁକିରିସ୍ଟର୍ ବିସଇ ଆଟେ । ସେ ଏ ମର୍ପୁରେ ନର୍ ରୁପ୍‌ଦାରି ଦାଉଦର୍ ନାତିତିତି ଅଇ ଜାଡ୍ ଅଇଲା । <sup>୪</sup> ମାତର୍ ସେ ପୁରାପୁରୁନ୍ ସୁକଲ୍ ରଇଲା, ଆରି ପର୍ମେସରର୍ ବଡ୍ ବପୁସଙ୍ ତାକେ ମଲାଟାଗେଅନି ଉଟାଇଲା । ମଲାଟାଗେଅନି ଉଟ୍‌ଲାର୍ପାଇ ସେ ପର୍ମେସରର୍ ପଅ ବଲି ଦେକାଇଲା । <sup>୫</sup> ପର୍ମେସର କିରିସ୍ଟର୍ ତେଇଅନି ମକେ ଗଟେକ୍ ପେରିଡ୍ କଲାଆଟେ, ଜେନ୍ତାରି କି ସବୁ ଜଗତର୍ ଲକ୍ମନ୍‌କେ ତାର୍ ବିସଇ ଜାନାଇବି । ସେମନ୍ ସେଟା ବିସବାସ୍ କରି ମାନ୍‌ବାଇ । <sup>୬</sup> ଏ ରମ୍ ଦେସର୍ ଲକ୍ ! ତମେମିସା ଜିସୁକିରିସ୍ଟର୍ ସିସ୍ ଅଇବାକେ ବାଟାଇ ଅଇଆଟାସ୍ ।

<sup>୭</sup> ରମେ ରଇବା ସବୁ ଲକ୍‌କେ ଏ ଚିଟି ଲେକ୍ଲାନି । କାଇକେବଇଲେ ତମ୍‌କେ ପର୍ମେସର୍ ଆଲାଦ୍ କଲାନି । ଆରି ତାର୍ ନିଜର୍ ଲକ୍ ଅଇବାକେ ଡାକି ଆଟେ ।

ଆମର ବାବା ପରମେସର ଆରି ମାପୁରୁ ଜିସୁକିରିସ୍ତ ତମ୍ଭେକେ ଜିବନ୍ ଦୁକାଇ ସାନ୍ତି ଦେଅ ।

### ଦନିଅବାଦର ପାରତନା

୮ ମୁଇ ତମ୍ଭେକେ ପର୍ତମେ ଏ ବିସଇ କଇବାକେ ମନ୍ କରି ରଇଲିଜେ, ତମର ସବୁଲକରପାଇ ମୁଇ ମାପୁରୁ ଜିସୁର ନାଉଁ ଦାରି ପରମେସରକେ ଦନିଅବାଦ ଦେଲିନି । କାଇକେବଇଲେ ଗୁଲାଇ ଜଗତର ଲକ୍, ତମେ ବିସ୍ବାସ୍ କରିରଇବା ବିସଇ ସୁନ୍ଲାଇନି । ୯ ମୁଇ ମର ସବୁ ମନ୍ପରାନ୍ ଦେଇ ଜନ୍ ପରମେସରକେ ସେବା କଲିନି, ଆରି ଜନ୍ ପରମେସରର ପଅର୍ ସୁବ୍ କବର ଜାନାଇଲିନି, ସେ ପରମେସର ମର ସାକି । ୧୦ ମୁଇ ପାରତନା କଲାବେଲେ ତମ୍ଭେକେ ସବୁବେଲେ ଏତାଇଲିନି । ସେ ମନ୍ କଲେ, ମକେ ତମର ଲଗେ ଜିବାକେ ବେଲା ଟିକ୍ କରି ଦେଅ ବଲି ପରମେସରକେ ଗୁଆରି କଲିନି । ୧୧ ତମର ଲଗେ ଆଇବାକେ ମୁଇ ବେସି ମନ୍ କଲିନି । ମର ପାଇରଇଲା ଆଡ଼ମାର୍ ଦାନ୍ ବିସଇ ଜାନାଇବାଟାନେଅନି ତମର ବିସ୍ବାସ୍ ଡାଟ୍ କରାଇବି । ୧୨ ଏଟାର ଲାଗି ତମର ବିସ୍ବାସେଅନି ମର ବିସ୍ବାସ୍ ଡାଟ୍ ଅଇସି ଆରି ମର ବିସ୍ବାସେଅନି ତମର ବିସ୍ବାସ୍ ଡାଟ୍ ଅଇସି ।

୧୩ ✨ବାଇବଇନିମନ୍, ତମର ଟାନେ ଆଇବାକେ ମୁଇ ବେସି ତର ମନ୍ କରିରଇଲି, ମାତର ଦାରାବାନ୍ଦାଅଇ ଜାଇରଇଲି ଜେ ଆଜିକେ ଜାକ ଆସି ନାପାରଲିନି । ବିନ୍ ବିନ୍ ଜାଗାର ଜିଉଦି ନଇଲା ଲକ୍ମନର ବିତ୍ରେ ସୁବ୍ କବର ଜାନାଇକରି ମକେ ଜେଡ଼କି ସାର୍ଦା ମିଲ୍ଲା ଆଟେ, ତମର ଜାଗାଇ ମିସା ସେଟା କରବାକେ ମୁଇ ମନ୍ କଲିନି । ୧୪ କାଇକେବଇଲେ, ଗିରିକ୍ ଲକ୍ମନର ପାରା ଗିଆନ୍ ରଇଲେ ମିସା, ମୁରକ ଲକ୍ ଅଇରଇଲେ ମିସା, ସିକିରଇବା ଲକ୍ ଅଇରଇଲେ ମିସା, କି ନ ସିକିରଇବା ଲକ୍ ଅଇରଇଲେ ମିସା, ଏ ସବୁ ଦଲ୍ଲର ଲକ୍ମନର ପାଇ ମର ଦାଇଡ଼ ଆଟେ । ୧୫ ସେଟାର ପାଇ ରମ୍ ଗତର ଲକ୍, ତମର ଲଗେ ମିସା ନିମାନ୍ କବର ଜାନାଇବାକେ ମୁଇ ମନ୍ କଲିନି ।

### ସୁବ୍ କବରର ବପୁ

୧୭ ✨ସେ ସୁବ୍ କବରଟାନେ ମର୍ ପୁରାପୁରୁନ୍ ଆସାଆତେ, ସେଟା ସିଗ୍ ପର୍ତ୍ତମେ ଜିଉଦି ଲକ୍ମନର୍ ପାଇ ଆରି ତାର୍ ପତେ ବିସ୍ବାସ୍ କରବା ଜିଉଦି ନଇଲା ଲକ୍ମନର୍ ପାଇ ପରମେସରର୍ ବଡ଼ ବପୁ । ୧୭ ଲକ୍ମନ୍ ପରମେସରର୍ ଲଗେ କେନ୍ତ୍ରି ଦରମ୍ ଲକ୍ ବଲାଇ ଅଇ ପାର୍ବାଇ, ତାର୍ ଉପାଇ ତେଇ ଦେକାଇ ଦିଆଅଇଲା ଆତେ । ଆରାମେ ଅନି ସାରାସାରିଜାକ ମୁକ୍ତି ପାଇବା ଗଟେକ୍ ମାତର୍ ଉପାଇ ଅଇଲାନି, ବିସ୍ବାସ୍ । ସାସ୍ତରର୍ ବାକିଅ ଇସାବେ “ଜେ ବିସ୍ବାସ୍ କରି ପରମେସରର୍ ମୁଆଟେ ଦରମ୍ ବଲାଇ ଅଇସି, ସେ ବଞ୍ଚିସି ।”

### ପାପ୍‌କେ ପରମେସରର୍ ରିସା

୧୮ ଜନ୍ ପାପି ଲକ୍ମନ୍ ନିଜର୍ କାରାପ୍ କାମେଅନି ସଡ଼ ବିସଇ ଅଟ୍‌କାଇବାଇ, ସେମନ୍ ବିରଦେ ସର୍ଗେଅନି ପରମେସରର୍ ରିସା ଦେକାଇ ଅଇସି । ୧୯ କାଇକେବଇଲେ ପରମେସରର୍ ବିସଇନେଇ ଜାଇଟା ଜାନବାର୍ ରଇଲା ସେମନ୍ ସେଟା ଜାନଲାଇ ଆତଡ଼ । ପରମେସର୍ ନିଜେ ସେଟା ଦେକାଇ ଦେଲାଆତେ । ୨୦ ପରମେସର୍ ଜଗଡ଼ ତିଆର୍ କଲାତେଇଅନି, ତାର୍ ନ ଦେକାଇଅଇବା ଗୁନ୍ ଅଇଲାନି, ତାର୍ କାବାଅଇଜିବା କାମ୍ ଆରି ନ ସାର୍ବା ବପୁ । ସେ ତିଆର୍ କଲା ବିସଇତେଇ ସେଟା ଦେକିଅଇଲାନି । ସେଟାର୍ ପାଇ ସେମନ୍ ନାଜାନୁବଲି କଇନାପାରଡ଼ । ୨୧ ✨ସେମନ୍ ପରମେସର୍‌କେ ଜାନିକରି ମିସା ନିକ ନାମଡ଼ ନାଇ କି ତାକେ କାଇ ବିସଇ ନେଇକରି ମିସା ଦନିଅବାଡ଼ ଦେଅଡ଼ ନାଇ । ସେମନ୍ ଚିନ୍ତା କରବାଟା ସବୁ କାରାପ୍ ଆରି ତାକର୍ ତୁଟାଇ ରଇବା ମନ୍, ଆନ୍ଦାରେ ଆତେ । ୨୨ ସେମନ୍ ନିଜ୍‌କେ ଗିଆନି ବଲି ବାବ୍‌ଲାଇନି, ମାତର୍ ସତଇସେ ସେମନ୍ ବକୁଆ । ୨୩ ସଡ଼ ପରମେସର୍‌କେ ନ ନାମିକରି ନସିଜିବା ମୁନ୍ସ୍, ପସ୍, ଚଡ଼ଇ, ସାଁପାରା ପୁଡ଼ଲା ତିଆର୍ କରି ସେଟାମନ୍‌କେ ପୁଜା କଲାଇନି ।

୨୪ ସେଟାର୍ ପାଇ ପରମେସର୍ ସେମନ୍‌କେ ଚାଡ଼ିଦେଲାଆତେ, ଆରି ସେମନ୍ ନିଜର୍ ନିଜର୍ ମନ୍ କଲା କାରାପ୍ କାମେ ବୁଡ଼ି ରଇଲାଇନି । ସେମନ୍ ତାକର୍ ତାକର୍ ବିତ୍‌ରେ ଲାଜ୍‌ଅଇଜିବା

ମିସାବିତା କର୍ବାଟା ସଙ୍ଗେଆତଡ଼ । ୨୫ ସେମନ୍ ପରମେସରର ବିସଇଟାନେ ରଇବା ସଡ଼ ବାଦୁଲେ ମିର୍ ଦାରିକରି ଆତଡ଼ । ସବୁବେଳେ ଡାକ୍‌ପୁଟା ପାଇବା ପରମେସରକେ ପାର୍ତନା ନ କରି, ତିଆର୍ କଲା ଦିନ୍‌ସୁମନ୍‌କେ ପାର୍ତନା କଲାଇନି । ସେ କାଲ୍ କାଲ୍ ଜୁଗ୍ ଜୁଗ୍ ଡାକ୍‌ପୁଟା ପାଅ ! ଆମେନ୍ ।

୨୬ ସେମନ୍ ଲାଜ୍‌ଅଇଜିବା ପାପକାମେ ବୁଡ଼ି ରଇଲାର୍ ପାଇ ପରମେସର ସେମନ୍‌କେ ଚାଡ଼ି ଦେଲାଆତେ । ତାକର୍ ମାଇଜିମନ୍ ନିଜର୍ ମୁନୁସମନ୍‌ର ସଙ୍ଗ୍ ସୁଆବସା ନ ଅଇ, କାରାପ୍ ଇସାବେ ବିନ୍ ମୁନୁସମନ୍‌ର ସଙ୍ଗ୍ ସୁଆବସା କଲାଇନି । ୨୭ ସେନ୍ତାରିସେ ମୁନୁସମନ୍ ମିସା ଆଲାଦେ ମାଇଜି ସଙ୍ଗ୍ ସୁଆବସା ନ କରି ନିଜର୍ ନିଜର୍ ବିଡ଼ରେ କାରାପ୍ ଅଇ ମିସାବିତା ଅଇବା ଚିନ୍ତାଇ ଜଲି ଗାଲାଇନି । ମୁନୁସମନ୍ ତାକର୍ ତାକର୍ ବିଡ଼ରେ ଲାଜ୍ ଅଇବା ଚଲାଚଲ୍‌ତି କଲାଇନି ଆରି ସେଟାର୍ ପାଇ ଡ଼ଣ୍ଡୁ ପାଇବାକେ ତିଆର୍ ଅଇଲାଇନି ।

୨୮ ଏ ଲକ୍‌ମନ୍ ପରମେସରର ବିସଇନେଇ ନିମାନ୍ ବାବ୍‌ବାକେ ମନ୍ ନ କଲାର୍ ପାଇ, ପରମେସର ସେମନ୍‌କେ ଚାଡ଼ି ଦେଲାଆତେ । ଆରି ମନ୍ ବିଡ଼ରେ କାରାପ୍ ଚିନ୍ତା କର୍ବାଟା କରଡ଼ ବଲି ଚାଡ଼ିଦେଲାଆତେ । ଏଟାର୍‌ପାଇ ସେମନ୍ ନ କର୍ବା କାମ୍ କର୍ବାଇ । ୨୯ ତାକର୍ ବିଡ଼ରେ ସବୁରକାମର୍ କାରାପ୍ ବିସଇ, ଜନଟାମନ୍‌କି, କାରାପ୍ ଚିନ୍ତା କର୍ବାଟା, ବାନିଆ ଚିନ୍ତା କର୍ବାଟା, ଲବାଇବାଟା, ଲାଁର୍ ନେବାଟା, ତାକର୍ ତାକର୍ ବିଡ଼ରେ ଈସାତଲା ଅଇବାଟା, ନର୍ ମରାଇବାଟା, କିରମାର ଅଇବାଟା, ନାଡ଼ାଇବାଟା, ଆଁକାର୍ କର୍ବାଟା ଆରି କୁଟ୍‌କାତା ଅଇବାଟା ବର୍ଡ଼ି ଅଇଆତେ । ୩୦ ସେମନ୍ କାନେ ପୁସୁର୍ ପାସାର୍ ଅଇବାଟା, ବିନ୍ ଲକ୍‌କେ ନିନ୍ଦା କର୍ବାଟା, ପରମେସରକେ ଗିନ୍ କର୍ବାଟା, ବଡ଼ପନ୍ ଅଇବାଟା, ବଡ଼ପନ୍‌ଆ କାତା ଅଇବାଟା, ବିନ୍‌ଲକ୍‌କେ ପାନ୍ଦେ ଅଦରାଇବାଟା, ଆରି ଆୟା ବାବାର୍ କାତା ନ ମାନ୍‌ବାଟା, ୩୧ ଦରମ୍ ବିବେକ୍ ନ ଅଇବାଟା, କାତା ଦେଲା ପତେ ସେଟା ବାଙ୍ଗାଇବାଟା, ତାକର୍ ବିଡ଼ରେ ଆଲାଦ୍ ନ କର୍ବାଟା ଆରି ଜିବନ୍ ନ ଦୁକାଇବାଟା । ୩୨ ଜନ୍ ଲକ୍‌ମନ୍ ଏନ୍ତି ଚଲାଚଲ୍‌ତି କର୍ବାଇ ସେମନ୍ ମରିଜିବାଟା ନିକ । ପରମେସରର୍ ଏ ନିୟମ୍ ସେମନ୍ ଜାନ୍‌ଲେ ମିସା ଏନ୍ତିସେ ଚଲାଚଲ୍‌ତି କର୍ବାଇ,

ଅବକା ସେଟା ନଏଁ, ମାତର ଏକ୍ତି ଚଲାଚଲ୍ତି କରବା ଲକର ବାଟେ  
ଅଇକରି, ସାରଦା ସଙ୍ଗ ଏଟା ଟିକ୍ ବଲି ସେମନ୍ଦକେ କଇବାଇ ।

## ୨

### ପରମେସରର୍ ସତ୍ ଦରମର୍ ବିଚାର୍

<sup>୧</sup> ✱ତେବେ ଏ ମର୍ ମଇତରମନ୍, ତମେ କାଇ ବିନ୍ ଲକର୍  
ବିଚାର୍ କଲାସ୍ତନି କି ? ତମେ ଜେ ଅଇରଇଲେ ମିସା, ଏକ୍ତି  
କରବାଟା ଟିକ୍ ନଏଁ । ବିନ୍ ଲକର୍ ଦସ୍ଦାରି ତମେ ଜଦି ନିଜେ  
ସେ ଦସ୍ କର୍ତେ ରଇସା ବଇଲେ, ତମେ ନିଜେ, ନିଜକେ ଦସି  
ବଲାଇ ଅଇଲାସ୍ତନି । <sup>୨</sup> ଆମେ ଜାନୁ, ପରମେସର୍ ଏକ୍ତି କର୍ତେ  
ରଇବା ଲକ୍ମନ୍ଦକେ ଟିକ୍ ସଙ୍ଗ ବିଚାର୍ କରସି । <sup>୩</sup> ଜନ୍ କାରାପ୍  
କାମର୍ ଲାଗି ତମେ ବିନ୍ ଲକ୍ମନ୍ଦର୍ ଦସ୍ ଦାରଲାସ୍ତନି, ସେଟା ତମେ  
ନିଜେ କର୍ତେ ରଇସା, ସେଟାର୍ ପାଇ ତମେ ପରମେସରର୍ ବିଚାର୍  
ଜାଗାଇ ଟିଆ ନଉଁ ବଲି ବାବ୍ଲାସ୍ତନି କି ? <sup>୪</sup> ସେକ୍ତି ବଇଲେ ତା, ତମେ  
ପରମେସରର୍ ବେସି ଜିବନ୍ ଦୁକାଇଲାଟା, ଉଦାର୍ କରବାଟା ଆରି  
ମୁରବ୍ବାଟାକେ ନାମାସ୍ ନାଇ । ତମେ ସତଇସେ ଜାନିଆଟାସ୍ ଜେ,  
ତମର୍ ମନେ କାରାପ୍ କାମ୍ ଅଇଲାଟା ମାନିଅଇବାକେ ପରମେସର୍  
ଏତେକ୍ ଦୟା କଲାଆଟେ । <sup>୫</sup> ମାତର୍ ତମେ ବଡ୍ପନିଆ ଆରି ମନ୍  
ଜିଦିଆ । ସେଟାର୍ ପାଇ ସାରାସାରି ବିଚାର୍ନା ଦିନେ ପରମେସର୍  
ଟିକ୍ ସଙ୍ଗ ତାର୍ ବିଚାର୍ନା ଦେକାଇସି । ସେ ରିସାର୍ ଦିନେ ନିଜର୍  
ପାଇ ରିସା ଟୁଲିଆଇଲାସ୍ତନି । <sup>୬</sup> କାଇକେବଇଲେ ପରମେସର୍  
ସେ ଦିନେ ତାର୍ କରମ୍ ଇସାବେ ସବୁକେ ପୁରୁସକାର୍ ଦେଇସି  
। <sup>୭</sup> ଜନ୍ ଲକ୍ମନ୍ଦ ଡାକ୍ପୁଟା, ସନ୍ମାନ୍ ଆରି ଅମର୍ ଅଇବା  
ଆସାଇ ମୁରଚିକରି ସତ୍କାମ୍ କରଜିବାଇ, ସେମନ୍ଦକେ ପରମେସର୍  
ନ ସାରବା ଜିବନ୍ ଦେଇସି । <sup>୮</sup> ମାତର ଜନ୍ ଲକ୍ମନ୍ଦ ନିଜର୍ ଲାବ୍  
ଆରି ସତ୍ ରଇବା ବିସଇ ନ ମାନି, ମିଚ୍କାତା ମାନ୍ଦବାଇ, ସେମନ୍ଦର୍  
ଉପ୍ରେ ବଡ୍ ରିସା ଆଇସି । <sup>୯</sup> ଜନ୍ ଲକ୍ମନ୍ଦ କାରାପ୍ କାମେ  
ବୁଡି ଆବଡ୍, ସେମନ୍ଦର୍ ପାଇ କସ୍ଟ ଆରି ଦୁକର୍ ଦିନ୍ ଆଇଲାନି  
। ସବୁକେ ଆଗଡ୍ ଜିଉଦିକେ ଆରି ତାର୍ ପଟେ ଜିଉଦି ନଇଲା

✱ ୨:୧ ୨:୧ ମାତିଉ ୭:୧; ଲୁକ୍ ୭:୩୭

ଲକ୍ଷ୍ମୀନର ପାଇ । ୧୦ ମାତର ଜନ୍ମ ଲକ୍ଷ୍ମୀନ ସତ୍ତ୍ୱ ଇସାବେ କାମ୍ କଲାଜନି, ସେମନ୍ ଜିଉଦି ଅଅଡ୍ କି ଜିଉଦି ନଇଲା ଲକ୍ଷ୍ମୀ ଅଅଡ୍, ସେମନ୍‌କେ ପରମେସର୍ ତାକ୍‌ପୁଟାକରି ସନ୍‌ମାନ୍ ଆରି ସାନ୍ତି ଦେଇସି । ୧୧ କାଇକେ ବଇଲେ ପରମେସର୍ ଗଟେକ୍ ତୁଲାଇସେ ସବୁର୍ ବିଚାର୍ କରସି ।

୧୨ ଜିଉଦି ନଇଲା ଲକ୍ଷ୍ମୀନ, ମସା ଲେକ୍‌ଲା ନିୟମ୍ ପାଅଡ୍ ନାଇ । ନିୟମ୍ ନ ପାଇ ପାପ୍ କଲାଇ, ସେମନ୍ ନିୟମ୍ ନ ଅଇତେ କୁରୁପ୍‌ନାସ୍ ଅଇବାଇ । ଆରି ଗଟେକ୍‌ବାଟେ ଜିଉଦିମନ୍ ନିୟମ୍ ଜାନିକରି ମିସା, ପାପ୍ କଲାଇ, ସେମନ୍ ସେ ନିୟମ୍ ଇସାବେ ତଣ୍ଡୁ ପାଇବାଇ । ୧୩ କାଇକେବଇଲେ ଲକ୍ଷ୍ମୀନ ଉଜେ ନିୟମ୍ ସୁନ୍‌ଲେସେ ପରମେସରର୍ ମୁଆଟେ ଦରମ୍ ଲକ୍ଷ୍ମୀ ବଲି ଏଜାଇଅଇ ନାପାରଡ୍, ମାତର ନିୟମ୍ ନାମ୍‌ଲେସେ ଅଇପାରଡ୍ । ୧୪ ଜିଉଦିନଇଲା ଲକ୍ଷ୍ମୀନର ନିୟମ୍ ନାଇ, ମାତର ସେମନ୍ ଅବିଆସ୍ କରି ନିୟମ୍‌ର ବିଦିମନ୍ ନାମ୍‌ବାଇ, ସେଟାସେ ସେମନ୍‌ର ନିୟମ୍ ପାରା । ୧୫ ସେମନ୍‌ର କାମ୍‌ଦାମ୍‌ଟାନେଅନି ଟିକ୍ ସଙ୍ଗ୍ ଜାନାପଡ୍‌ଲାମି ଜେ, ନିୟମ୍‌ର ବିଦିବିଦାନ୍ ସେମନ୍‌ର ମନେ ଲେକାଅଇଲା ଆଟେ । ଏ କାତା ସତ୍ତ୍ୱ, ସେମନ୍‌ର ବିବେକ୍ ଟିକ୍ ବଲି କଇବା ଚଲାଚଲ୍‌ତିଅନି ଜାନାପଡ୍‌ଲା । ଜେନ୍ତାରିକି ସତ୍ତ୍ୱ କାମ୍ କଲାବେଲେ ତାକ୍‌ର ବିବେକ୍, ଉଁ ବଲି କଇସି, ଆରି କାରାପ୍ କାମ୍ କଲାବେଲେ ବିବେକ୍ ସେମନ୍‌କେ ଦସି କରାଇସି । ୧୬ ଜନ୍ମ ଦିନେ ପରମେସର୍ ଜିସୁକିରିସ୍‌ଟର୍ ଟାନେଅନି ମୁନ୍‌ସର୍ ବିତ୍ତରେ ଲୁଚ୍‌ଲା ବିସଇମନ୍ ବିଚାର୍ କରସି, ସେ ଦିନେ ମୁଇ ଜାନାଇ ରଇଲା ସୁବକବର ଇସାବେ ଏ ସବୁ ଗଟ୍‌ସି ।

### ଜିଉଦି ଲକ୍ଷ୍ମୀନ ଆରି ନିୟମ୍

୧୭ ତମେମନ୍ ତେବେ ? ନିଜ୍‌କେ ଜିଉଦି ବଲାଇଅଇଲାସନି, ନିୟମ୍‌କେ ଆସାକରି ଆରି ପରମେସର୍ ସଙ୍ଗ୍ ମିସାବିତା କରବାଟା ନେଇ ବଡ୍‌ପନ୍ ଅଇଲାସନି, ୧୮ ପରମେସର୍ ତମ୍‌ଟାନେଅନି କାଇଟା ମନ୍ କଲାନି ସେଟା ତମେ ଜାନିଆଟାସ୍ । ଆରି ନିୟମେଅନି ସତ୍ତ୍ୱ ଆରି ସତ୍ତ୍ୱ ନ ଅଇବା ଗିଆନ୍ ପାଇଆଟାସ୍, ୧୯ ସତ୍ତ୍ୱଇସେ ଜାନିଆଟାସ୍ ଜେ, ତମେ କାଶାକେ ବାଟ୍‌ଦେକାଇବା ଲକ୍ଷ୍ମୀ, ଆନ୍ଦାରେ

ରଇବା ଲକ୍ମନର ପାଇ ଉଜଲ୍ ପାରା । ୨୦ ବକୁଆମନକେ ନିମାନ୍ କାତା କଇବା ଲକ୍, ଗିଆନ୍ ନ ରଇବା ଲକ୍ମନର ଗୁରୁ । ତମେ ବିସ୍ବାସ କଲାସ୍ନି ଜେ, ନିୟମ୍ ଜାନିକରି ପୁରାପୁରୁନ୍ ସତ୍ ଆରି ଗିଆନ୍ ପାଇଆଚାସ୍ ବଲି । ୨୧ ତମେ ବିନ୍ଲକ୍ମନକେ ସିକାଇଲାସ୍ନି, ମାତର୍ କାଇକେ ନିଜେ ସିକାସ୍ ନାଇ ? ଚରାଇବାର୍ ନାଇ ବଲି ସିକିଆ ଦେଇ ନିଜେ ଚରାଇଲାସ୍ନି କି ? ୨୨ ପାଦ୍‌ରା କାମ୍ କରାନାଇ ବଲି କଇ, ନିଜେ ପାଦ୍‌ରା କାମ୍ କଲାସ୍ନି କି ? ପୁଡ୍‌ଲା ପୁଜାକେ ଗିନ୍ କରି ଦେଉଲର୍ ଦିନ୍‌ସୁ ଚରଲାସ୍ନି କି ? ୨୩ ପରମେସର୍ ନିୟମ୍ ମିଲାଇଆତୁ ବଲି ବଡ୍‌ପନ୍ ଦେକାଇଲାସ୍ନି, ମାତର୍ ସେଟାକେ ଏଡିଦେଇକରି ତାକେ ଲାଜ୍ କରାଇଲାସ୍ନି କି ? ୨୪ ସାସ୍ତରେ ଲେକାଅଇଲା ଆଟେ, “ତମର୍‌ଲାଗି ଜିଉଦି ନଇଲା ଲକ୍ମନର୍ ବିତ୍ରେ ପରମେସର୍ ନିୟା ପାଇଲାନି ।”

୨୫ ଜଦି ତମେ ନିୟମ୍ ମାନ୍‌ଲେ, ତମର୍ ସୁନତ୍ ଅଇବାଟା ଟିକ୍ ଆଟେ । ଜଦି ନିୟମ୍ ନ ମାନ୍‌ଲେ ସୁନତ୍ ନ ଅଇଲା ଲକ୍ମନର୍ ସକ୍ ସମାନ୍ । ୨୬ ଜଦି ସୁନତ୍ ନ ଅଇଲା ଗଟେକ୍ ଜିଉଦି ନଇଲା ଲକ୍ ନିୟମ୍ ବିଦିବିଦାନ୍ ସବୁ ନାମ୍‌ତେ ରଇସି, ପରମେସର୍ ତାକେ ସୁନତ୍ ଲକ୍ ଇସାବେ ନ ତାକେ କି ? ୨୭ ସେଟା ପାଇ ଗାଗ୍‌ତେ ସୁନତ୍ ନ ଅଇରଇଲା ଜିଉଦି ନ ଅଇଲା ଲକ୍ମନ, ନିୟମ୍ ମାନିକରି ତମର୍ ବିଚାର୍ କର୍‌ବାଇ, କାଇକେ ବଇଲେ ତମେ ଗାଗ୍‌ତେ ସୁନତ୍ ଅଇ ନିୟମ୍ ପାଇରଇଲେ ମିସା, ସେଟା ନାମାସ୍ ନାଇ । ୨୮ ଉଜେ ଗାଗ୍‌ତେ ସୁନତ୍ ଅଇ ଉପ୍‌ରେ ଉପ୍‌ରେ ଜିଉଦି ବଲି ଚିନାଇଅଇବା ଲକ୍ ସତଇସେ ଜିଉଦି ନଅତ୍ । ୨୯ ଜେ ମନ୍ ବିତ୍ରେଅନି ଜିଉଦି, ସେ ଅଇଲାନି ସତଇସେ ଜିଉଦି । ସତଇସେ ସୁନତ୍ ମନ୍ ବିତ୍ରେର ବିସଇ । ସେଟା ସୁକଲ୍ ଆଡ୍‌ମାର୍ କାମ୍ । ଲେକ୍‌ଲା ନିୟମ୍ ସେଟା କରନାପାରେ । ଏନ୍ତାରି ଲକ୍ ଲକ୍ମନର୍‌ଟାନେଅନି ତାକ୍‌ପୁଟା ନ ପାଏ, ମାତର୍ ପରମେସର୍‌ଅନି ପାଇସି ।

## ୩

୧ ତେବେ ଜିଉଦି ନଇଲା ଲକ୍ମନର୍‌ତେଅନି ଜିଉଦିମନର୍ ଅଦିକ୍ ସୁବିଦା କାଇଟା ? ସୁନତ୍ କଲେ କାଇ ଲାବ୍ ? ୨ ସବୁ



ରକାମର ଲାଭ୍ ଆଚେ । ତେବେ ପରତୁମ୍, ପରମେସର୍ ତାର୍ କବର୍ ଜାନାଇବା ଦାଇତ୍ ଜିଉଦିମନର୍ ଆତେ ଦେଲା ଆଚେ । ୩ ତେବେ କାଇଟା ଅଇସି ? ଜିଉଦିମନର୍ ବିତ୍ରେଅନି କେତେ ଲକ୍ ବିସ୍ବାସ୍ ନ କଲେ ପରମେସର୍ କାତା ଦେଇରଇବାଟା ପୁରାପୁରୁନ୍ ନ ଅଏ କି ? ୪ କେବେ ନାଇ । ମୁନ୍ସୁସ୍ମନ୍ ସବୁ ଲକ୍ ମିଟୁଆ ଅଇଲେ ମିସା, ପରମେସର୍ ସତ୍ସେ । ସାସ୍ତରେ ଲେକା ଆଚେ,

“ତମର୍ ବାକିଅ ଅନି ତମେସେ ସତ୍ ବଲି ଚିନାଇ ଉଆ,

ତମେ ବିଚାର୍ କରାଇ ଅଇଲାବେଲେ ଜିତି କରି ରୁଆ ।”

୫ ଇତି ଗଟେକ୍ ପରସନ୍ ଅଇପାରେ, “ଆମର୍ କାରାପ୍ ଚଲାଚଲ୍ତି, ପରମେସର୍ ଦରମ୍ବେ ଚିନାଇ ଦେଇସି ବଇଲେ, ସେ ଆମ୍ବେ ଡଣ୍ଡଦେଇ ଅନିଆଇ କଲାନି ବଲି କଇପାରିଅଇସି କି ? ୬ କେବେ ନାଇ । ପରମେସର୍ ଜଦି ନିଆଇତେଇ ନାଇ, ତେବେ ସେ କେନ୍ତ୍ର ଜଗତର୍ ନିଆଇ ବିଚାର୍ କରସି ?”

୭ “ଜଦି ମୁଇ ମିଚ୍ କଇବାଟା ପରମେସର୍ ସତ୍ ଅଦିକ୍ ଡିସି କରି ଡାକ୍ପୁଟା କରାଇସି ବଇଲେ, ମୁଇ କାଇକେ ପାପି ବଲି ଡଣ୍ଡ ପାଇବି ?” ୮ ସେନ୍ତ୍ରାଆଲେ “ଆସା, ଆମେ କାରାପ୍ କାମ୍ କରୁ ଜେନ୍ତାରି କି ତେଇଅନି ନିକ ବିସଇ ବାରଇସି” ବଲି କଇଅଇସି କି ? ନାଇ, କଇ ନଏ । ମୁଇ ସମାନ୍ ଏକ୍ତି କାତା କଇଲିନି ବଲି ଦାବା କରି କେତେ ଲକ୍ ମକେ ଇଜଡ୍ ଜିକ୍ଲାଇନି । ସେମନ୍ ସେଟାର୍ ପାଇ ଜନ୍ ଡଣ୍ଡ ପାଇବାର୍ ରଇଲାଇ, ସତଇସେ ପାଇବାଇ ।

### ଗଟେକ୍ଲକ୍ ମିସା ଦରମ୍ ଲକ୍ ନାଇ

୯ ତେବେ କାଇ ଜିଉଦିମନର୍ ଜିଉନା କାଉନା, ଜିଉଦି ନଇଲା ଲକ୍ମନର୍ଟାନେଅନି ଅଦିକ୍ ନିକ କି ? ନାଇ, ମୁଲ୍ବେ ନାଇ ! ମୁଇ ଆଗ୍ତୁଅନି କଇଲି ଆଚି ଜେ, ସେମନ୍ ଦୁଇ ଦଲ୍ ଜାକ ପାପର୍ ସାସନେ ଆଚଡ୍ । ୧୦ ସାସ୍ତରେ ଲେକା ଆଚେ,

ଦରମ୍ ଲକ୍ କେ ନାଇ ଗଟେକ୍ ଲକ୍ ମିସା ନାଇ,

୧୧ କେ ମିସା ଗିଆନ୍ ରଇବା ଲକ୍ ନାଇ ।

ସତଇସେ ପରମେସର୍ବେ ଉପାସନା କରବା ଲକ୍ ନାଇ ।

୧୨ ସେମନ୍ ସବୁ ଲକ୍ ପରମେସର୍ଟାନେଅନି ଅନି ଦୁରିକେ ଜାଇ ଆଚଡ୍ ।

ସେମନ୍ ବାଟ୍ ବାନା ଅଇଗାଲାଇ ଆଚଡ୍ ।

- କେ ଗଟେକ୍ ଲକ୍ ମିସା ସତ୍ କାମ୍ କରତ୍ ନାଇ ।  
 ୧୩ ସେମନର୍ କାତା କଇବାଟାନେ ଅଦିକ୍ ନାଡାଇବାଟା ଆଟେ,  
 ଟଣ୍ଡେଅନି ଗାଡ୍ ଗାଲାପାରା ମିର୍ କାତା ବାରଇଲାନି ।  
 ଜିବ୍ତଲେ ନାଗ୍ ସାପର୍ ବିସ୍ ପାରା ଆଟେ ।  
 ୧୪ ସେମନର୍ କାତା, ପିତା ଅଇ, ଅବିସାପେ ପୁରୁନ୍ ଅଇଆଟେ  
 ।  
 ୧୫ ସେମନ୍ ମାର୍ବାକେ ଆରି ମରାଇବାକେ ତେରେପେତେ  
 ଅଇଲାଇନି ।  
 ୧୬ ସେମନ୍ ଜନ୍ବାଟେ ଗାଲାଇନି, ତେଇ କୁରୁପ୍ନାସ୍ ଅଇବାଟା  
 ଆରି କସ୍ଟ ଅଇବାଟା ଉବଜ୍‌ଲାନି ।  
 ୧୭ ସେମନ୍ ସାନ୍ତିର୍ ବାଟ୍ ନାଜାନତ୍,  
 ୧୮ କି ପରମେସର୍‌କେ ଡର୍‌ବାଟା ସିକତ୍ ନାଇ ।  
 ୧୯ ଆମେ ଜାନ୍ତୁ, ଜନ୍ ଲକ୍‌ମନ୍ ନିୟମର୍ ସାସନ୍ ତଲେ ଆତତ୍,  
 ତେଇର୍ ସବୁ ବିଦିବିଦାନ୍ ମାନ୍‌ବାକେ ବାଦିଅ । ପରମେସର୍  
 ଜେଡେବଲ୍ ଗୁଲାଇ ଜଗତର୍ ବିଚାର୍ କର୍‌ସି, ନିୟମ୍ ନ ମାନ୍‌ଲା  
 ଲକ୍‌ମନ୍ କାଇ କାମ୍ ମିସା ଦେକାଇକରି, ଦସ୍ କରନାଇ ବଲି  
 କଇନାପାରତ୍ । ୨୦ ✨ମାତର୍ ନିୟମର୍ ରିତିନିତି ମାନିକରି କେ ମିସା  
 ପରମେସରର୍ ମୁଆଟେ ଦରମ୍ ଲକ୍ ଅଇନାପାରେ । ନିୟମେଅନି  
 ସେ ଲକ୍ ଅବକା ପାପର୍ ବଜ୍‌ସେ ପାଇସି ।

### ବିସ୍‌ବାସ୍ କରି ଦରମ୍ ବଲାଇଅଇବାଟା

୨୧ ମାତର୍ ଏବେ ଲକ୍‌ମନ୍ ତାର୍ ମୁଆଟେ ଦରମ୍ ବଲି ଏଜାଇ  
 ଅଇବାକେ, ପରମେସର୍ ଜନ୍‌ଟା ଜଜ୍‌ନା କରି ରଇଲା, ସେଟା  
 ସେ ଆମକେ ଜାନାଇଦେଲାଆଟେ । ମାତର୍ ଏଟା ନିୟମ୍  
 ମାନ୍‌ଲାକେ ଅଏନାଇ । ଏ ଜଜ୍‌ନା ମସାର୍ ନିୟମେ ଆରି  
 ବିନ୍ ବବିସତ୍‌ବକ୍‌ତାମନର୍ ଟାନେ ମିସା ରଇଲା । ୨୨ ✨ଉଜେ  
 ଜିସୁକିରିସ୍‌ଟକେ ବିସ୍‌ବାସ୍ କଲାକେ ଏବେ ଆମେ ପରମେସରର୍  
 ଦେକ୍‌ବା ଇସାବେ ଦରମ୍ ଲକ୍ ବଲାଇ ଅଇଆରୁ । ପରମେସର୍  
 କେତେ ଲକ୍‌କେ ଆଲାଦ୍ କରି ଆରି କେତେକ୍ ଲକ୍‌କେ ଗିନ୍  
 କରେନାଇ । କିରିସ୍‌ଟକେ ବିସ୍‌ବାସ୍‌କର୍‌ବା ସବୁ ଲକ୍‌ମନ୍‌କେ ଏ

ଅଦିକାର ଦେଲାଆତେ । ୨୩ ସବୁ ଲକ୍ ପାପ୍ କଲାଅ ଆତଡ଼ ଆରି ପରମେସରର୍ ପୁରାପୁରୁନ୍ ମଇମାଇଅନି ଉନା ଅଇଗାଲାଅ ଆତଡ଼ । ୨୪ ମାତର୍ ପରମେସର୍ କିରିସ୍ଟ ଜିସୁର୍ତେଇଅନି ଇନାମେ ନ ସାରବା ଜିବନ୍ ଦୁକାନି ଦାନ କଲାଆତେ । ଜନ୍ ଲକ୍ମନ୍ ସେଟା ମିଲାଅଆତଡ଼, ସେମନ୍କେ ମାପ୍ପୁ ଜିସୁ ମୁକ୍ତି ଦେଇସି । ସେମନ୍ ପରମେସରର୍ ମୁଆଟେ ଦରମ୍ ଲକ୍ ବଲାଅ ଅଇବାଇ । ୨୫ ପରମେସର୍ ଜିସୁକେ ଦାନକଲା, ଜେନ୍ତିକି ତାର୍ ମରନ୍, ତାକେ ବିସ୍ବାସ୍ କରବା ଲକ୍ମନର୍ ପାପ୍ କେମାର୍ ବାଟ୍ ଦେକାଇସି । ସେ ନିଜର୍ ଦରମ୍ ଅଇଲାଟା ଦେକାଇବାକେ ଏଟା କଲା । ସେ ସବୁ ମୁର୍ଚିକରି ଲକ୍ମନ୍ ଆଗତୁ କରଇବା ପାପ୍ ଦାରେ ନାଇ । ୨୬ ମାତର୍ ଏବେ ସେ ତାର୍ ଦରମ୍ ଅଇଲାଟା ଦେକାଇବାକେ ସେ ସବୁ ପାପ୍, ଜନ୍ ପାପ୍ କି ଜିସୁ କୁର୍ସକାଟେ ଦାରିରଇଲା, ତେଇ ମିସାଇ ଆତେ । ଏଟାରଲାଗି ପରମେସର୍ ପୁରାପୁରୁନ୍ ଦରମ୍ ଆତେ । ଆରି ଜେଡ଼କି ଲକ୍ ଜିସୁକେ ବିସ୍ବାସ୍ କରବାଇ ସେ ସବୁ ଦରମ୍ ଲକ୍ ବଲି ଏଜାଇଅଇବାଇ ।

୨୭ ସେନ୍ତାରଆଲେ ଆମେ କାଇ ବିସଇନେଇ ବଡ଼ପନ୍ ଅଇବାର୍ ଆତେ ? ନାଇ ସେନ୍ତି କାଇଟା ମିସା ନାଇ । ଆମେ ବଡ଼ପନ୍ ଦେକାଇବାକେ କାଇ ବିସଇ ଆତେ କି ? ଆମେ ପୁରାପୁରି ନିୟମ୍ ମାନୁନି ବଲିକରି କି ? ନାଇ, ଅବକା ବିସ୍ବାସ୍ କରବାଟାସେ ଆମର୍ ବଡ଼ପନ୍ ଦେକାଇବାଟା । ୨୮ ଆମେ ସତଇସେ ବୁଜି ପାରୁ ଜେ, ଗଟେକ୍ ଲକ୍ ଅବକା ବିସ୍ବାସ୍ କରସେ ଦରମ୍ ଲକ୍ ବଲାଅ ଅଇସି, ନିୟମ୍ ମାନିକରି ନାଇ । ୨୯ ପରମେସର୍ କାଇ ଉଜେ ଜିଉଦିନନର୍ସେ ପରମେସର୍ କି ? ସେ କାଇ ଜିଉଦିନଇଲା ଲକ୍ମନର୍ ପରମେସର୍ ନର୍ସି କି ? ସତଇସେ ସେ ସବୁ ଲକ୍ ପରମେସର୍ । ୩୦ ☆ପରମେସର୍ ଗଟେକ୍ସେ । ଜିଉଦି ଆରି ଜିଉଦିନଇଲା ଲକ୍ମନ୍ ପାଇ ସମାନ୍ । ସେମନର୍ ବିସ୍ବାସ୍ ପାଇ ସେମନ୍କେ ଦରମ୍ ଲକ୍ ଇସାବେ ବାଟ୍ସି । ୩୧ ଏଟାର୍ ଅରଡ଼ କାଇଟା, ଏନ୍ତାରି ବିସ୍ବାସ୍ କରି ନିୟମ୍ ନସାଇଦେଉଁ କି ? ନାଇ, ଆମେ ଜଦି ଜିସୁକିରିସ୍ଟକେ ବିସ୍ବାସ୍ କରୁ ବଇଲେ, ନିୟମ୍କେ ମିସା ଡାଟ୍ କରୁ ।

## ୪

ବିସ୍ୱାସରୁଲାଗି ଅବ୍ରାହାମ୍ ଦରମ୍ ଅଇଲା

<sup>୧</sup> ଆମର ବାବା ଅବ୍ରାହାମ୍ ବିସଇନେଇ କାଇଟା ବଲି କଉଁ ? ସେ ଆମର ଜିଉଦି ବସ୍ତର ଆନିଦାଦି ରଇଲା । ସେ କେନ୍ତ୍ର ଦରମ୍ ବଲାଇ ଅଇଲା ? <sup>୨</sup> ଜଦି ଅବ୍ରାହାମ୍ ନିଜର୍ କରରଇବା କାମେଅନି ସେ ପରମେସରର୍ ମୁଆଟେ ଦରମ୍ ଲକ୍ ବଲାଇ ଅଇତା, ସେ ବଡ଼ପନ୍ କାତା କଇପାରୁତା । ମାତର୍ ସେଟା ପରମେସରର୍ ମୁଆଟେ ଅଇ ନାପାରେ । <sup>୩</sup> ✧ସାସ୍ତର୍ ଇସାବେ, “ଅବ୍ରାହାମ୍ ପରମେସରର୍ତେଇ ବିସ୍ୱାସ କଲା, ଆରି ଏ ବିସ୍ୱାସର୍ ଲାଗି ପରମେସର୍ ତାକେ ଦରମ୍‌ଲକ୍ ଇସାବେ ନିଜର୍ କଲା ।” <sup>୪</sup> ଜେ କାମ୍ କରସି ସେ ବୁଢ଼ି ପାଇସି ଆକା । କାରଟାନେଅନି ଦାନ୍ ଇସାବେ ନ ପାଏ । <sup>୫</sup> ମାତର୍ ଜେ ନିଜର୍ ଉପରେ ଆସା ନ କରି, ପରମେସରର୍ତେଇ ବିସ୍ୱାସ୍ କରସି, ତାର ବିସ୍ୱାସର୍ ଲାଗି, ଅପ୍ରାଦର୍ ଦସ୍ ନ ଦାରି ଚାଡ଼ିଦେବା ପରମେସର୍, ତାକେ ଦରମ୍‌ଲକ୍ ଇସାବେ ଡାକ୍ସି । <sup>୬</sup> ଜନ୍ ଲକ୍‌ର ରିଡିନିଡି ନ ଦେକି ପରମେସର୍ ତାକେ ଦରମ୍‌ଲକ୍ ବଲି ଡାକ୍ସି, ସେନ୍ତାରି ଲକ୍‌ର ବିସଇନେଇ ଦାଉଦ୍ କଇଆଟେ,

<sup>୭</sup> ଜାର୍ ଦସ୍ ଦଇଅଇଲା ଆଟେ ସେ କେଡେ କରମର୍ ଲକ୍ ।

ଜେ ପାପକେମା ପାଇଲାଆଟେ ସେ କେଡେ କରମର୍ ଲକ୍ ।

୮ ମାପରୁ ଜାର୍ ପାପର୍ ଇସାବ୍ ନ କରେ,  
ସେ କେଡେ କରମର୍ ଲକ୍ !

<sup>୯</sup> ଇଡି ଦାଉଦ୍ ଜନ୍ ଲକ୍‌ମନ୍‌କେ କେଡେ କରମର୍ ଲକ୍ ବଲି କଇଲାଆଟେ, ସେମନ୍‌ର ବିଡ଼ରେ କାଇ ଅବ୍‌କା ସୁନଡ୍ ଅଇଲା ଲକ୍‌ସେ ରଇଲାଇ କି ? ନାଇ, ସୁନଡ୍ ନ ଅଇଲା ଲକ୍ ମିସା କେଡେ କରମର୍ ଲକ୍ ଅଇପାରଡ୍ । ଆମେ କଇଲୁନି ଅବ୍ରାହାମ୍ ବିସ୍ୱାସ୍ କଲାକେସେ ଦରମ୍ ଲକ୍ ଇସାବେ ଏଜାଇଅଇଲା, <sup>୧୦</sup> ଏଟା କେଡେବେଲେ ଗଟିରଇଲା ? ଅବ୍ରାହାମ୍ ସୁନଡ୍ ଅଇଲା ପଟେ କି, ତାର୍ ଆଗଡୁ ? ଆଗଡୁ, ପଟେ ନାଇ । <sup>୧୧</sup> ସୁନଡ୍ ଅଇବା ଆଗଡୁ, ଅବ୍ରାହାମ୍ ବିସ୍ୱାସ୍ ଲାଗି ପରମେସର୍ ତାକେ ଦରମ୍ ଲକ୍ ଇସାବେ ଡାକି ରଇଲା । ଏଟା ଜାନାଇବାକେ ଗଟେକ୍ ଚିନ୍‌ପାରା

ଅବ୍ରାମ୍ ଏ ସୁନତ୍‌ବିଦି କରବାଟା ନାମି ରଇଲା । ଜେଡ୍ରାକ୍‌ଜି ଜନ୍ ଲକ୍‌ମନ୍ ସୁନତ୍ ନ ଅଇକରି ମିସା, ବିସ୍‌ବାସ୍ କରବାଇ, ସେମନ୍ ଦରମ୍‌ଲକ୍ ବଲି ଏଜାଇ ଅଇବାଇ । ସେଟାର୍‌ପାଇ ଗାଗଡ୍ ଇସାବେ ଅବ୍ରାଆମ୍ ସେମନ୍‌ର୍ ବାବା ବଲାଇଅଇସି, <sup>୧୨</sup> ଅବ୍ରାଆମ୍ ସୁନତ୍ ଅଇବା ଆଗ୍‌ତୁ ବିସ୍‌ବାସ୍‌ର୍ ଜନ୍ ଚିନ୍ ଦେଇରଇଲା, ଜଦି ସୁନତ୍ ନଇଲା ଲକ୍‌ମନ୍ ନିଜର୍ ଜିବନେ ସେ ରକାମ୍ ବିସ୍‌ବାସ୍ ଦେକାଇ ପାରବାଇ ବଇଲେ, ଅବ୍ରାଆମ୍ ସେମନ୍‌ର୍ ମିସା ବାବା ।

**ପରମେସର୍ ବିସ୍‌ବାସିମନ୍‌କେ ଦେଇରଇବା କାତା**

<sup>୧୩</sup> ✧ ଅବ୍ରାଆମ୍ ନିୟମ୍ ମାନଲାଠ୍ ପାଇ ନାଇ, ଅବକା ବିସ୍‌ବାସ୍ କଲାଠ୍‌ପାଇ ସେ ଦରମ୍ ଲକ୍ ବଲି ଏଜାଇଅଇରଇଲା । ଆରି ସେଟାର୍ ପାଇ, ସେ ଆରି ତାର୍ କୁଟୁମର୍ ଲକ୍‌ମନ୍ ଜଗତର୍ ଅଦିକାରି ଅଇବାଇ ବଲି ପରମେସର୍ କାତା ଦେଇରଇଲା । <sup>୧୪</sup> ✧ ଜନ୍ ଲକ୍‌ମନ୍ ନିୟମ୍ ମାନବାଇ, ଅବକା ସେମନ୍‌ସେ ଜଦି ପରମେସର୍‌ର୍ ଦାନ୍ ପାଇବାଇ, ତେବେ ଲକ୍‌ମନ୍‌ର୍ ବିସ୍‌ବାସ୍ ତୁଟାଇ ଅଇସି । ପରମେସର୍ ଦେଇରଇବା କାତା ମିସା ତୁଟାଇସେ । <sup>୧୫</sup> ନିୟମ୍ ନ ମାନଲାଠ୍‌ପାଇ ଲକ୍‌ମନ୍ ପରମେସର୍‌ର୍ ବଡ୍ ରିସାଇ ପଡ୍‌ବାଇ । ମାତର୍ ଜକ୍ତି ନିୟମ୍ ନାଇ, ତେଇ ନିୟମ୍ ନ ମାନବା କାତା ଉଟେ ନାଇ ।

<sup>୧୬</sup> ✧ “ ସେଟାର୍‌ପାଇ ପରମେସର୍ କାତା ଦେଇରଇବାଟା ବିସ୍‌ବାସ୍‌ର୍ ଲାଗି ରଇସି । ଜନ୍ ଲକ୍‌ମନ୍ ନିୟମ୍ ମାନବାଇ, ଅବକା ସେମନ୍‌ର୍ ପାଇସେ ପରମେସର୍ କାତା ଦେଏ ନାଇ । ଅବ୍ରାଆମ୍‌ର୍ ପାରା ବିସ୍‌ବାସ୍ କର୍ତେ ରଇବା ସବୁର୍ ପାଇ ସେଟା ଲତା । କାଇକେବଇଲେ ଅବ୍ରାମ୍ ସେମନ୍‌ର୍ ଆଡ୍‌ମା ଇସାବେ ରଇବା ବାବା ।” <sup>୧୭</sup> ଏ ବିସଇ ସାସ୍‌ତରେ ଲେକାଆରେ “ତକେ ଆମେ ସବୁ ବସ୍‌ର୍ ବାବା କରିଆତୁ ।” ପରମେସର୍‌ର୍ ଇସାବେ ଏ କାତା ଦେଲାଟା ଠିକ୍ ରଇଲା, କାଇକେ ବଇଲେ ଜନ୍ ପରମେସର୍‌କେ ଅବ୍ରାଆମ୍ ବିସ୍‌ବାସ୍ କର୍ତେ ରଇଲା, ସେ ପରମେସର୍‌ର୍ ବାକିଅ ମଲା ଲକ୍‌ମନ୍‌କେ ଜିବନ୍ କର୍ସି ଆରି କାଇଟା ନଇଲାତେଇଅନି ସବୁ ବିସଇ ତିଆର୍ କର୍ସି । <sup>୧୮</sup> ଆସା କର୍‌ବାକେ କାଇଟା ନ ରଇଲେ

---

✧ **୪:୧୩** ୪:୧୩ ଗାଲାତିୟ ୩:୨୯ ✧ **୪:୧୪** ୪:୧୪ ଗାଲାତିୟ ୩:୧୮ ✧ **୪:୧୬** ୪:୧୬ ଗାଲାତିୟ ୩:୭

ମିସା, ଅବ୍ରାହାମ୍ ବିସ୍‌ବାସ୍ କରି ଆସାଅଇ ରଇଲା । ସେଟାର୍ ପାଇ ସେ ସବୁ ବସ୍ତୁ ବାବା ଅଇଲା, କାଇକେ ବଇଲେ ସେ ସାସ୍ତରେଅନି କାତା ମିଲାଇରଇଲା, “ ତାର୍ କୁଟୁମର୍ ଲକ୍‌ମନ୍ ଏଜି ନାପାର୍‌ବା ଆକାସ୍‌ର ତାରାପାରା ଅଇବାଇ । ” <sup>୧୯</sup> ତାକେ ସେଡ଼କିବେଲେ ସଏ ବରସ୍ ଅଇରଇଲା । ମାତର୍ ତାକର୍ ମଲାପାରା ଗାଗଡ଼ର୍ କାତା ବାବି, କି ସାରା ଜେକି ଆରି ପିଲା ପାଇ ନାପାରେ, ଏ କାତା ଜାନିକରି ମିସା, ତାକର୍ ବିସ୍‌ବାସ୍ ଉନା ଅଏନାଇ । <sup>୨୦</sup> ସେ ତାର୍ ବିସ୍‌ବାସେଅନି ବିନେ ବେଗ୍‌ଲେ ନାଇ, କି ପରମେସର୍ ଦେଇରଇବା କାତା ଅଇସି କି ନଏଁ ବଲି କଏନାଇ । ସେ ବିସ୍‌ବାସ୍ କରି ବପୁ ସଙ୍ଗ୍ ପୁରାପୁରୁନ୍ ଅଇଲା ଆରି ସେ ପରମେସର୍‌କେ ଡାକ୍‌ପୁଟା କଲା । <sup>୨୧</sup> “ପରମେସର୍ ଜନ୍ କାତା ଦେଇରଇଲା, ସେଟା ସେ କରସି ଆକା ବଲି ଡାକ୍‌ସଙ୍ଗ୍ ବିସ୍‌ବାସ୍ କଲା ।” <sup>୨୨</sup> ସେ ବିସ୍‌ବାସ୍‌ର ଲାଗି ଅବ୍ରାହାମ୍ ପରମେସର୍ ଦେକ୍‌ବା ଇସାବେ ଦରମ୍ ଲକ୍ ବଲି ଏଜାଇଅଇଲା । <sup>୨୩</sup> ଦରମ୍ ଲକ୍ ଇସାବେ ଏଜାଇଅଇବାଟା ସାସ୍ତରର୍ କାତା, ଉଜେ ଅବ୍ରାମ୍‌କେସେ ଅଇସି, ସେନ୍ତାରି ନାଇ । <sup>୨୪</sup> ସେଟା ଆମର୍‌ପାଇ ମିସା ଲେକାଅଇଆତେ । ଆମେ ମିସା ପରମେସର୍‌କେ ବିସ୍‌ବାସ୍ କଲେ ଦରମ୍ ଲକ୍ ବଲି ଏଜାଇଅଇବୁ । ସେ ମାପୁରୁ ଜିସୁକେ ମଲାଡେଇଅନି ଆରି ତରେକ୍ ଜିବନ୍ କରି ଉଟାଇଲା ଆତେ ବଲି ବିସ୍‌ବାସ୍ କଲୁନି । <sup>୨୫</sup> ମାପୁରୁ ଜିସୁ ଆମର୍ ପାପର୍ ଲାଗି ମରିରଇଲା ଆରି ପରମେସର୍‌ଡେଇ ଆମ୍‌କେ ଦରମ୍ ଲକ୍ କରାଇବାକେ ଆରି ତରେକ୍ ଜିବନ୍ ଅଇ ଉଟ୍‌ଲା ।



### ପରମେସର୍ ସଙ୍ଗ୍ ମିସିବିଡିରଇବାଟା

<sup>୧</sup> ଏବେ ଆମେ ବିସ୍‌ବାସ୍ କଲାର୍ ପାଇ ପରମେସର୍ ଦେକ୍‌ବା ଇସାବେ ଦରମ୍ ଲକ୍ ବଲାଇଅଇଲୁ ଆରୁ ଆରି ମାପୁରୁ ଜିସୁ କିରିସ୍‌ଟର ଲାଗି ପରମେସର୍ ସଙ୍ଗ୍ ସାନ୍ତି ସଙ୍ଗ୍ ଆରୁ । <sup>୨</sup> କାଇକେବଇଲେ ଆମେ ବିସ୍‌ବାସ୍ କଲାର୍ ପାଇସେ ତାର୍ ଜିବନ୍ ଦୁକାଇଲାଟାନେ ଆମ୍‌କେ ଆନି ଆତେ । ଜନ୍‌ଡେଇ କି ଏବେ ଆମେ ଆରୁ । ଆମେ ବେସି ସାର୍‌ଦା ସଙ୍ଗ୍ ବଡ଼ପନର୍ କାତା କଇବୁ । କାଇକେବଇଲେ ପରମେସର୍ ଡାକ୍‌ପୁଟାର୍‌ଡେଇ ମିସ୍‌ବୁ ବଲି

ଆମ୍ଭଙ୍କେ ଆସା ଆଚେ । <sup>୩</sup> ସବୁ ରକାମର ଦୁକ୍ କସ୍ତ ମୁରତି କରି ସାର୍ଦା ଅଇଲୁନି, କାଇକେବଇଲେ ତେରେପେତେ ନ ଅଇ କସ୍ତ ମୁରତ୍ଲେ, ମନେ ସାଆସ୍ ଆଇସି । <sup>୪</sup> ସାଆସ୍ ଦାରି ରଇଲେ ପରମେସର୍ ସାର୍ଦା ଅଇସି । ତାର୍ ସାର୍ଦାଇଅନି ଆସା ଆଇସି । <sup>୫</sup> ଏ ଆସା ଆମ୍ଭଙ୍କେ ମୁରମୁରା ଅଇବାକେ ନ ଦେଏ, କାଇକେ ବଇଲେ ପରମେସର୍ ଆମ୍ଭଙ୍କେ ସୁକଲ୍‌ଆତ୍‌ମା ଦେଇ କରି ଆମର୍ ମନେ ତାର୍ ଆଲାଦ୍ ବରତି କରିଦେଲାଆଚେ । ସୁକଲ୍‌ଆତ୍‌ମା ଆମର୍ ପାଇ ରଇବା ପରମେସରର୍ ଦାନ୍ ।

<sup>୬</sup> ଆମ୍ଭଙ୍କେ କେ ମିସା ଆକାସାକା ନ ରଇଲା ବେଲେ, ପରମେସର୍ ଟିକ୍ କଲା ବେଲାଇ କିରିସ୍ତ ପାପିମନର୍ ପାଇ ମଲା । <sup>୭</sup> ଦରମ୍ ଲକର୍ ପାଇ କେ ମିସା ଗଟେକ୍ ଲକ୍ ମରବାଟା ଆମେ ନାଜାନ୍, ମାତର୍ ଏନ୍ତାରି ମିସା ଅଇସି ଜେ, ଗଟେକ୍ ନିମାନ୍ ଲକର୍‌ପାଇ ନିଜର୍ ଜିବନ୍ ଦେବାକେ କେ ଆଲେ ସାସ୍ କରବାଇ । <sup>୮</sup> ମାତର୍ ଆମେ ପାପି ରଇଲାବେଲେ ଜିସୁ ଆମର୍ ପାଇ ନିଜର୍ ଜିବନ୍ ସର୍ପିଦେଲା । ଇତିଅନି ପରମେସର୍ ଆମ୍ଭଙ୍କେ କେତେକ୍ ଆଲାଦ୍ କଲାନି, ସେଟା ଜାନାପତିଆଚେ । <sup>୯</sup> କିରିସ୍ତର୍ ବନିରଲାଗି ପରମେସର୍ ଆମ୍ଭଙ୍କେ ଦରମ୍ ଲକ୍ କଲାଆଚେ । ସେନ୍ତି ଆଲେ ପରମେସରର୍ ବଡ଼୍ ରିସାଇଅନି ଆମ୍ଭଙ୍କେ ରକିଆ କରବାକେ କିରିସ୍ତ କେତେକ୍ ମନ୍ଦିଆନ୍ ନ ଦେଏ ! <sup>୧୦</sup> ଆମେ ପରମେସରର୍ ସତ୍‌ରୁ ରଇଲାବେଲେ ତାର୍ ପିଲା ଆମର୍ ପାଇ ଜିବନ୍ ଦେଲା । ତେଇଅନି ପରମେସର୍ ସଙ୍ଗ୍ ଆମେ ଆରିତରେକ୍ ଜଡ଼ିଅଇଲୁ । ତାର୍ ସଙ୍ଗ୍ ଆରିତରେକ୍ ଜଡ଼ିଅଇଲା ପତେ, ଏବେ କିରିସ୍ତର୍ ଜିବନର୍ ଲାଗି ଆମେ ରକିଆ ପାଇବାକେ କେତେକ୍ ଅଦିକ୍ ନ ପାଉ ? <sup>୧୧</sup> ଅବ୍‌କା ସେଡ଼କିସେ ନଏ, ମାପରୁ ଜିସୁକିରିସ୍ତର୍ ତେଇଅନି ପରମେସର୍ ଜନ୍ ସବୁ କାମ୍ କଲାଆଚେ, ସେଟାର୍ ପାଇ ଆମର୍ ମନ୍ ଉଡୁକ୍‌ଦୁଡୁକ୍ ଆରି ସାର୍ଦାଇ ପୁରୁନ୍ ଅଇଆଚେ । ସେ ଜିସୁ ପରମେସର୍ ସଙ୍ଗ୍ ଆମ୍ଭଙ୍କେ ଆରିତରେକ୍ ମିସାଇଲା ଆଚେ ।

### ଆଦମ୍ ଆରି କିରିସ୍ତ

<sup>୧୨</sup> ପରତମେ ଗଟେକ୍ ଲକ୍‌ସେ ପାପ୍ କରିରଇଲା । ଆରି ପାପର୍ ଲାଗି ମରନ୍ ଆଇଲା । ସବୁ ଲକ୍ ପାପ୍ କଲାର୍ ପାଇ ମରନ୍ ସବୁ

ମୁନୁସ୍ ଜାତିକେ ଡାବିଅଇଲା । ୧୩ ନିୟମ୍ ମିଲ୍‌ବା ଆଗତୁ ଲକ୍‌ମନ୍ ପାପ୍ କରତେରଇଲା । ମାତର୍ ନିୟମ୍ ନ ରଇବାଟାନେ ପାପର୍ ଇସାବ୍ ନ ଅଇତେରଇଲା । ୧୪ ଆଦମର୍ ବେଲାଅନି ମସାର୍ ବେଲା ଜାକ, କେ ଆଦମର୍ ପାରା କାତା ନ ମାନି, ସେ କରି ରଇବା ପାପ୍ ପାରା ନ କରିରଇଲେ ମିସା, ସବୁ ଲକ୍ ମଲା । ଜେ ଆଇବାର୍ ରଇଲା, ସେ ଆଦମର୍ ଗଟେକ୍ ରୁପ୍ । ୧୫ ମାତର୍ ପରମେସରର୍ ଇସାବ୍ ନଇଲା ଦାନ୍ ଆରି ଆଦମର୍ ପାପ୍ ବିତ୍‌ରେ କେତେକ୍ କେତେକ୍ ଦୁର୍ ଆଟେ । ଗଟେକ୍ ଲକ୍ ପାପର୍ ପାଇ ବେସି ଲକ୍ ମରନ୍ ଅଇଲା । ମାତର୍ ପରମେସର୍ ତାର୍ ଜିବନ୍‌ଦୁକାଇଲାକେ, ଲକ୍‌ମନ୍ ପାଇ ଆରି ଗଟେକ୍ ଲକ୍‌କେ ଇନାମେ ଦେଲା । ସେ ବଡ଼ ଇନାମ୍ ଜିସୁ କିରିସ୍‌ଟର୍ ଜିବନ୍‌ ଦୁକାଇଲାକେ ପୁରାପୁରନ୍ ଅଇଲା । ୧୬ ସେ ଗଟେକ୍ ପାପ୍ କାମ୍ ଅଇଲା ପଟେ ସବୁ ମୁନୁସ୍ ଜାତି ବିଚାର୍‌ନା ଜାଗାଇ ଚିଆଅଇ ଦସି ବଲାଅ ଅଇଲା । ମାତର୍ ଏବେ ଜବର୍ ଲକ୍ ପାପର୍ ଲାଗି ଲକ୍‌ମନ୍ ଆସା ନ ରଇଲେ ମିସା, ପରମେସର୍ ଦାନ୍ କଲାକେ ଦସି ନାଇ ବଲି ଏଜାଇଅଇଲା । ୧୭ ଏଲେମିସା ଗଟେକ୍ ମୁନୁସର୍ ପାପର୍ ପାଇ ସବୁ ଲକ୍‌କେ ମରନ୍‌ତ ଡଣ୍ଡ୍ ଆଇଲା । ମାତର୍ ସେ ଗଟେକ୍ ମୁନୁସ୍ ଜନ୍‌ଟାକି କିରିସ୍‌ଟ, ଜାଇଟା କଲାଆଟେ ସେଟା କେତେକ୍ ବଡ଼ ବିସଇ ! ଜେତେକ୍ ଲକ୍ ପରମେସର୍ ବଡ଼ ଜିବନ୍‌ଦୁକାଇଲାଟା ଜବର୍ ଅଇତେ ଇନାମେ ମିଲାଅଆଟଡ଼, ସେମନ୍ ଜିସୁକିରିସ୍‌ଟର୍ ବାଟେଅନି ସବୁ ଲକ୍ ତାର୍‌ଟାନେ ଦରମ୍ ବଲାଅ ଅଇବାଇ । ସେମନ୍ କିରିସ୍‌ଟର୍ ସଙ୍ଗ୍ ଜିତି କରି ଜିଉନା କାଉନା କରି ସାସନ୍ କର୍‌ବାଇ ।

୧୮ ଗଟେକ୍ ଲକ୍ ପାପ୍ ଜେନ୍ତି ଗୁଲାଅ ଲକ୍‌କେ ଡଣ୍ଡ୍ ଆନାଇଲା, ସେନ୍ତିସେ ଗଟେକ୍ ଲକ୍ ଦରମ୍ ଗୁଲାଅ ଲକ୍‌ପାଇ ମୁକ୍ତି ଆରି ନ ସାର୍‌ବା ଜିବନ୍ ଆନିଦେଲାଆଟେ । ୧୯ ଗଟେକ୍ ଲକ୍ ଆଦେସ୍ ନ ମାନିଲାର୍ ପାଇ ଜେନ୍ତିକି ସବୁ ଲକ୍ ପାପି ଅଇଲା, ସେନ୍ତି ଗଟେକ୍ ଲକ୍ ଆଦେସ୍ ମାନିଲେ ପରମେସରର୍ ମୁଆଟେ ଦରମ୍ ଲକ୍ ବଲାଅଅଇବାଇ ।

୨୦ ନିୟମ୍ ଚାଲିଲାର୍ ପାଇ କାରାପ୍ କାମ୍ ବଡ଼ଲା । ମାତର୍ ପାପ୍ ବଡ଼ି ବଡ଼ି ଗାଲାକେ ପରମେସରର୍ ଜିବନ୍‌ଦୁକାନି ମିସା ବେସି ବଡ଼ଲା । ୨୧ ପାପ୍ ଜେନ୍ତିକି ସବୁରପାଇ ମରନ୍‌ତ ଡଣ୍ଡ୍ ଆନିରଇଲା, ସେନ୍ତି



ପରମେସରର ଜିବନ୍‌ଦୁକାନି ମାପରୁ ଜିସୁ କିରିସ୍‌ଟର୍ ସାଇଜେ ଅନି ଆମ୍‌କେ ଦରମ୍ ବାଟେ ଡାକିନେଇ ନ ସାର୍‌ବା ଜିବନ୍ ଦେଇସି ।



ପାପରୁଲୀଗି ମରନ୍, ମାତର୍ କିରିସ୍‌ଟ ସଙ୍ଗ୍ ମିସ୍‌ଲାର୍‌ପାଇ ନ ସାର୍‌ବା ଜିବନ୍

୧ ସେନ୍ତିଆଲେ କାଇଟା କଉଁ ? ପରମେସରର ଜିବନ୍‌ଦୁକାନି ଆରି ଅଦିକ୍ ମିଲ୍‌ସି ବଲି ଆମେ କାଇ ଆରି ସେ ପାପେ ରଇକରି ଚଲାଚଲ୍‌ତି କରୁ କି ? ୨ ନାଇ କେବେ ନାଇ । ପାପ୍ କର୍‌ବା ବିସଇତେଇ ଆମେ ମରିଗାଲୁଆରୁ । ଆରି କେନ୍ତି ପାପ୍ କର୍‌ତେସେ ରଇରୁ ? ୩ ତମେ ଜାନାସ୍, ତୁବନ୍ ନେଲାକେ ଜିସୁକିରିସ୍‌ଟର୍ ସଙ୍ଗ୍ ମିସିକରି ଆମେ ତାର୍ ମରନେ ମିସା ମିସିଆରୁ । ୪ \*ସେଟାର୍‌ପାଇ ତୁବନ୍ ନେଲାପଟେ ଆମେ ତାର୍ ମରନେ ମିସି, ତାର୍ ସଙ୍ଗ୍ ତପି ଅଇଲୁଆରୁ । ସେ ଜେନ୍ତାରି ବାବାର୍ ଡାକ୍‌ପୁଟା ବପୁ ସଙ୍ଗ୍ ଆରିତରେକ୍ ଉଟ୍‌ଲା, ଆମେ ମିସା ସେନ୍ତାରି ନୁଆ ଜିବନ୍ ପାଇକରି ଚଲାଚଲ୍‌ତି କର୍‌ବାର୍ ଆଟେ ।

୫ କାଇକେବଇଲେ ଆମେ ମରନେ ମିସି ତାର୍ ସଙ୍ଗ୍ ଗଟେକ୍ ଅଇଲୁ ଆରୁ, ତାକେ ଆରିତରେକ୍ ଉଟ୍‌ବାତେଇ ମିସା, ତାର୍ ସଙ୍ଗ୍ ଗଟେକ୍ ଅଇକରି ରଇରୁ । ୬ ଆମେ ଜାନିଆରୁ, କିରିସ୍‌ଟର୍ ସଙ୍ଗ୍ କୁରସେ ଆମର୍ ପୁରନା ଜିବନ୍ ମରିଗାଲାଆଟେ । ତେଇଅନି ଆମର୍ ପାପର୍ ଚଲାଚଲ୍‌ତି କୁରୁପ୍‌ନାସ୍ ଅଇଲା ଆଟେ ଆରି ଆମେ ପାପର୍ ଗତିଅନି ମୁକ୍‌ଲିଆରୁ । ୭ କାଇକେବଇଲେ ମୁନୁସ୍ ମରିଗାଲେସେ, ପାପର୍ ବାନ୍‌ନେଅନି ରକିଆ ପାଇସି । ୮ ଆମେ ଜିସୁର୍ ସଙ୍ଗ୍ ମରିରଇଲାର୍ ପାଇ, ତାର୍ ସଙ୍ଗ୍ ମିସା ଜିବନ୍ ଅଇରୁ ବଲି ବିସବାସ୍ କଲୁନି । ୯ ଆମେ ଜାନୁ, କିରିସ୍‌ଟ ମଲାତେଇଅନି ଉଟ୍‌ଲାର୍‌ପାଇ, ସେ ଆରି କେବେ ମିସା ନ ମରେ । ତାର୍ ଉପ୍‌ରେ ଆରି କେବେ ମରନର୍ ସାସନ୍ ନ ଚାଲେ । ୧୦ ସେ ଜନ୍ ମରନ୍ ପାଇଲା, ତାର୍‌ଲୀଗି ପାପର୍ ବପୁତେଇଅନି ଏକାତରେକ୍ ଆମ୍‌କେ ମୁକ୍‌ଲାଇଲା । ସେ ଏବେ ଜନ୍ ଜିବନେ ଜିଇଲାନି, ସେଟା ପରମେସର୍ ସଙ୍ଗ୍ ମିସିକରି ରଇଲା ଜିବନ୍

☆ ୬:୪ ୬:୪ ରମିୟ ୨:୧୨

। ୧୧ ସେନ୍ତାରି ତମେ ମିସା ପାପେ ମରିଜାଇଆରୁ ବଲି ଏତାଆ । ତମେ ଏବେ କିରିସଟ ଜିସୁର ଜିବନେଅନି ପରମେସର୍ ସଙ୍ଗ୍ ମିସିଲାସ୍ ।

୧୨ ତମର ନସିଜିବା ଗାଗଡ଼ ଉପରେ ଆରି ପାପ୍ ଅଦିକାର ନ କର, ସେଟାର୍ପାଇ ଆମର୍ ଏ ଗାଗଡ଼ ମନ୍‌କର୍‌ବା କାରାପ୍ ବିସଇ ମାନିକରି ରୁଆନାଇ । ୧୩ କାରାପ୍ କାମର୍ ଲାଗି ଆମର୍ ଗାଗଡ଼ର କଣ୍ଟେକ୍ ବାଗ୍ ମିସା ପାପ୍ କରବାକେ ଦିଆସ୍‌ନାଇ । ମାତର୍ ଦରମ୍ କାମ୍ କରବାପାଇ ତମର୍ ଗୁଲାଇ ଗାଗଡ଼ ତାକେ ସର୍ପି ଦିଆସ୍ । ପରମେସର୍ ତମ୍‌କେ ମରନେଅନି ଜିବନ୍ କର ଆନ୍‌ଲାଆଟେ । ୧୪ କାଇକେ ବଇଲେ ପାପ୍ ତମର୍ ଉପରେ ସାସନ୍ ନ କର । ତମେ ଆରି ନିୟମର୍ ତଲେ ନାଇ । ମାତର୍ ପରମେସର୍‌ର ଜିବନ୍‌ଦୁକାନି ଅନି କାଇଟା ନ ଅଇତେ ଆଗାସ୍ ।

### ଦରମ୍ ଗତିଦାଙ୍ଗ୍‌ତା

୧୫ ସେନ୍ତାଆଲେ ଆମେ ନିୟମର୍ ତଲେ ନ ରଇ, ପରମେସର୍‌ର ଜିବନ୍‌ଦୁକାନି ପାଇଲୁ ଆରୁ ବଲି ପାପ୍ କରତେ ରଉଁ କି ? ନାଇ, କେବେ ମିସା ନଏଁ । ୧୬ ଏଲେ ମିସା ତମେ ଜାନିଆଗାସ୍, ଜଦି ତମେ କାକେ ତର୍ ତଲେ ଆକା ମୁଇ ବଲି କଇକରି ତାର୍ ପୁରାପୁରୁନ୍ କାତାମାନସା ବଇଲେ, ତମେ ତାର୍ ଗେନ୍‌ଲା ଗତିଦାଙ୍ଗ୍‌ତା । ଜଦି ପାପର୍ ଗତିଦାଙ୍ଗ୍‌ତା ଅଇସା, ଏଟାର୍ ଦସା ଅଇସି ମରନ୍, ଜଦି ଦରମର୍ ବାଟେ ଇଣ୍ଡସା, ବଇଲେ ନ ସାର୍‌ବା ଜିବନ୍ ପାଇସା । ୧୭ ମୁଇ ପରମେସର୍‌କେ ଦନିଅବାଦ୍ କଲିନି, ତମେ ଗଟେକ୍ ବେଲାଇ ପାପର୍ ଗତିଦାଙ୍ଗ୍‌ତା ଅଇରଇଲାସ୍ ମିସା, ଏବେ ଜନ୍ ସିକିଆ ଟାନେ ପାଇରଇବା ସଡ଼, ପୁରାପୁରୁନ୍ ମନ୍‌ଦେଇକରି ନାମ୍‌ଲାସ୍‌ନି । ୧୮ ଏବେ ତମେ ପାପେଅନି ମୁକ୍‌ଲିକରି ଦରମର୍ ଗତିଦାଙ୍ଗ୍‌ତା ଅଇଆଗାସ୍ । ୧୯ ଗଟେକ୍ ବେଲାଇ ତମେ ତମର୍ ଗୁଲାଇ ଗାଗଡ଼, ମନ୍, ପରାନ୍, ଅସୁକଲ୍ ଆରି କାରାପ୍ ଚଲାଚଲ୍‌ତି କରବାକେ ଗତିଦାଙ୍ଗ୍‌ତା ଅଇ ସର୍ପି ଦେଇରଇଲାସ୍ । ସେନ୍ତାରିସେ ସୁକଲ୍ ଆରି ଦରମ୍ ଚଲାଚଲ୍‌ତିର୍‌ପାଇ ଦରମର୍ ଲଗେ ନିଜ୍‌କେ ପୁରାପୁରୁନ୍ ସର୍ପିଦିଆସ୍ ।

୨୦ ତମେ ପାପର୍ ଗତିଦାଙ୍ଗ୍‌ତା ରଇଲାବେଲେ, ଦରମ୍ ଜିବନ୍ ଜିଇବାକେ ମୁର୍‌ମୁରା ଅଇରଇଲାସ୍ । ୨୧ ଏବେ ତମ୍‌କେ ଜନ୍

କାମ୍‌ମନ୍ କର୍ବାକେ ଲାଜ୍‌ଲାଗ୍‌ଲାନ୍, ସେଡ଼କିବେଲେ ସେ ସବୁ କର୍ତ୍ତେ ରଇଲାସ୍ । ତେଇଅନି ତମ୍‌କେ କାଜ୍ ଲାବ୍ ଅଇଲା ? ସେ ସବୁ କାମ୍‌ର୍ ଦସା ଅଇଲାନ୍ ମରନ୍ । <sup>୨୨</sup> ମାତର୍ ତମେ ଏବେ ପାପେଅନି ମୁକ୍‌ଲିକରି ପରମେସରର୍ ଗତିଦାଙ୍‌ଡା ଅଇଆଚାସ୍ । ଏଟାର୍ ଲାବ୍ ଅଇଲାନ୍, ପରମେସରର୍‌ତେଇ ପୁରାପୁରୁନ୍ ସଲଦ୍ । ଆରି ଇତିଅନି ମିଲ୍‌ବାଟା ଅଇଲାନ୍ ନ ସାର୍‌ବା ଜିବନ୍ । <sup>୨୩</sup> ପାପ୍ କାମ୍‌ର୍ ବୁଡ଼ି ଅଇଲାନ୍ ମରନ୍, ମାତର୍ ପରମେସର୍ ଜାଚାଇକରି ଦାନ୍ ଦେଇଆଚେ । ସେଟା ଆମ୍‌ର୍ ମାପୁରୁ ଜିସୁ କିରିସ୍‌ଟର୍ ସଙ୍ଗ୍ ମିସିକରି ମିଲାଇରଇବା ନ ସାର୍‌ବା ଜିବନ୍ ।



### ବିବାର୍ ଉଦାରନ୍

<sup>୧</sup> ଏ ବାଇବଇନିମନ୍, ଏବେ ମୁଇ ଜାଇଟା କଇବାକେ ଗାଲିନି, ସେଟା ଅଇଲାନ୍ ନିୟମ୍ । ନିୟମ୍ କାଇଟା ବଲି ତମେ ବୁଜିପାରାସ୍, ତାର୍ ଅରଡ଼ ମିସା ଜାନାସ୍ । ମୁନୁସ୍ ଅବକା ତାର୍ ଜିଇବା କାଇବା ଦିନ୍ ଜାକ ନିୟମ୍‌ର୍ ତଲେ ରଇସି । <sup>୨</sup> ବିବା ଅଇବା ବିସଇ ଦେକ୍‌ଲେ, ମୁନୁସ୍ ବଠି ରଇବା ଜାକ, ତାର୍ ମାଇଜି ସଙ୍ଗ୍ ବିବା ବାନ୍ଦନେ ବାନ୍ଦିଅଇରଇସି । ମାତର୍ ମୁନୁସ୍ ମରିଗାଲା ପଚେ ତାର୍ ମାଇଜି ଏ ନିୟମେଅନି ମୁକ୍‌ଲସି । <sup>୩</sup> ସେ ବଠି ରଇଲା ବେଲେ, ତାର୍ ମାଇଜି ଜଦି ବିନ୍ ମୁନୁସ୍‌କେ ବିବା ଅଇସି, ତେବେ ତାକେ ଚାଡ଼ରି ବଲି କଇବାଇ, ମାତର୍ ମୁନୁସ୍‌ର୍ ମରନ୍ ପଚେ ବିନ୍ ମୁନୁସ୍‌କେ ବିବା ଅଇଲେ, ତାକେ ଆରି ଚାଡ଼ରି ବଲି ନ କଅଡ଼ । ନିୟମ୍ ଇସାବେ ସେ ଗଟେକ୍ ମୁକ୍‌ଲି ରଇବା ମାଇଜି । <sup>୪</sup> ଏ ମର୍ ବାଇବଇନିମନ୍, ତମେ ମିସା ସମାନ୍ ସେନ୍ତାରିସେ । ନିୟମ୍ ଇସାବେ କିରିସ୍‌ଟର୍ ଗାଗ୍‌ତେ ମିସ୍‌ଲାର୍‌ପାଇ ତମେମିସା ମରିଆଚାସ୍ । ଏବେ ତମେ ତାର୍‌ଟା । ପରମେସର୍ ତାକେ ମରନେଅନି ଉଟାଇଆଚେ । ଜେନ୍ତାରିକି ତାର୍ ସେବାକାମେ ଆମେ ମିସା ମିସ୍‌ବୁ । <sup>୫</sup> ଜେତେଦିନ୍ ଜାକ ଆମେ ଗାଗ୍‌ଡ଼ ମନ୍ କଲା ଇସାବେ ବାନ୍ଦିଅଇରଇଲୁ, ନିୟମ୍ ଆମ୍‌କେ ନାଇ ବଲି କଇତେରଇଲା । ସେଟା ଆମ୍‌ର୍ ପାପ୍ ଅଦିକ୍ ଅଦିକ୍ କରାଇତେ ରଇଲା । ଆରି ଆମେ ମରନ୍ ବାଟେ ଜାଇତେରଇଲୁ । <sup>୬</sup> ଏବେ ଆମେ

ନିୟମର ସାସନେଅନି ମୁକଲ୍ଲୁ ଆରୁ, କାଇକେବଇଲେ ଜନ୍‌ଟା ଆମ୍ଭକେ ଦିନେକ୍ ବନ୍ଦି କରି ସଙ୍ଗାଇରଇଲା, ସେଟା ଆମ୍ଭର ବିତ୍ତରେ ମରିଗାଲାଆଚେ । ଆମେ ଆରି ଆଗ୍ରତୁର୍ ପାରା ଲେକାଅଇଲା ନିୟମ୍ ଇସାବେ ପର୍ମେସରକେ ସେବାକରୁ ନାଇ । ଏବେ ସୁକଲ୍ ଆତ୍ମା ଦେକାଇଲା ବାଟେ ଇଶ୍ଟୁନି ।

### ନିୟମ୍ ଆରି ପାପ୍

<sup>୭</sup> ତେବେ ଆମେ କାଇଟା ବଲି କଉଁ, ନିୟମେସେ ପାପ୍ ଆଚେ କି ? ସେଟା ସତଇସେ ନଏ । ମାତର୍ ପାପ୍ କାଇଟା ? ସେଟା, ମକେ ନିୟମ୍ ଜାନାଇଦେଲା ଆଚେ । “ବିନ୍ ଲକର୍ ଦିନ୍ସୁ ଲବାଇବାର୍ ନାଇ ।” ଏ ଆଦେସ୍ ଜଦି ନିୟମ୍‌ତେଇ ନ ରଇତା, ଲବାଇବାଟା କାଇଟା ବଲି ମୁଇ ନାଜାନତି ।<sup>୮</sup> ମାତର୍ ଉପରର୍ ଆଦେସର୍ ସୁବିଦାନେଇ ପାପ୍ ମର୍ ବିତ୍ତରେ ବିନ୍‌ବିନ୍ ରକାମର୍ କାରାପ୍ ମନ୍ କର୍ବାଟା ଜନ୍‌ମାଇଲା । ନିୟମ୍‌କେ ଚାଡ଼ିଦେଲେ ପାପ୍ ମଲା ସମାନ୍ ଆଚେ ।<sup>୯</sup> ଗଟେକ୍ ବେଲାଇ, ମୁଇ ନିୟମ୍ ନାଜାନି କରି ଜିଇତେ ରଇଲି, ନିୟମ୍ ଜାନ୍‌ଲା ପଚେ ପାପ୍ ପୁରଲା,<sup>୧୦</sup> ଆରି ମୁଇ ମରିଗାଲି । ଜନ୍ ନିୟମ୍ ଜିବନ୍ ଦେବାକେ ଟିକ୍ କରିରଇଲା, ସେଟା ମର୍ ପାଇ ମରନ୍ ଆନ୍‌ଲା ।<sup>୧୧</sup> କାଇକେବଇଲେ ନିୟମ୍‌ର ସୁବିଦା ନେଇ ମକେ ପାପ୍ ନାଡ଼ାଇଲା ଆରି ମରାଇଲା ।

<sup>୧୨</sup> ନିୟମ୍ ପର୍ମେସରଟାନେଅନି ଆଇଲାକେ ସୁକଲ୍ ଆଚେ । ତାର୍ ଆଦେସ୍ ସବୁ ସୁକଲ୍, ଟିକ୍ ଆରି ବେସି ନିକ ।<sup>୧୩</sup> ସେନ୍ତିଆଲେ ଜନ୍‌ଟା ନିକ, ସେଟା କାଇକେ ମର୍ ମରନ୍ ଆନ୍‌ବାଟା ଅଇରଇଲା ? ସେନ୍ତାରି କେବେ ନ ଅ । ମାତର୍ ପାପର୍ ମରନ୍ ଅଇଲା । ତାର୍ ନିୟମ୍, ଜେନ୍ତିକି ଆମ୍ଭର ପାପ୍ କେତେକ୍ କାରାପ୍ ଆଚେବଲି ତିସାଇବାକେ ପର୍ମେସରର୍ ଜଜ୍‌ନା ରଇଲା । ତେବର୍‌ପାଇ ତାର୍ ନିୟମ୍‌ରଲାଗି ଏଟା ସାଦନ୍ କଲା ।

### ମୁନ୍‌ସର୍ ମନେ ବୁଇମନିଆ

<sup>୧୪</sup> ଆମେ ଜାନ୍‌ ଜେ, ନିୟମ୍ ଆତ୍ମାଲ ଆଇସି, ମାତର୍ ମୁଇ ମର୍ ଗାଗଡ୍ ମନ୍ କଲାଟାକେ ମାନ୍‌ଲାରପାଇ ପାପର୍ ଗତିଦାଙ୍ଗ୍‌ତା ଅଇଲିଆଟି ।<sup>୧୫</sup> ✧ମୁଇ ଜନ୍‌ଟା କଲିନି, ସେଟା ବୁଜି ନାଇ, ମାତର୍

ଜନ୍ ନିକ କାମ୍ କରବାକେ ମନ୍ କଲିନି ସେଟାସେ କରିନାପାରଲିନି । ଆରି ଜନ୍ କାରାପ୍ କାମ୍ କରବାକେ ମୁଇ ମୁଲ୍‌କେ ମନ୍ କରି ନାଇ, ସେଟାସେ କଲିନି । ୧୭ ମାତର୍ ମୁଇ ମନ୍ ନ କରି ରଇବା କାମ୍ କରବାର ଲାଗି, ନିୟମ୍ ଟିକ୍ ଆଟେ ବଲି ମାନଲିନି । ୧୭ ସେଟାର ପାଇ ଏ ସବୁ ଜାକ କାମ୍ ମୁଇ କରି ନାଇ । ମର୍ ବିତ୍‌ରେ ରଇବା ପାପ୍‌ସେ ସେଟା କଲାନି । ୧୮ ମର୍ ଗାଗଡର୍ କାରାପ୍ ମନ୍ କରବାଟାନେଅନି କାଇମିସା ନିମାନ୍ ବିସଇ ନ ଆସେ ବଲି ମୁଇ ଜାନ୍‌ଲିନି । କାଇକେବଇଲେ ନିକ କାମ୍ କରବାକେ ମନ୍ ରଇଲେ ମିସା ସେଟା କରି ନାପାରଲିନି । ୧୯ ସେଟାର ପାଇ ଜନ୍ ନିକ କାମ୍ କରବାକେ ମୁଇ ମନ୍ କଲିନି, ସେ କାମ୍ ନ କରି, ଜନ୍ କାରାପ୍ କାମ୍ କରବାକେ ମୁଲ୍‌କେ ମନ୍ ନାଇ, ସେଟାସେ କଲିନି । ୨୦ ଜଦି ମୁଇ ମନ୍ ନ କରବାଟା କରିଲାଗି ଆତି, ସେନ୍ତାରୁଆଲେ ଜାଇଟା କଲିନି, ସେଟା ମୁଇ ସତଇସେ କରିନାଇ, ମର୍ ବିତ୍‌ରେ ରଇଲା ପାପ୍‌ସେ ସେଟା କଲାନି ।

୨୧ ଏଟା ମର୍ ବିତ୍‌ରେ ଗଟେକ୍ କାମ୍‌କରବା ନିୟମ୍ ବଲି ମନେ ଅଇଲାନି । ଜନ୍‌ଟା ନିକ, ସେଟା ମୁଇ କରବାକେ ଗାଲାବେଲେ, ଅବ୍‌କା କାରାପ୍ ବିସଇସେ କଲିନି । ୨୨ ପରମେସରର୍ ନିୟମ୍ ନାମ୍‌ବାକେ ମୁଇ ବେସି ମନ୍ କଲିନି, ୨୩ ମାତର୍ ମର୍ ମନ୍ କଲା ବିରଦେ ମର୍ ଗାଗଡ୍ ତେବାଇବା ବିଦି ସବୁବେଲେ ଜୁଇଦ୍ କଲାନି । ମର୍ ଗାଗଡ୍ କାମ୍‌କରତେ ରଇବା ସବୁ ପାପ୍ ମକେ ବନ୍ଦି କରି ସଙ୍ଗଇଲା ଆଟେ । ୨୪ କେତେ କରମ୍ ନଇଲା ଲକ୍ ମୁଇ ! ମରନର୍ ମୁର୍ବି ଜିକିନେବା ଏ ଗାଗଡର୍ ଚଲାଚଲ୍‌ତି ଅନି କେ ମକେ ମୁକ୍‌ଲାଇସି ? ୨୫ ପରମେସର୍ ଦନିଅବାଦ୍ ପାଅ ! ମାପୁରୁ ଜିସୁ କିରିସର୍‌ଟ୍ ଲାଗି ମୁଇ ଉଦାର୍ ପାଇଆତି ।

ତେବେ, ଏଟା ଅଇଲାନି ମର୍ କରମ୍ । ପରମେସରର୍ ନିୟମ୍ କାଲି ମୁଇ ମର୍ ମନେ ନାମି ପାରବି । ମାତର୍ ମର୍ ମୁନୁସ୍ ଇସାବର୍ ଚଲାଚଲ୍‌ତି ମକେ ପାପର୍ ଗତି ଦାଙ୍ଗ୍‌ତା ଅଇବାକେ ବାଦିଅ କଲାନି ।



ଆଡ଼ମାଇ ଜିବନ୍ ରଇବାଟା

୧ ତେବେ ଆମେ ଜେଡ଼କି ଲକ୍ ଜିସୁ କିରିସ୍ଟର୍ ସଙ୍ଗ୍ ମିସିକରି ଆରୁ, ଆମରପାଇ ଆରି ପରମେସରର୍ ତଣ୍ଟ ନାଇ । ୨ ଜିସୁ କିରିସ୍ଟର୍ ସଙ୍ଗ୍ ମିସଲାରପାଇ ସୁକଲ୍‌ଆଡ଼ମା ଆମକେ ନୁଆ ଜିବନ୍ ଦେଲାଆତେ । ତେଇଅନି, ପାପ୍ କଲେ ମରବା ନିୟମେଅନି, ଆମକେ ମୁକ୍‌ଲାଇ ଆତେ । ୩ ସେ ଆମର୍ ଗୁନଚଲନ୍ ନିକ ନ ରଇଲାକେ, ମସା ଦେଇରଇବା ରିଡିନିଡି ମାନୁ ନାଇ । ତେଇ ନିୟମ୍ ସାଇଜ କରି ନାପାରଲା । ମାତର୍ ସେଟା ପରମେସର୍ କରିଆତେ । ସେ ଆମର୍ ପାରା ପାପିମନର୍ ଗଟେକ୍ ଗାଗଡ଼ ଦାରାଇ ତାର୍ ପଅକେ ପାଟାଇଲା । ଆରି ସେ ଏନ୍ତାରିକରି ଆମର୍ ଉପରେ ରଇବା ପାପର୍ ସାସନ୍ କୁରୁପ୍‌ନାସ୍ କଲା । ୪ ଆମେ ଜେନ୍ତାରି କି ନିୟମର୍ ସବୁ ଆଦେସ୍ ମାନିକରି ରଇବୁ, ସେଟାର୍ ପାଇ ପରମେସର୍ ଏକ୍ତି କଲାଆତେ । ଆମେ ଏବେ ମୁନୁସର୍ ଚଲାଚଲ୍‌ତି ନ କରି ସୁକଲ୍‌ଆଡ଼ମାର୍ ବାଟେ ଇଣ୍ଟଲେସେ ଏକ୍ତି କରିଅଇସି । ୫ ଜନ୍ ଲକ୍‌ମନ୍ ମୁନୁସର୍ ଚଲାଚଲ୍‌ତି ଇସାବେ ଜିଉନା କାଉନା କରତେରଇବାଇ, ସେମନ୍ ନିଜର୍ ଗାଗଡ଼ର୍ ମନ୍ କରବାଟା ଚିନ୍ତା କରତେରଇବାଇ । ମାତର୍ ଜନ୍ ଲକ୍‌ମନ୍ ସୁକଲ୍‌ଆଡ଼ମାର୍ ଚାଲିନା ଇସାବେ କାମକରବାଇ, ସେମନ୍ ସୁକଲ୍‌ଆଡ଼ମା ଜନ୍ ବିସଇ କରବାକେ ମନ୍ କରାଇସି, ସେଟା କରବାଇ । ୬ ମୁନୁସର୍ ଚଲାଚଲ୍‌ତି ଇସାବେ ଗାଲେ ମରନର୍ ଦସା ଅଇସି, ସୁକଲ୍‌ଆଡ଼ମାର୍ ଚାଲିନା ଇସାବେ ଗାଲେ ଜିବନ୍ ଆରି ସାକ୍ତି ମିଲ୍‌ସି । ୭ ଜଦି ଗଟେକ୍ ଲକ୍ ତାର୍ ଗାଗଡ଼ର୍ ମନ୍ କଲା ଇସାବେ ଚଲାଚଲ୍‌ତି କରସି, ସେ ପରମେସରର୍ ବିରଦି ଅଇସି । କାଇକେ ବଇଲେ ସେ ପରମେସରର୍ ନିୟମ୍ ମାନେ ନାଇ, ସେ ସେଟା କରବାକେ ନାପାରେ । ୮ ଜନ୍ ଲକ୍‌ମନ୍ ମୁନୁସର୍ ଚଲାଚଲ୍‌ତି ଇସାବେ କାମ୍ କଲାଇନି, ସେମନ୍ ପରମେସର୍କେ ସାର୍‌ଦା କରିନାପାରଡ଼ ।

୯ ଜଦି ସତଇସେ ପରମେସରର୍ ସୁକଲ୍‌ଆଡ଼ମା ତମର୍ ବିଡ଼ରେ ଆତେ, ତେବେ ତମେ ଆରି ମୁନୁସର୍ ଚାଲିଚଲନ୍ ପାରା ଜିଉନାକାଉନା କରିନାପାରାସ୍, ମାତର୍ ଜିବନେ ସୁକଲ୍‌ ଆଡ଼ମାର୍ ଆଦେସ୍ ମାନସା । ଜାର୍‌ତେଇ କିରିସ୍ଟର୍ ଆଡ଼ମା ନାଇ, ସେ କେବେ ମିସା ତାକର୍ ଲକ୍ ଅଇନାପାରେ । ୧୦ ମାତର୍ ତମର୍

ବିତ୍ତରେ କିରିସ୍ତ ବାସାଅଇ ରଇସି ବଇଲେ, ତମର ଗାଗଡ଼ ପାପେ ନସ୍ତ ଅଇବାକେ ଜାଇତେ ରଇଲେ ମିସା, ସୁକଲ୍‌ଆଡ଼ମା ତମ୍‌କେ ଜିବନ୍ ଦାନ୍ ଦେଇସି । କାଇକେ ବଇଲେ ତମେ ପରମେସରର୍ ମୁଆଟେ ଦରମ୍ ଲକ୍ ବଲି ଏଜାଇଅଇ ଆଗାସ୍ । <sup>୧୧</sup> ☆ଜଦି ତମର ବିତ୍ତରେ ଜିସୁକେ ମଲାତେଇଅନି ଉଟାଇଲା ପରମେସରର୍ ଆଡ଼ମା ଆଟେ, ତେବେ ସେ ଆଡ଼ମାର୍ ସାଇଜ ସଙ୍ଗ୍, ପରମେସର୍ ଜେ କି କିରିସ୍ତକେ ମଲାତେଇଅନି ଉଟାଇଲା, ସେନ୍ତ୍ରସେ ତମର କୁଜ୍‌ଜିବା ଗାଗଡ଼ ମିସା ଜିବନ୍ କରସି ।

<sup>୧୨</sup> ତେବେ ଏ ବାଇବଇନିମନ୍, ଆମର୍ କାମ୍ ଅଇଲାନି, ମୁନୁସର୍ ଗୁନ୍‌ଚଲନ୍ ଇସାବେ ଜିଉନାକାଉନା ନ କରୁ । <sup>୧୩</sup> କାଇକେବଇଲେ ସେନ୍ତ୍ର କଲେ, ତମେ ମର୍ସା ମାତର୍ ସୁକଲ୍‌ଆଡ଼ମାର୍ ସାଇଜ ସଙ୍ଗ୍ ନିଜର୍ ପାପ୍‌ଚଲନ୍ ନସ୍ତ କରି ଆରି ପାପ୍ କାମ୍ ନ କରାସ୍, ତେବେସେ ତମେ ବୁଝସା । <sup>୧୪</sup> ଜନ୍ ଲକ୍‌ମନ୍ ପରମେସରର୍ ଆଡ଼ମା ଇସାବେ ଚାଲ୍‌ଲାଇନି, ସେମନ୍‌ସେ ପରମେସରର୍ ପିଲାଟକି । <sup>୧୫</sup> ☆କାଇକେବଇଲେ ପରମେସର୍ ଦେଲା ଆଡ଼ମା, ତମ୍‌କେ ଗତିଦାଙ୍ଗ୍‌ତା ଅଇବା ତେଇଅନି ମୁକ୍‌ଲାଇଲା ଆଟେ । ତମେ ଆରି ତର୍‌ବାର୍ ଲଡା ନାଇ । ମାତର୍ ସୁକଲ୍‌ଆଡ଼ମା ତମ୍‌କେ ପରମେସରର୍ ପିଲାଟକି କରିଆଟେ । ତାର୍ ବପୁ ଏତାଇକରି ଏବେ ଆମେ ପରମେସର୍‌କେ “ବାବା, ମର୍ ବାବା !” ବଲି ଡାକ୍‌ଲୁନି । <sup>୧୬</sup> ପରମେସରର୍ ଆଡ଼ମା ଆମର୍ ବିତ୍ତରର୍ ଆଡ଼ମା ସଙ୍ଗ୍ କର୍ ମିସାଇ ଆମ୍‌କେ ତାର୍ ପିଲାଟକି ବଲି ଜାନାଇଲାନି । <sup>୧୭</sup> କାଇକେବଇଲେ ଆମେ ପରମେସରର୍ ପିଲାଟକି । ତାର୍ ଲକ୍‌ମନ୍‌କେ କାତା ଦେଇରଇବା ଆସିର୍‌ବାଦେ ଆମେ ମିସ୍ତୁ । ଆରି କିରିସ୍ତର୍ ପାଇ ପରମେସର୍ ଜନ୍‌ଟା ଟୁଲାଇ ସଙ୍ଗ୍‌ଇଲା ଆଟେ, ତେଇ ମିସା ଆମର୍ ପାଇ ବାଟା ଆଟେ । ଜଦି ଆମେ ଜିସୁର୍ ଦୁକ୍‌ପାଇବାତେଇ ମିସ୍ତୁ ଆଟୁ, ତେବେ ତାର୍ ଡାକ୍‌ପୁଟା ପାଇବାତେଇ ମିସା ମିସ୍ତୁ ।

### ଡାକ୍‌ପୁଟାର୍ ଦିନ

☆ ୮:୧୧ ୮:୧୧ ୧୩ କରନ୍ତିୟ ୩:୧୭

☆ ୮:୧୫ ୮:୧୫ ଗାଲାତିୟ ୪:୫-୭

☆ ୮:୧୫

୮:୧୫ ମାର୍କ ୧୪:୩୭; ଗାଲାତିୟ ୪:୭

୧୮ ଜନ୍ ଡାକ୍‌ପୁଟାର ଦିନେ ଆମେ ମିସ୍‌ବାକେ ଗାଲୁନି, ଦେକ୍‌ଲେସରି ଏ ଜିବନେ ଅଇବା ଆମର୍ ଦୁକ୍ କସଟ୍ କିଟି ନାଇ । ୧୯ ପରମେସର୍ ତିଆର୍‌କଲା ସବୁଜାକ ଜାଗର୍‌ତା ସଙ୍ଗ୍ ସେ ଦିନ୍‌କେ ଜାଗି ଆତଡ୍ । ସେବେଲାଇ ପରମେସର୍ ତାର୍ ସଡ୍ ପିଲାଟକିମନ୍ କେ, ବଲି ଦେକାଇସି । ୨୦ କାଇକେବଇଲେ ପରମେସର୍ ତିଆର୍ କରିରଇବା ସବୁଜାକ, ଅବିସାପେ ପୁରୁନ୍ ଅଇଲାଆତେ । ଜନ୍‌ବାଟେ ଜିବାର୍ ରଇଲା ସେ ବାଟେ ନ ଜାଇ, ବିନ୍ ବାଟେ ଗାଲାଆତେ । ମାତର୍ ଏଟା ତାର୍ ନିଜର୍ ମନ୍ କଲା ଇସାବେ ଅଏନାଇ । ପରମେସର୍ ମନ୍ କଲାକେସେ ଅଇଲା । ଏଲେମିସା ତାର୍ ଆସା ରଇଲା, ୨୧ ଜେଡ୍‌କି ଗଟେକ୍ ଦିନେ କୁଇଜିବାଟାନେ ଅନି ମୁକ୍‌ଲିକରି ପରମେସରର୍ କୁଟୁମର୍ ଡାକ୍‌ପୁଟାଇ ମିସ୍‌ବୁ । ୨୨ ମାତର୍ ଏବେ ଜାକ ତିଆର୍‌ଅଇଲାଟା ସବୁ, ଗାଗ୍‌ଡେ ରଇଲା ମାଇଜି ନିକଅଇବା ଦୁକା ପାରା ଅଇକରି “ଆନା, ଆୟା !” ଅଇଲାନି । ୨୩ ✨ଆମେ, ପରମେସର୍ ଦେଲା ପର୍‌ତୁମର୍ ଦାନ୍ ପାରା ସୁକଲ୍‌ଆଡ଼ମା ପାଇଲୁଆରୁ, ଆମେ ମିସା ବିଡ୍‌ରେ ବିଡ୍‌ରେ “ଆନା, ଆୟା !” ଅଇଲୁନି । ଏଲେମିସା ପରମେସର୍ ଆମ୍‌କେ କୁଟୁମର୍ ଲକ୍ କରାଇକରି ପୁରାପୁରୁନ୍ ମୁକ୍‌ଲାଇସି ବଲି ଜାଗିକରି ଆରୁ । ୨୪ କାଇକେବଇଲେ ଆସା କଲାକେସେ ଆମେ ମୁକ୍ତି ପାଇଆରୁ । ମାତର୍ ଜାଇଟା ତିସ୍‌ଲାନି ସେଟାର୍ ପାଇ ଆସାକର୍‌ବାଟା, ସେଟା ସଡ଼ଇସେ ଆସା ରକ୍‌ବାଟା ନଏ । କେ କାଇ ତିସ୍‌ବାଟାକେ ଆସା କର୍‌ସି କି ? ନାଇ, ନ କରେ । ୨୫ ମାତର୍ ଆମେ ଜଡି ନ ତିସ୍‌ବା ବିସଇ ଆସାକର୍‌ବୁ, ତେବେ ଆମ୍‌କେ ସାଆସ୍ ସଙ୍ଗ୍ ଜାଗ୍‌ବାକେ ପଡ଼ସି ।

୨୬ ଆମ୍‌କେ ବପୁ ନାଇ, ମାତର୍ ସୁକଲ୍‌ଆଡ଼ମା ଆମ୍‌କେ ସାଇଜ କର୍‌ସି । କେଡ୍‌ରି ପାର୍‌ତନା କର୍‌ବାକେ ଅଇସି, ସେଟା ଆମେ ନାଜାନୁ । ସେଟାର୍ ପାଇ ଜନ୍‌ଟା ଆମେ କଇ ନାପାର୍‌ଲୁନି, ସେଟା ସୁକଲ୍‌ ଆଡ଼ମା ନିଜେ ଆମର୍‌ପାଇ “ଆନା, ଆୟା !” ଅଇକରି ପରମେସର୍‌କେ ଗୁଆରି କର୍‌ସି । ୨୭ ପରମେସର୍ ଆମର୍ ମନର୍ କାତା ଜାନେ । ସୁକଲ୍‌ଆଡ଼ମାର୍ ମନର୍ ଚିନ୍ତା ସେ ଜାନେ ।

✨ ୮:୨୩ ୮:୨୩ ୨ୟ କରନ୍ତିୟ ୫:୨-୪



କାଈକେବଇଲେ ସୁକଲ୍‌ଆତ୍‌ମା ପରମେସର୍‌ ମନ୍ କଲା ଇସାବେ, ତାକର୍‌ ଲକ୍‌ମନ୍‌ର୍ ପାଇ ଗୁଆରି କର୍‌ତେ ରଇସି ।

୨୮ ଜନ୍ ଲକ୍‌ମନ୍‌କେ ପରମେସର୍‌ ତାର୍‌ ମନ୍ କଲାଟା ପୁରାପୁରୁନ୍ କର୍‌ବାକେ ଡାକ୍‌ଲାଆଟେ, ଆରି ସେମନ୍ ତାକେ ଆଲାଦ୍ କଲାଇନି, ସେମନ୍‌ର୍ ପାଇ ସେ ସବୁ ମଙ୍‌ଲର୍ ବିସଇ କରାଇଦେଇସି । ୨୯ ଜନ୍ ଲକ୍‌ମନ୍‌କେ ପରମେସର୍‌ ବାଟ୍‌ଲା ଆଟେ, ସେମନ୍‌କେ ତାର୍‌ ପଅ ପାରା ଅଇବାକେ ଆଗ୍‌ତୁସେ ଟିକ୍ କରିଆଟେ । ସେକ୍ତିଆଲେ, ଗଟେକ୍ ବଡ଼ କୁଟୁମେ, ତାର୍‌ ପଅ ସେମନ୍‌ର୍ ବଡ଼ ବାଇ ଅଇସି । ୩୦ ଜନ୍ ଲକ୍‌ମନ୍‌ ଏନ୍ତାରି ବାଟିଅଇଲାଇ ଆଟତ୍, ସେମନ୍‌କେ ଡାକିଆଟେ । ସେ ଲକ୍‌ମନ୍‌କେ ପରମେସର୍‌ର୍ ମୁଆଟେ ଦରମ୍‌ଲକ୍ ବଲାଇ ଅଇ, ତାର୍‌ ଡାକ୍‌ପୁଟାଇ ମିସାଇ ଆଟତ୍ ।

### ପରମେସର୍‌ ଆଲାଦ୍

୩୧ ଏ ସବୁରତେଇଅନି ଆରି କାଈଟା କଇବାର୍ ଅଇସି ? ଜଦି ପରମେସର୍‌ ଆମର୍‌ ବାଟେ ଆଟେ, ତେବେ କେ ଆମର୍‌ ବିରଦି ଅଇପାର୍‌ସି ? ୩୨ ପରମେସର୍‌ କେବେମିସା ଆମର୍‌ ବିରଦି ନଏଁ, କାଈକେବଇଲେ ସେ ନିଜର୍‌ ପଅକେ ମିସା ରକିଆ ନ କରି ଆମର୍‌ ପାଇ ଦାନ୍ ଦେଇଆଟେ । ସେକ୍ତିଆଲେ ସେ ଆମର୍‌ ପାଇ କାଈ ସବୁ ବିସଇ ଦାନ୍ ନ ଦେଏ କି ? ୩୩ ପରମେସର୍‌ ବାଟ୍‌ଲା ଲକ୍‌ମନ୍‌କେ କେ ଦସିବଲି କଇପାର୍‌ସି ? ସେମନ୍‌କେ ସେ ନିଜେ କାଈ ଦସ୍ କରି ନ ରଇବା ଲକ୍ ବଲି ଉଡ଼ରା କଲାଆଟେ । ୩୪ ତେବେ ସେମନ୍‌କେ ଦସି ବଲି କେ କଇନାପାରତ୍ । କିରିସଟ୍ ଜିସୁ ତା କେବେ ନ କରେ, କାଈକେବଇଲେ ତାକେ ପରମେସର୍‌ ମଲାତେଇଅନି ଜିବନ୍ କରି ଉଟାଇଲାଆଟେ । ଏବେ ସେ ପରମେସର୍‌ର୍ ଉଜାବାଟେ ରଇକରି ଆମର୍‌ପାଇ ଗୁଆରି କରି ପାରତନା କଲାନ୍ । ୩୫ ସେନ୍ତାଆଲେ ତେବେ କେ ମିସା ଆମ୍‌କେ କିରିସଟ୍‌ର୍ ଆଲାଦେଅନି ବେଗ୍‌ଲାଇ ନାପାରତ୍ । ତୁକେ ରଇଲେ ମିସା, କସ୍‌ଟ୍ ପାଇକରି ରଇଲେ ମିସା, ନିନ୍‌ୟା ପାଇକରି ରଇଲେ ମିସା, କାକୁର୍‌ତି ଅଇକରି ରଇଲେ ମିସା, ବୁକେ ରଇଲେ ମିସା, ବିପଦେ ରଇଲେ ମିସା କି ମରାଇଲେ ମିସା ଏ ସବୁ ବେଗ୍‌ଲାଇ ନାପାରେ । ୩୬ ସାସ୍‌ତରେ ଲେକାଆଟେ,  
 “ତମର୍‌ଲାଗି ସବୁ ଦିନ୍ ଆମେ ମରନ୍‌ର୍ ମୁଆଟେ ଗାଲୁନି,

ପୁଞ୍ଜବାକେ ନେଲା ମେଣ୍ଟାପିଲା ପାରା ଆମେ ବାଟି ଅଇଲୁ ଆରୁ  
।”

୩୭ ଜେ ଆମ୍ଭକେ ଆଲାଦ୍ କଲାଇନି, ତାର୍ ସାଇଜ ସଙ୍ଗ୍ ଆମେ  
ଏ ସବୁର ଉପରେ ଜିତି ଆରୁ । ୩୮ ମୁଇ ସତଇସେ ଜାନଲିନି  
ଜେ, ପରମେସର୍ ଜନ୍ ବଡ଼ ଆଲାଦ୍ ଆମ୍ଭକେ ଦେକାଇଲାଆତେ,  
ସେ ଆଲାଦେଅନି କାଇଟା ମିସା ଆମ୍ଭକେ ବେଗ୍ଲାଇ ନାପାରେ ।  
ଆମେ ମରିଗାଲେ କି ଜିବନ୍ ରଇଲେ, ସରଗର୍ ଦୁଡ଼ ଅଅଡ଼ କି  
ସାସନ୍‌କାରିଆମନ୍, କି କାଇ ବିନ୍ ବପୁ, କି ଏବେ ଜନ୍‌ଟା ଅଇଲାନି,  
ପବ୍‌କେ ଜନ୍‌ଟା ଅଇସି, ୩୯ ଉପରର୍ ଦୁନିଆ କି ତଲର୍ ଦୁନିଆ,  
ଏ ଜଗତେ ତିଆର୍ ଅଇରଇବା କାଇ ବିସଇ ମିସା ପରମେସରର୍  
ବଡ଼ ଆଲାଦେ ଅନି ଆମ୍ଭକେ ବେଗ୍ଲାଇ ନାପାରେ । ଆମର୍ ମାପୁରୁ  
ଜିସୁକିରିସଟକେ ଦେଲା ପରମେସରର୍ ସେ ବଡ଼ ଆଲାଦେ ଅନି, ଏ  
ସବୁ ବିସଇ ଆମ୍ଭକେ ଦେକାଇଲା ଆତେ । ଏଟା ମୁଇ ଜାନିଆଟି ।



ପରମେସର୍ ଆରି ତାକର୍ ଲକ୍‌ମନ୍

୧ ମୁଇ ତମକେ ଗଟେକ୍ ସଡ଼କାତା କଇବି । ମୁଇ କିରିସଟର୍  
ଲକ୍, ଆରି ସୁକଲ୍ ଆଡ଼ମା ମର୍ ବିବେକ୍‌କେ ଡାକିନେଲାନି ।  
ସେଟାର୍‌ପାଇ ମିସା ମୁଇ ମିଟ୍ କଇନାଇ ବଲି ଜାନଲିନି । ୨ ଏଟା  
ମୁଇ କିରିସଟକେ ସାକିଦେଇ କଇଲିନି । ମୁଇ ଜେ କେତେକ୍  
ତେରେପେତେ ଆରି ନ ସାର୍‌ବା ଦୁକେ, ମର୍ ମନ୍ କେତେକ୍  
ଉଡୁକ୍ ଦୁଡୁକ୍ ଅଇଲାନି । ୩ କାଇକେବଇଲେ ମର୍ ରକଡ଼ ମାଉଁସ୍  
ରଇବା ଜିଉଦି ବାଇବଇନିମନ୍ କିରିସଟକେ ବିସ୍‌ବାସ୍ କରଡ଼ ନାଇ  
। ଜଦି ଏଟା ଅଇପାର୍‌ସି, ତେବେ ମୁଇ ମନ୍ କଲିନି, ନିଜେ ତାକର୍  
ପାଇ ପରମେସରର୍‌ଟାନେ ସାଇପ୍ ପାଇକରି, କିରିସଟର୍‌ତେଇ ଅନି  
ବେଗଲ୍‌ବି ବଲି । ୪ କାଇକେବଇଲେ ସେମନ୍ ପରମେସରର୍ ଲକ୍  
। ପରମେସର୍ ସେମନ୍‌କେ ନିଜର୍ ପିଲା କରି ବାଟିଆତେ । ସେ  
ସେମନ୍‌ର୍ ଲଗେ ନିଜର୍ ଡାକ୍‌ପୁଟା ଦେକାଇରଇଲା । ସେମନ୍‌ର୍  
ସଙ୍ଗ୍ ରାଜିନାମା କରି ସେମନ୍‌କେ ନିୟ୍‌ମ୍ ଦେଇରଇଲା । ସେମନ୍  
ସତଇସେ ପାର୍‌ତନା କର୍‌ବାଇ । ସେମନ୍‌କେ ପରମେସର୍ କାତା  
ଦେଇରଇଲା । ୫ ସେମନ୍ ଆମର୍ ଡାକ୍‌ପୁଟା ଜିଉଦି ଆନିଦାଦିମନ୍‌ର୍

ନାତିତିତିମନ୍ । ଆରି ମୁନୁସ୍ ରୁପ୍ ଦାରି କିରିସ୍ତ ତାକର୍ କୁଟୁମେଅନି ଜନମ୍ ଅଇଲା । ସବୁରଟାନେଅନି ବେସି ବପୁର୍ ପରମେସର୍ ଜୁଗେ ଜୁଗେ ଡାକ୍ପୁଟା ପାଅ, ଆମେନ୍ ।

<sup>୭</sup> ପରମେସର୍ ତାର୍ କାତା ଦେଇରଇଲାଟା ପୁରାପୁରୁନ୍ କରେନାଇ ବଲି ମୁଇ କଇନାଇ । କାଇକେବଇଲେ ଇସ୍ରାଏଲିୟମନର୍ କେତେଟା ନାତିତିତିମନ୍ ପରମେସରର୍ ଲକ୍ ନଅଡ୍, <sup>୭</sup> କି ଅବ୍ରାଆମର୍ କୁଟୁମର୍ ସବୁ ଲକ୍ ପରମେସରର୍ ପିଲାଟକି ନ ଅଅଡ୍ । ପରମେସର୍ ଅବ୍ରାଆମ୍‌କେ କଇରଇଲା, “ମୁଇ ତର୍ ଜନ୍ କୁଟୁମର୍ ବିସଇନେଇ କାତା ଦେଇରଇଲି, ସେମନ୍ ଇସାକର୍ ଗାନେଅନି ଜାଡ୍ ଅଇବାଇ ।”<sup>୮</sup> ଏଟାର୍ ଅରଡ୍ ଅଇଲାମି, ଗାଗଡ୍ ଦାରି ଜନମ୍ ଅଇବା ପିଲାଟକି ନାଇ । ଜେ କି ପରମେସରର୍ ପିଲାଟକିମନ୍ ଅଇବାଇ, ମାତର୍ ତାର୍ କାତା ଦେଇରଇବା ଇସାବେ ଜନମ୍ କରିରଇବା ପିଲାଟକିମନ୍ ତାର୍ ମୁଆଟେ ସତଇସେ ତାର୍ ପିଲାଟକି ବଲି ଏଜାଇ ଅଇବାଇ ।<sup>୯</sup> ପରମେସର୍ ଅବ୍ରାଆମ୍‌କେ ଏନ୍ତି କାତା ଦେଇରଇଲା, “ସମାନ୍ ଏ ଦିନେ ଆମେ ବାଉଡି ଆଇଲାବେଲେ, ସାରା ଗଟେକ୍ ପିଲା ଜନମ୍ ଦେଇରଇସି ।”

<sup>୧୦</sup> ଏ ପିଲା ଆମର୍ ପୁରବର୍ ଆନିଦାଦି ଇସାକ୍ ରଇଲା । ରିବିକାର୍ ଜଅଁଲା ପିଲାମନ୍‌ବିଡ୍‌ରେ ଅନି ଗଟେକ୍ ବାବା ଇସାକର୍‌ଟାନେଅନି ଅଇରଇଲା ।<sup>୧୧</sup> ପରମେସର୍ ରିବିକାକେ କାତା ଦେଇରଇଲା । ବଡ୍ ପିଲା ସାନ୍ ପିଲାର୍ ଗତିଦାଙ୍ଗ୍‌ତା ଅଇସି । ଜୁଁଲା ପିଲାମନ୍ ଜନମ୍ ନ ଅଇତେ, ଆରି ନିକ କାମ୍ କି ବାନିଆ କାମ୍ କର୍‌ବା ଆଗତୁ ଏଟା ପରମେସର୍ କଇରଇଲା । ଜନ୍ ପିଲାକେ ସେ ବାଟଲା, ପିଲା କରିରଇବା କାମର୍ ଲାଗି ଅଏନାଇ । ମାତର୍ ପରମେସର୍ କରିରଇବା ଜଜ୍‌ନାର୍ ପୁରାପୁରୁନ୍ ଅଇବାକେସେ ସେଟା ଅଇଲା ।<sup>୧୨</sup> ଏଟାର୍ ପାଇ ତାକେ ଏ କାତା କଇରଇଲା । “ବଡ୍ ପିଲା ସାନ୍ ପିଲାର୍ ଗତିଦାଙ୍ଗ୍‌ତା ଅଇସି ।”<sup>୧୩</sup> ସାସ୍‌ତରର୍ ବାକିଅ ଇସାବେ “ଜାକୁବ୍‌କେ ମୁଇ ଆଲାଦ୍ କଲି, ମାତର୍ ଏସକେ ନାଇ ।”

<sup>୧୪</sup> ସେନ୍ତାର୍ ଆଲେ କାଇଟା ବଲି କଉଁ, “ପରମେସର୍ ଅନିଆଇ କର୍‌ସି କି ? ନାଇ କେବେ ନ କରେ ।”<sup>୧୫</sup> କାଇକେବଇଲେ ସେ ପୁରବେ ମସାକେ କଇରଇଲା, “ମୁଇ ଜାକେ ମନ୍ କର୍‌ବି ତାକେ ଦୟା ଦେକାଇବି ଆରି ଜିବନ୍ ଦୁକାଇବି ।”<sup>୧୬</sup> ସେଟାର୍ ପାଇ

ପରମେସର ତାର ଲକ୍ଷ୍ମୀଙ୍କୁ ଦେବା ସବୁ ମଙ୍ଗଳ ଦାନ ଲକ୍ଷ୍ମୀଙ୍କୁ  
 ମନ କଲାନି କି ତାଙ୍କର ନିଜ କାମ କଲାନି ଅଥଚ ନାହିଁ । ମାତ୍ର  
 ପରମେସର ଜିବନ୍ ଦୁକାନିଗାନେଅନି ସେ ସେଟା ଅଇଲାଆତେ ।”  
 ୧୭ ସାସ୍ତର ଇସାବେ ପରମେସର ମିସରର ରାଜାଙ୍କେ କଇରଇଲା,  
 “ତକେ ଦେଇ ମର ବପୁ ଦେକାଇବି ଆରି ଗୁଲାଇ ଜଗତ୍ତକେ  
 ମର ଡାକ୍ତରୀ ଦେକାଇବାକେ ମୁଇ ତକେ ରାଜା କରିଆଟି ।”  
 ୧୮ ତେବର୍ପାଇ ପରମେସରର ମନକଲା ଇସାବେ, ସେ କାକେ  
 କାକେ ଦୟା ଦେକାଇସି ଆରି କାକେ କାକେ ମନ ଆର୍ ଅଇବାକେ  
 ଚାଡ଼ିଦେଇସି ।

### ପରମେସରର ରିସା ଆରି ଜିବନ୍‌ଦୁକାନି

୧୯ ତମର ବିତ୍ତରେଅନି କେ ଆଲେ ମକେ କଇବାଇ,  
 “ସେନ୍ତାଆଲେ, ପରମେସର କାଇକେ ଲକ୍ଷ୍ମୀଙ୍କୁ ଦସି କଲାନି  
 ? ପରମେସର ମନ କଲାଟା ବାଦ୍‌ଲାଇବା ଲକ୍ଷ୍ମୀ କେ ମିସା ଆତଡ଼  
 କି ?” ୨୦ ମାତ୍ର ମୁଇ ତମକେ କଇବି, “ଏ ମଇତର ପରମେସରର  
 କାତା ନାହିଁ ବଲ୍‌ବାକେ ତମେ କେ ?” ଗଟେକ୍ ଆଣ୍ଟି ମକେ  
 କାଇକେ ଏକ୍ତିକରି ଗଡ଼ଲୁସ୍ ବଲି କୁମାରକେ ପାଟାରି ନାପାରେ ।  
 ୨୧ ନିଜର ମନ କଲା ଇସାବେ ମାଟି ଚକଟିକରି ଆଣ୍ଟି ଗଟେକ୍ ତିଆର୍  
 କରବାକେ କୁମାରର ସବୁ ଅଦିକାର ଆତେ । ଗଟେକ୍ ଚକଟିଲା  
 ମାଟି ବେଲାଅନି ଦୁଇ ରକାମର ଆଣ୍ଟି ତିଆର୍ କରସି । ତେଇଅନି  
 ଗଟେକ୍‌କେ ପରବ୍ ଦିନମନକେ ବାଇବାଇ । ଆରି ଗଟେକ୍ ଉଜର୍  
 ଦିନମନକେ ବାଇବାଇ । ତେଇ ତାର ସବୁ ଅଦିକାର ଆତେ ।

୨୨ ପରମେସର ମିସା ଟିକ୍ ସେକ୍ତିସେ କଲାଆତେ । ଜେତେବେଲେ  
 ତାର ରିସା ଆରି ବପୁ ଦେକାଇବାକେ ମନ କରତେ ରଇଲା, ଜେତକି  
 ଲକ୍ଷ୍ମୀ ତାର ରିସାର ଆଣ୍ଟିତେଇ ଅଦ୍‌ରି ନସ୍ତ ଅଇବାକେ ରଇଲା,  
 ସେମନର ପାଇ ପରମେସର ବେସି ଜିବନ୍‌ଦୁକାଇଲା । ୨୩ ଆରି  
 ସେ ତାର ବେସି ବଡ଼ ଡାକ୍ତରୀ ଦେକାଇବାକେ ଆମ୍‌କେ ବେସି  
 ଜିବନ୍‌ଦୁକାଇଲା ଆତେ । ଆରି ଆମ୍‌କେ ବେସି ଆଗତୁ ସେ ବାଟି  
 ରଇଲା । ୨୪ ଜନ୍ ଲକ୍ଷ୍ମୀଙ୍କୁ ସେ ଡାକିଆତେ, ସେ ବିତ୍ତରେ ଆମେ  
 ମିସା ଆତୁ । ସେଟା ଅବକା ଜିଉଦିମନର ବିତ୍ତରେ ଅନି ନାହିଁ, ମାତ୍ର

ଜିଉଦି ନଅଇଲା ଲକ୍ଷ୍ମୀନର ବିତ୍ତରେଅନି ମିସା । ୨୫ ଏ ବିସଇନେଇ  
 ଅସେୟ ବଇତେଇ ପରମେସର କଇଆଟେ,  
 “ଜନ୍ ଲକ୍ଷ୍ମୀନ ଆମର ଲକ୍ଷ୍ମୀ ନ ରଇଲାଇ, ସେମନ୍‌କେ ମୁଇ ଏବେ  
 ନିଜର ଲକ୍ଷ୍ମୀ ଇସାବେ ଡାକ୍‌ବି ।

ଜନ୍ ଜାତିକେ ମୁଇ ଆଲାଦ୍ କରି ନ ରଇଲି, ତାକେ ‘ଆମର  
 ନିଜର’ ବଲି ଡାକ୍‌ବି ।”

୨୬ “ଜନ୍ ଜାଗାଇ ସେମନ୍‌କେ କଇରଇଲୁ,

“ ତମେ ଆମର ଲକ୍ଷ୍ମୀ ନୁଆଁସ୍ ”

“ତେଇ ସେମନ୍ ଜିବନ୍ ରଇବା ପରମେସରର୍ ପିଲାଟକି  
 ବଲାଇଅଇବାଇ ।”

୨୭ ଆରି ଇସ୍ରାଏଲ୍ ବିସଇନେଇ ଜିସାୟ କଇଲା ଆଟେ,  
 “ଇସ୍ରାଏଲ୍‌ୟମନ୍ ସମଦୁରର୍ ବାଲିପାରା ଅଇଲେ ମିସା,  
 ସେମନ୍‌ର ବିତ୍ତରେଅନି କେତେଲକ୍ଷେ ମୁକ୍ତି ପାଇବାଇ ।  
 ୨୮ କାଇକେବଇଲେ ମାପ୍‌ରୁ ଦାପ୍‌ରେସେ ଗୁଲାଇ ଜଗତର୍ ନିଆଇ  
 ବିଚାର୍ କରୁସି ।” ୨୯ ଜେଜ୍‌ଜି ଜିସାଇୟ ମିସା କଇରଇଲା,  
 “ସବୁରଟାନେଅନି ବପୁ ରଇବା ମାପ୍‌ରୁ, ଆମର କେତେଟା  
 ଲକ୍ଷ୍ମୀନକେ ରକିଆ କରି ନ ରଇଲେ, ଆମର ଦସା ସଦମ୍ ଆରି  
 ଗର୍ମାର୍ ଲକ୍ଷ୍ମୀନର ପାରା ଅଇତା ।”

**ଇସ୍ରାଏଲ୍‌ୟମନ୍‌ର ମୁକ୍ତି ପାଇ ପାଉଲର ପାର୍ତନା**

୩୦ ସେଟାର ପାଇ ଜିଉଦି ନଇଲାଲକ୍ଷ୍ମୀନର ବିସଇନେଇ ଏଟା  
 କଇପାରୁ, ସେମନ୍ ଦରମ୍ ଲକ୍ଷ୍ମୀ ବଲାଇ ଅଇବାକେ ମନ୍ କରି ନ  
 ରଇଲାଇ ମିସା, ସେମନ୍‌ର ବିସବାସ୍ ଲାଗି ସେମନ୍ ପର୍ମେସରର୍  
 ମୁଆଟେ ଦରମ୍‌ଲକ୍ଷ୍ମୀ ବଲାଇ ଅଇଲାଇ ଆଟଡ୍ । ୩୧ ମାତର୍  
 ଇସ୍ରାଏଲ୍‌ର ଲକ୍ଷ୍ମୀନ ନିୟମ୍ ଆନିକରି ପର୍ମେସରର୍ ମୁଆଟେ  
 ଦରମ୍ ଲକ୍ଷ୍ମୀ ବଲାଇ ଅଇବାକେ ବେସି ଚେସ୍‌ଟା କଲାଇ, ମାତର୍  
 ନାପାର୍‌ଲାଇ । ୩୨ କାଇକେ ନାପାର୍‌ଲାଇ ? କାଇକେବଇଲେ  
 ସେମନ୍ ପର୍ମେସର୍‌କେ ବିସବାସ୍ ନ କରତେ ନିୟମ୍ ମାନବାକେ  
 ଚେସ୍‌ଟା କଲାଇ ଆରି ତାର୍ ମୁଆଟେ ଦରମ୍ ବଲାଇ ଅଇବାକେ  
 ବାବ୍‌ଲାଇ । ଏଟାର୍‌ଲାଗି ବାଟେ ଗାଡିରଇବା ବଡ୍ ପାକ୍‌ନାଟାନେ  
 ଚେସ୍‌ଆଇଅଇଲା ଲକ୍ଷ୍ମୀନରପାରା ଅଇଗାଲା । ୩୩ ଜେଜ୍‌ଜି ସାସ୍‌ତରେ  
 ଲେକାଆଟେ,

ଦେକା ଆମେ ସିୟନେ ଗଟେକ୍ ବାଦାପାକାଇବା ପାକ୍‌ନା ଆରି

ଅଟକାଇବା ରାଜ୍ଞିପାକ୍ତନା ସଙ୍ଘାଇଲୁ ଆତୁ,  
ତେଇ ଲକ୍ଷ୍ମୀନ୍ ଜଟିଆଇ ଅଇ ଅଦର୍ବାଇ ।

ମାତର୍ ଜେ ତାକେ ବିସ୍ବାସ୍ କର୍ସି, ସେ କେବେ ମୁରମୁରା ନ ଅଏ  
।

### ୧୦

୧ ଏ ବାଇବଇନିମନ୍, ମର୍ ନିଜର୍ ଲକ୍ ମୁକ୍ତି ପାଅଡ୍ ବଲି  
ମୁଇ ବେସି ମନ୍ କଲିନି । ଆରି ଏଟାର୍ପାଇ ମୁଇ ସବୁବେଲେ  
ପରମେସର୍‌କେ ପାର୍ତନା କଲିନି । ୨ ସେମନ୍ ପରମେସର୍‌କେ  
ପୁରାପୁରୁନ୍ ବିସ୍ବାସ୍ କଲାଇନି । ମାତର୍ ତାକେ କେନ୍ତାରି ସାର୍‌ଦା  
କରାଇବାର୍ ଆଟେ, ସେଟା ନାଜାନଡ୍ । ୩ ଲକ୍ଷ୍ମୀନ୍‌କେ ନିଜର୍  
ମୁଆଟେ ଦରମ୍ ବଲାଇ ଅଇବାକେ, ପରମେସର୍ ଜନ୍ ଜଜ୍‌ନା କଲା,  
ସେଟା ସେମନ୍ ନିଚ୍‌ଲାଇ । ମାତର୍ ନିଜେ ଜଜ୍‌ନା ତିଆର୍ କରି,  
ନିୟମର୍ ବାଟେ ଇଣ୍ଡୁଲାଇ । ୪ କିରିସ୍‌ଟ ଆଇଲାତେଇଅନି ନିୟମ୍  
ମାନ୍‌ବାଟା କାଇ ମୁଲିଅ ନାଇ । ଜେନ୍ତାରି କି ତାକେସେ ବିସ୍ବାସ୍  
କଲେ, ମୁନୁସ୍ ପରମେସର୍‌ ମୁଆଟେ ଦରମ୍ ଲକ୍ ବଲି ଏଜାଇ  
ଅଇସି ।

#### ସବୁର୍ ପାଇ ମୁକ୍ତି

୫ ନିୟମ୍ ମାନ୍‌ବାତେଇଅନି ଦରମ୍‌ଲକ୍ ଅଇବା ବିସଇ ମସା  
ଲେକ୍‌ଲା ଆଟେ । ଜଦି ଜନ୍ ଲକ୍ଷ୍ମୀନ୍ ନିୟମର୍ ସବୁଜାକ ଆଦେସ୍  
ମାନ୍‌ବାଇ, ସେମନ୍ ବର୍‌ବାଇ । ୬ ମାତର୍ ଲକ୍ଷ୍ମୀନ୍ ବିସ୍ବାସ୍‌କରି  
ପରମେସର୍‌ ମୁଆଟେ ଦରମ୍ ବଲାଇଅଇବାଇ, ସେ ବିସଇ  
ସାସ୍‌ତରେ ଏନ୍ତି ଲେକାଆଟେ, କେ ସର୍‌ଗେ ଜାଇକରି କିରିସ୍‌ଟକେ  
ଉଡ୍‌ରାଇ ଆନ୍‌ସି ? ବଲି ମନେ ମନେ କଇ ଉଆନାଇ । ୭ ଆରି  
କୁଆନାଇ, କେ ପାତାଲେ ଜାଇକରି କିରିସ୍‌ଟକେ ମଲାଟାନେଅନି  
ଆରିତରେକ୍ ଉଟାଇ ଆନ୍‌ସି ? 「କାଇକେବଇଲେ ସାସ୍‌ତରେ ଏନ୍ତାରି  
ମସା ଲେକାଅଇଆଟେ, “ପରମେସର୍‌ କବର୍‌ ତମର୍ ଲଗେ, ତମର୍  
ଟଣ୍ଡେ ଆରି ମନେ ଆଟେ ।” ବିସ୍ବାସ୍ ବିସଇର୍ ଏ କବର୍‌ସେ ଆମେ  
ଜାନାଇଲୁନି । ୯ ଜଦି ତୁ, କିରିସ୍‌ଟସେ ମାପ୍‌ରୁ ବଲି କଇଲାସ୍‌ନି  
ଆରି ତୁ, ପରମେସର୍ ତାକେ ମଲାତେଇଅନି ଉଟାଇଲା ଆଟେ ବଲି  
ମନେ ମନେ ବିସ୍ବାସ୍ କଲାସ୍‌ନି, ସେନ୍ତାର୍ ଆଲେ ତମେ ମୁକ୍ତି

ପାଇଁ । ୧୦ ଆମର ବିସ୍‌ବାସର ଲାଗି ପରମେସ୍‌ବର ଆମ୍ଭଙ୍କ ଦରମା ଲକ୍ଷ୍ୟ ବଳି ଏକଲାନି । ଆରି ଚଣ୍ଡେ ଉଁ ବଳି ମାନିଆଇଲୁନିଜେ ଆମେ ମୁକ୍ତି ପାଇଥାଉ । ୧୧ ସାସ୍‌ତର ଇସାବେ, “କେ ମିସା ତାକେ ବିସ୍‌ବାସ୍ କରସି, ସେ ବିସ୍‌ବାସ୍ କରି କେବେ ଲାଜ୍ ନ ଅଏ ।” ୧୨ କାଇଟାବଇଲେ, ଜିଉଦି ଆରି ଜିଉଦି ନଇଲା ଲକ୍ଷ୍ୟ ବିତରେ କାଇ ସାନ୍ ବଡ଼ ନାଇ । ସେଟାର ପାଇ ସବୁ ଲକ୍ଷ୍ୟ ତା ଗଟେକ୍ ମାପୁରୁ, ଆରି ଜେଡ଼କି ଲକ୍ଷ୍ୟ ତାକେ ପାରତନା କରବାଇ ସେ ସବୁ ଲକ୍ଷ୍ୟକେ ମଙ୍ଗଲ୍ କରସି । ୧୩ କାଇକେବଇଲେ “ଜେ ମିସା ମାପୁରୁର ନାଉଁ ଦାରି ପାରତନା କରସି, ସେ ମୁକ୍ତି ପାଇସି ।”

୧୪ ମାତର ସେମନ୍ ତାକେ ବିସ୍‌ବାସ୍ ନ କଲେ, କେନ୍ତ୍ର ତାର ନାଉଁ ଦାରି ପାରତନା କରବାଇ ? ଆରି ତାର ବିସ୍‌ବର ସୁବ୍‌କବର ନ ସୁନିରଇଲେ କେନ୍ତ୍ର ବିସ୍‌ବାସ୍ କରବାଇ ? ଆରି ସେମନ୍‌କେ କବର ନ ସୁନାଇଲେ, କେନ୍ତ୍ର ସୁନ୍‌ବାଇ ? ୧୫ ଆରି କବର ନେଉକେ ନ ପାଟାଇଲେ କେନ୍ତ୍ର ଜାନାଇସି ? ଏ ବିସ୍‌ବ ସାସ୍‌ତରେ ଲେକା ଆତେ “ସୁବ୍‌କବର ଜାନାଉମନ୍ ଆଇବାଟା, କେତେ ସାରଦାର୍ କାତା !” ୧୬ ମାତର ସୁବ୍‌କବର ଜାନାଇବାଟାନେ ସବୁ ଲକ୍ଷ୍ୟ ମାନଡ଼ ନାଇ । ସେଟାର ପାଇ ଜିସାଇୟ ଲେକ୍‌ଲା ଆତେ, “ଏ ମାପୁରୁ, ଆମେ କଇଲା କାତା ସୁନିକରି କେ ବିସ୍‌ବାସ୍ କରଡ଼ନାଇ ।” ୧୭ ତେବର୍‌ପାଇ ସୁବ୍‌କବର ସୁନ୍‌ବାଟାନେଅନି ବିସ୍‌ବାସ୍ ଅଇସି । ଆରି କିରିସ୍‌ଟକେ ଜାନାଇବାଟା ସେ ସୁବ୍‌କବର ।

୧୮ ମାତର ମୁଇ ପାଟାରଲିନି ଇସରାଏଲର ଲକ୍ଷ୍ୟମନ୍ କାଇ, ସେ କବର ସୁନଡ଼ ନାଇ କି ? ବାଇଦରେ ସୁନିଆତଡ଼, କାଇକେବଇଲେ ଲେକାଆତେ,

“ଜାନାଉମନ୍‌ର ସବଦ୍ ଗୁଲାଇ ଜଗଡ଼ ତାବିଅଇଗାଲା ଆତେ, ସେମନ୍‌ର କାତା ରାଇଜ୍ ଚିଡ଼ଲା ଜାକ କେଟ୍‌ଲା ଆତେ ।”

୧୯ ଆରି ତରେକ୍ ମୁଇ ପାଟାରଲିନି, ଇସରାଏଲର ଲକ୍ଷ୍ୟମନ୍ ସେଟା ନିକସଙ୍ଗ୍ ବୁଜଡ଼ ନାଇ କି ? ଉଁ ବୁଜିଆତଡ଼ । କାଇକେବଇଲେ ବେସି ବରସ୍ ଆଗିତୁ ମସା ଉତର୍‌ଦେଇ ଲେକ୍‌ଲା ଆତେ,

ଗଟେକ୍ ନାଜାନୁଲା ଜାତିକେ ସାଇଜ୍ କରି

ମର ଲକ୍ଷ୍ୟମନ୍‌କେ ଇସା କରାଇବି ।

ସେନ୍ତ୍ର ଗଟେକ୍ ବକୁଆ ଜାତିର ଲକ୍ଷ୍ୟକେ ଦୟାକରି

ମୁଁ ସେମାନଙ୍କେ ରିସା କରାଇବି ।

୨୦ ଜିସାଇଅ ଆରି ମିସା ଡାଟ୍‌ସଙ୍ଗ କଇଲା ଆତେ,  
“ଜନ୍ ଲକ୍‌ମନ୍ ମକେ ନ କଜ୍‌ଡେରଇଲାଇ,  
ସେମନ୍ ମକେ ବେଟ୍ ପାଇଲାଇ,  
ଜନ୍ ଲକ୍‌ମନ୍ ମର୍ ବିସଇ ନ ପାଟାର୍‌ଡେ ରଇଲାଇ,  
ମୁଁ ନିଜେ ସେମନ୍‌କେ ଦେକାଇଅଇଲି ।”

୨୧ ମାତର୍ ପର୍‌ମେସର୍ ଇସ୍ରାଏଲର୍ ବିସଇ କଇଲାନି,  
“ଗୁଲାଇଦିନ୍ ସେମନ୍‌କେ ଡାକି ନେବାକେ ଆଡ୍ ଲାମାଇଲି, ମାତର୍  
ସେମନ୍ ମକେ ନ ମାନିକରି ବିରଦ୍ କଲାଇ ।”

## ୧୧

### ଇସ୍ରାଏଲ୍‌ମନର୍ ପାଇ ପରମେସର୍‌ର୍ ଦୟା

୧ \*ମୁଁ ଆରିତରେକ୍ ପାଟାର୍‌ଲିନି, “ଡେବେ ପରମେସର୍ ସବୁ  
ଜିଉଦି ଲକ୍‌ମନ୍‌କେ ଚାଡି ଦେଲା ଆତେ କି ? ନାଇ, କେବେ ନାଇ  
। ମୁଁ ମିସା ନିଜେ ସେମନର୍‌ପାରା ଗଟେକ୍ ଜିଉଦି, ଅବ୍ରାଆମ୍‌ଡା  
ମର୍ ଆନିଦାଦି ଆରି ମୁଁ ବେନ୍‌ଜାମିନ୍ କୁଟୁମର୍ ଲକ୍ ଅଇଆତି  
।” ୨ ପରମେସର୍ ମୁଲେଅନି ବାଟିରଇଲା ତାର୍ ଲକ୍‌ମନ୍‌କେ  
କେବେ ମିସା ଚାଡେନାଇ । ତମେ ସାସ୍‌ତରେ ପଡିଆଚାସ୍,  
ଏଲିଅ କେନ୍ତ୍ର ଇସ୍ରାଏଲ୍ ମନର୍ ପାପର୍ ଚଲାଚଲ୍‌ଡିର୍‌ପାଇ  
ପରମେସର୍‌କେ ପାର୍‌ତନା କରିରଇଲା, ୩ “ଏ ମାପୁରୁ, ସେମନ୍  
ତମର୍ ବବିସ୍‌ଡବ୍‌କ୍‌ତାମନ୍‌କେ ମରାଇଆତଡ୍ ଆରି ତମର୍ ପୁଜା  
କର୍‌ବା ବେଦି ସବୁ ବାଙ୍ଗାଇ ପାକାଇଲାଇ ଆତଡ୍ । ମୁଁ ଗଟେକ୍  
ଲକ୍‌ସେ ତକେ ପୁଜା କର୍‌ବାକେ ଆତି । ମକେ ମିସା ସେମନ୍  
ମାରିପାକାଇବାକେ ଚେସ୍‌ଟା କଲାଇନି ।” ୪ ପରମେସର୍ ଏଲିଅକେ  
କାଇବଲି କଇ ରଇଲା । “କାରାପ୍ ଦେବ୍‌ତା ବାଲ୍ ପୁଡ୍‌ଲାକେ ପୁଜା  
ନ କରିରଇବା ତମର୍ ବିଡ୍‌ରେଅନି ସାଡ୍ ଅଜାର୍ ଲକ୍‌କେ ମର୍  
ପାଇ ସଙ୍ଗଇ ଆତି ।” ୫ ଏବେ ସେ ସମାନ୍ ବେଲା ଗଟ୍‌ଲା ଆତେ  
। ପରମେସର୍ ଜିବନ୍ ଦୁକାଇ ଜନ୍ ଲକ୍‌ମନ୍‌କେ ବାଟି ରଇଲା,  
ସେମନର୍ ବିଡ୍‌ରେଅନି ଅଲପ୍ କେଡେଟା ଜିଉଦିମନ୍ ଅଗଲି ଆତଡ୍  
। ୬ ପରମେସର୍ ସେମନ୍‌କେ ତାର୍ ନିଜର୍ ଜିବନ୍ ଦୁକାଇକରି

☆ ୧୧:୧ ୧୧:୧ ପିଲିପିୟ ୩:୫



ବାବୁଲା ଆଚେ । ସେମନ୍ କର ରଇବା ନିକ କାମର ଲାଗି ନାଇ । ଜଦି ସେମନ୍ ନିକ କାମର ଲାଗି ସେମନ୍‌କେ ବାଚିରଇତା, ତାର ଜିବନ୍ ଦୁକାନି ସତ୍ ଜିବନ୍ ଦୁକାନି ନ ଅଇତା ।

<sup>୭</sup> ତେବେ କାଇଟା ଅଇଲା ? ଇସ୍ରାଏଲର ଲକ୍ମନ୍ ନିଜେ ଦରମ୍ ବଲାଅଇବାକେ ଗଟେକ୍ ବାଟ୍ କର୍ଲାଲ । ମାତର୍ ତେଇଅନି ଗଟେକ୍ ସାନ୍ ଦଲ୍‌କେସେ ପର୍ମେସର୍ ବାଚିରଇଲା । ଆରି ବାକିଲକ୍ମନ୍ କେ ମିସା ସେ ଡାକ୍ଲାକେ ସୁନତ୍ ନାଇ ।  
 「 ସାସ୍ତରର ବାକିଅ “ଜେଜ୍ରିକି ପର୍ମେସର୍ ସେମନ୍‌ର ଆକି ଆରି ମନ୍ ବାନ୍ ଦେଲା ଆଚେ । ଏବେ ଜାକ ସେମନ୍ ଦେକି ନାପାରଲାଜନି କି ସୁନି ନାପାରଲାଜନି ।”<sup>୮</sup> ସେମନ୍‌ର ବିସଇନେଇ ଦାଉଦ୍ ଲେକ୍ଲା ଆଚେ,

ସେମନ୍ ଆମେ ପାପ୍ କରୁନାଇ ବଲି ବୁଲ୍ ଚିନ୍ତା କରତ୍ । ସେମନ୍ ତେଇ ଅଦ୍‌ରି ଜାଅତ୍ ।

ଅଦ୍‌ରିଜାଇକରି ତଣ୍ଟ ପାଅତ୍ ।

<sup>୧୦</sup> ସେମନ୍ କାଶାକାଣି ଅଇକରି କାଇଟା ମିସା ଦେକି ନାପାରତ୍ । ସବୁବେଲେ ଦୁକ୍ କସ୍ଟ ପାଇପାଇ

ସେମନ୍‌ର ଆଁଟା ସବୁବେଲର୍ ପାଇ ବାକ୍ ଅଇଜାଅ ।

<sup>୧୧</sup> ମର ସଙ୍ଗର ଜିଉଦିମନ୍ ଜଟିଆଇ ଅଇକରି ଆଜିଜାଇ ନସ୍ଟ ଅଇଗାଲାଲ । ମାତର୍ ସେମନ୍‌କେ ବାଉଡାଇ ଆନ୍‌ବାକେ ପର୍ମେସର୍ ନାପାରେ ବଲି ବାବ୍‌ଲାସ୍‌ନି କି ? ନାଇ ସେ ପାରସି । ସେମନ୍ ପର୍ମେସରର ବାକିଅ ନିର୍ଲାକେ ଜିଉଦି ନ ଅଇଲା ଲକ୍ମନ୍ ମୁକ୍ତି ପାଇଲାଲ ଆଚତ୍ । ଜେନ୍ତାରି କି ଜିଉଦିମନ୍ ଇସା ଅଇଜିବାଇ ।<sup>୧୨</sup> ଜିଉଦିମନ୍‌ର ନ ମାନ୍‌ବାଟା, ଜଗତର୍ ବିନ୍ ଲକ୍ମନ୍‌କେ ବେସି ଆସିର୍ବାଦ୍ ମିଲ୍ଲା । ଜିଉଦିମନ୍ ପର୍ମେସର୍‌କେ ନ ମାନ୍‌ଲାକେ ଜିଉଦି ନ ଅଇଲା ଲକ୍ମନ୍ ତାରଟାନେ ଅନି ବତ୍ ଆସିର୍ବାଦ୍ ପାଇଲାଲ । ସେନ୍ତାର୍ ଆଲେ ପଟ୍‌କେ ବାଚି ରଇବା ସବୁ ଜିଉଦିମନ୍ ବିସ୍‌ବାସ୍ କଲେ, ସେ ଆସିର୍ବାଦ୍ କେତେକ୍ ଅଦିକ୍ ଅଇସି ।

**ଜିଉଦିନଇଲା ଲକ୍ମନ୍‌ର ମୁକ୍ତି**

<sup>୧୩</sup> ଜିଉଦି ନଇଲା ଲକ୍ମନ୍, ତମ୍‌କେ ମୁଇ କଇଲିନି, ପେରିତ୍‌ସିସ୍ ଇସାବେ ତମ୍‌ର ବିତ୍‌ରେ କାମ୍ କର୍ବାକେ ପର୍ମେସର୍ ମକେ

ବାବୁଲା ଆଚେ । ସେ ମକେ ଜେଡ଼କି କାମ୍ ଦେଲାଆଚେ, ସେଟା ମୁଇ ଜତନ୍‌ସଙ୍ଗ କଲିନି । <sup>୧୪</sup> ମୁଇ ତମ୍‌କେ ସାଇଜ କଲାବ୍‌ପାଇ, ମର୍ ସଙ୍ଗର୍ ଜିଉଦିମନ୍ ଇସା ଅଅଡ଼ ବଲି ମୁଇ ମନ୍ କଲିନି । କେ ଜାନେ ସେମାନର୍ ବିଡ଼ରେଅନି କେତେଲକ୍ ବିସ୍‌ବାସ୍ କରି ପର୍‌ମେସର୍‌ର୍ ଡଣ୍ଡେଅନି ରକିଆ ପାଇବାଇ । <sup>୧୫</sup> ଜିଉଦିମନ୍ ପର୍‌ମେସର୍‌ର୍ ଟାନେଅନି ବେଗଲ୍‌ଲାକେ, ଜିଉଦି ନ ଅଇଲା ଲକ୍‌ମନ୍ ତାର୍ ନିଜର୍ ଲକ୍ ଅଇପାର୍‌ଲାଇ । ସେନ୍ତାର୍‌ଆଲେ ଜିଉଦି ଲକ୍‌ମନ୍ ତାର୍‌ଟାନେ ଆରିତରେକ୍ ବାଉଡ଼ିଆଇଲେ, ଜିଉଦି ନ ଅଇଲା ଲକ୍‌ମନ୍‌କେ କେତେକ୍ ଅଦିକ୍ ଆସିର୍‌ବାଦ୍ ଅଇସି । ସେନ୍ତାରି ଅଇଲେ କେତେକ୍ ନିକ କରମ୍ ! ସବୁ ମଲାଲକ୍‌ମନ୍ ଜିବନ୍‌ଅଇ ଉଟ୍‌ଲାପାରା ଅଇସି ।

<sup>୧୬</sup> ରୁଟିତେଇଅନି କଣ୍ଡେକ୍ ପର୍‌ମେସର୍‌କେ ଦିଆଅଇରଇଲେ, ସବୁଜାକ ରୁଟି ଦିଆଅଇଲା ଆଚେ ବଲି ବାବ୍‌ବାର୍ । ଗଟେକ୍ ଗଟର୍ ଚେର୍ ସୁକଲ୍ ରଇଲେ, ତାର୍ କେନ୍ଦାକଡ଼ ମିସା ସୁକଲ୍ ଆଚେ ବଲି ବାବ୍‌ବାକେ ଅଇସି । <sup>୧୭</sup> ଇସରାଏଲ୍ କୁଟୁମର୍ ଲକ୍‌ମନ୍ ପର୍‌ମେସର୍‌ ଜତନ୍ କରିରଇବା ଗଟେକ୍ ଜିଡ଼ ଗଟର୍ ପାରା । ସେ ଗଟେଅନି କେତେଟା କେନ୍ଦି ବାଙ୍ଗାଇକରି ବନର୍ ଜିଡ଼ ଗଟର୍ କେନ୍ଦା ତେଇ, ଜଡ଼ିଆଚେ । ତମେ ଜିଉଦି ନ ଅଇଲା ଲକ୍‌ମନ୍ ସେ ବନର୍ ଜିଡ଼ ଗଟ୍ ପାରା । ଏବେ ତମେ ଜିଉଦିମନ୍‌ର୍ ତାଟ୍ ଆଡ଼ମାର୍ ଜିବନ୍‌ତେଇ ଜଡ଼ିଅଇଆଚାସ୍ । <sup>୧୮</sup> ସେଟାର୍ ପାଇ ତମେ ଜିଉଦିମନ୍‌ର୍ ଟାନେଅନି ବଡ଼ ବଲି ବାବାନାଇ । କାଇକେବଇଲେ ତମେ ଅବ୍‌କା କେନ୍ଦାସେ ଆରି କେନ୍ଦାମନ୍‌ର୍ କାଦି ଗଟର୍ ଚେରେଅନିସେ ଆଇସି । ଚେରର୍ କାଦି କେନ୍ଦାଇଅନି ନ ଆସେ ।

<sup>୧୯</sup> “ଉଁ ତମେ କଇପାରାସ୍, ଜିଉଦି ନ ଅଇଲା ଲକ୍‌ମନ୍ ଆମେସେ ବଡ଼ । କାଇକେବଇଲେ ଆମ୍‌କେ ଜଡ଼ବାକେ କେନ୍ଦାମନ୍ ବାଙ୍ଗାଇଲାଇ ।”

<sup>୨୦</sup> ତମ୍‌କେ ଜଡ଼ିଆଚେ, ସେଟା ସଡ଼ ସେ । ମାତର୍ ଜିଉଦିମନ୍ ବିସ୍‌ବାସ୍ ନ କଲାବ୍ ପାଇ ପର୍‌ମେସର୍‌ ସେମନ୍‌କେ କାଟିଦେଲାଆଚେ । ତମେ ବିସ୍‌ବାସ୍ କଲାକେସେ ତମ୍‌କେ ଜଡ଼ିଆଚେ । ସେଟାର୍‌ପାଇ ବଡ଼ପନ୍ ନ ଅଇ ଡରିକରି ରୁଆ । <sup>୨୧</sup> କାଇକେବଇଲେ ଜିଉଦି ଗଟେଅନି ନିଜେ ବାରଇଲା କେନ୍ଦା ପାରା ଜିଉଦିମନ୍‌କେ ପର୍‌ମେସର୍‌ ବାଙ୍ଗାଇଦେଲା, ତେବେ ବନେଅନି

ଆନି ଜିଉରଇବା କେନ୍ଦାମନ୍‌କେ କେତେକ୍ ଅଦିକ୍ ସେ ନ ବାଙ୍ଗାଏ ? ସେ କେନ୍ଦାମନ୍ ଅଇଲାନି, ତମେ ବିସ୍‌ବାସ୍ ନ କଲା ଜିଉଦି ନଇବା ଲକ୍‌ମନ୍ ।<sup>୨୭</sup> ଇତିଅନି ଆମେ ଦେକ୍‌ଲୁନି ପରମେସର୍ କେନ୍ଦ୍ରି ଆଲାଦ୍‌କାରିଆ, ଆରି ସାସନକାରି ମିସା ! ଜନ୍ ଲକ୍‌ମନ୍ ତାର୍ କାତା ମାନଡ୍ ନାଇ, ସେମନ୍‌କେ ଡଣ୍ଡ ଦେଲା । ମାତର୍ ତାର୍ ଦୟା ତମେ ତାଟ୍ ସଙ୍ଗ୍ ଦାରିରଇଲେ, ସେ ତମ୍‌କେ ଦୟା ଦେକାଇସି । ଜଦି ସେନ୍ତାରି ନ କଲେ, ତମ୍‌କେ ମିସା କାଟିଦେଇସି ।<sup>୨୮</sup> ଜଦି ଜିଉଦିମନ୍ ବିସ୍‌ବାସ୍ କଲେ, ଗଚର୍ ବୁନ୍ଦେ ରଇବା ତାକର୍ ଆଗର୍ ଜାଗାଇ ପରମେସର୍ ସେମନ୍‌କେ ବାଉଡାଇସି । କାଇକେବଇଲେ ସେଟା ପରମେସର୍‌ସେ କରିପାରେ ।<sup>୨୯</sup> ତମେ ଜିଉଦିନଇଲା ଲକ୍‌ମନ୍ ବନର୍ ଜିଡ୍ ଗଚର୍ ବାଙ୍ଗାଇଲା କେନ୍ଦାପାରା । ସବୁବେଲେ ଜଡ୍‌ବାଟାନେ କଲାପାରା ନ କରି, ପରମେସର୍ ନିଜେ ଜତନ୍ କର୍‌ବା ଗଚେ, ତମ୍‌କେ ଜଡ୍‌ଲାଆଚେ । ଜିଉଦିମନ୍ ସେ ନିଜେ ଜତନ୍ କରିରଇବା ଗଚର୍‌ପାରା । ସେନ୍ତାର୍‌ଆଲେ ଗଚ୍‌ବୁନ୍ଦେ ରଇବା କେନ୍ଦାମନ୍‌କେ ଆଗର୍ ଜାଗାଇ ନେଇ ଜଡ୍‌ବାକେ କେତେକ୍ ଅଦିକ୍ ସଅଜ୍ ଅଇସି ।

### ସବୁ ଲକ୍‌ର ପାଇ ପରମେସରର୍ ଆଲାଦ୍

<sup>୨୫</sup> ଏ ବାଇବଇନିମନ୍, ଏ ବିସଇଟାନେ ଗଚେକ୍ ଲୁଟିରଇଲା ସଡ୍ ତମେ ବୁଜା ବଲି ମୁଇ ମନ୍ କଲିନି । ଆମେ ଜିଉଦିମନ୍‌ର୍ ଟାନେଅନି ବଡ୍ ଆରୁ ବଲି ତମେ ବଡ୍‌ପନ୍ ନ ଅଇବାକେ, ଏଟା ତମ୍‌କେ ବୁଜାଇଲିନି । ଜିଉଦିମନ୍‌ର୍ କାତା ନ ମାନ୍‌ବାଟା, ବେସିଦିନ୍ ଜାକ ନ ରଏ । ମାତର୍ ଜେଡ୍‌କି ଜିଉଦି ନ ଅଇଲା ଲକ୍‌ମନ୍‌କେ ପରମେସର୍ ବାଡ୍‌ଲାଆଚେ, ସେମନ୍ ବିସ୍‌ବାସ୍ କର୍‌ବାଜାକ ସେଟା ରଇସି ।<sup>୨୬</sup> ତାର୍ ପଚେ ଇସ୍‌ରାଏଲିଅମନ୍ ସବୁ ଲକ୍ ଏ ସାସ୍‌ତରର୍ ଇସାବେ ରକିଆ ପାଇବାଇ ।

ମୁକ୍‌ତିକାରିଆ ଜିଉଦିମନ୍‌ର୍ ବିଡ୍‌ରେ ଅନି ଆଇସି,

ଆରି ତାର୍ ଲାଗି ଜାକୁବର୍ କୁଟୁମେଅନି ସବୁ ତାକର୍ କାରାପ୍ ଚଲାଚଲ୍‌ତି ଚାଡ୍‌ବାଇ ।

<sup>୨୭</sup> ସେମନ୍‌ର୍ ପାପ୍ ରଇବା ଚଲାଚଲ୍‌ତି ମୁଇ ଦାରିଜିବାବେଲେ, ସେମନ୍‌ର୍ ସଙ୍ଗ୍ ଏ ରାଜିନାମା କର୍‌ବି ।<sup>୨୮</sup> ସୁର୍ କବର୍ ବିସ୍‌ବାସ୍ ନ କରି ଜିଉଦିମନ୍ ପରମେସରର୍ ସଡ୍‌ରୁ ଅଇଗାଲାଇ ।

ଏନ୍ତାରି ଅଇଲାକେ ତମେ ଜିଉଦି ନ ଅଇଲା ଲକ୍ମନ୍ ମୁକ୍ତି ପାଇଲାସ୍ । ଏନ୍ତାରି ଅଇଲେମିସା ପରମେସର୍ ଜନ୍ କାତା ତାକର୍ ଆନିଦାଦିମନ୍‌କେ ଦେଇରଇଲା, ଆରି ସେମନ୍ ତାର୍ ବାଚିରଇବା ଲକ୍ମନ୍ ଅଇଲାକେ ମିସା, ସେମନ୍ ତାର୍ ଲକ୍ ଅଇଆରଡ୍ ।  
 ୨୯ କାଇକେବଇଲେ ପରମେସର୍ ଜନ୍ ଲକ୍ମନ୍‌କେ ବାଟିକରି ଆସିରବାଦ୍ କରସି, ସେ ଦାନ୍ ଦେବାକେ ଜାଗରତା ରଇସି ।  
 ୩୦ ଜିଉଦିନଇଲା ଲକ୍ମନ୍ ତମେ ପୁରବେ ପରମେସରର୍ କାତା ନ ମାନ୍‌ତେ ରଇଲାସ୍, ମାତର୍ ଜିଉଦିମନ୍ କାତା ନ ମାନ୍‌ଲାର୍ ପାଇ, ଏବେ ତମେ ପରମେସରର୍ ଜିବନ୍ ଦୁକାନିର୍ ଆଲାଦ୍ ପାଇଆଟାସ୍ ।  
 ୩୧ ଏଟା ଜିଉଦି ଅଇରଇବା ଲକ୍ମନ୍‌ର୍ ପାଇ ମିସା ସେନ୍ତାରିସେ । ଏବେ ସେମନ୍ କାତା ନ ମାନ୍‌ଲେ ମିସା, ତମ୍‌କେ ଜେନ୍ତାରି ପରମେସର୍ ଦୟା ଦେକାଇ ଆଲାଦ୍ କଲାଆଟେ, ସେ ପର୍‌କେ ସେମନ୍‌କେ ମିସା ଦୟା ଦେକାଇସି ।  
 ୩୨ ଗୁଲାଇ ମନସ୍ ଜାତି ତାର୍ କାତା ନ ମାନ୍‌ଲାକେ ତଣ୍ଟୁ ପାଇବାର୍ ଆଟେ ବଲି ପରମେସର୍ ଦେକାଇଲା ଆଟେ । ତାର୍ ଜିବନ୍ ଦୁକାଇଲାଟା ସବୁକେ ତିସିସି ବଲି ଏନ୍ତାରି କଲାଆଟେ ।

### ପରମେସରର୍ ଡାକ୍‌ପୁଟା

୩୩ ପରମେସରର୍ ଦୟା କେତେକ୍ ବଡ୍ ! ତାର୍ ଗିଆନ୍ ଆରି ବିଚାର୍ କରବା ବପୁ କେ ବୁଜିନାପାରଡ୍ ! ସେ ଜନ୍‌ଟା ଉଁ କରସି, ସେଟା ଲକ୍ମନ୍ ବୁଜିନାପାରଡ୍ । ସେ ଜନ୍ କାମ୍ କରବାକେ ଗାଲାନି, ସେଟା କେ ବାତାଇ ନାପାରଡ୍ ।  
 ୩୪ କାଇକେବଇଲେ ସାସ୍‌ତରେ ଏନ୍ତାରି ଲେକା ଅଇଲାଆଟେ ।

“ପରମେସର୍ ମନେ ଚିନ୍ତା କରବାଟା କେ ବୁଜି ପାରଡ୍ ?

ତାକେ କେ ମିସା ବୁଦିର୍ କାତା କଇବାକେ ଲଡାନାଇ ।”

୩୫ ତାକେ କାଇଟା ଉନା ନାଇ ।

ସେ ଆମର୍ ରୁଣି ଅଇବାକେ, ତାକେ କାଇଟା ଦେଇ ନାପାରୁ ।

୩୬ ☆ତିଆର୍ ଅଇଲା ସବୁ ବିସଇ ସେ ସେ ଚାଲାଇଲାନି । ଆରି ସବୁ ବିସଇ ତାର୍‌ପାଇସେ । ପରମେସର୍, କାଲେ କାଲେ ଜୁଗେ ଜୁଗେ, ତାର୍ ଡାକ୍‌ପୁଟା ଅ । ଆମେନ୍ !

# ୧୭

ପରମେସର୍‌କେ ସେବା କରବା ଜିବନ୍

<sup>୧</sup> ସେଟାର ପାଇ ଏ ବାଇବଇନିମନ୍, ଆମର ଉପରେ ପରମେସରର ବଡ଼ ଜିବନ୍‌ଦୁକାନିର ଲାଗି, ତମ୍ଭକେ ମୁଇ ବାବୁଜିଆ କଲିନି, ପରମେସରର ଲଗେ ଗଟେକ୍ ବଲି ଇସାବେ ନିଜରୁ ଜିବନ୍ ସର୍ପିଦିଆସ୍ । ଏନ୍ତାରି ବଲି ଅଇବାଟା ମରବାକେ ନର୍ସ୍, ମାତର ତାର ସେବାକରବାକେ ନିଜେ ସର୍ପି ଅଇବାଟା । ସେନ୍ତି ଅଇଲେ ପରମେସର ସାରଦା ଅଇସି । ପରମେସରକେ ଏ ରକାମ୍ ଉପାସନା କରବାର୍ ଆତେ । <sup>୨</sup>ଏ ଜଗତେ ରଇବା ଲକ୍‌ମନର ପାରା ଚଲାଚଲ୍‌ତି ଇସାବେ ଜିଉନା କାଉନା କରାନାଇ । ପରମେସର ତମର ମନ୍ ନୁଆକରି ବାଦ୍‌ଲାଅ । ସେନ୍ତି ଅଇଲେ ସେ ମନ୍ କରବାଟା ବୁଜିପାରସା । ଆରି ଜନ୍ ଚଲାଚଲ୍‌ତି ତାର ମୁଆଟେ ନିକ, ସିଦ୍ ଆରି ତାକେ ସାରଦା କରାଇସି, ସେଟା ଜାନି ପାରସା ।

<sup>୩</sup> ପରମେସର ମକେ ଜିବନ୍‌ଦୁକାଇକରି ଅଦିକାର ଦେଲାକେ ତମ୍ଭକେ ସବୁ ଲକ୍‌କେ କଇଲିନି, । କେ ମିସା ମୁଇ ବିନ୍ ଲକରଟାନେଅନି ବଡ଼ ବଲି ବାବାନାଇ । ପରମେସର ତମ୍ଭକେ ଜେଡ଼କି ବିସ୍‌ବାସ୍ ଦେଲାଆତେ, ସେଡ଼କି ନିଜକେ ବିଚାର କରା । <sup>୪</sup> ✽ଆମ୍‌କେ ସବୁଲକ୍‌କେ ଗାଗଡ଼େ ବିନ୍ ବିନ୍ ବାଗ୍ ଆତେ । ସେ ଗାଗଡ଼ର ବିନ୍ ବିନ୍ ବାଗର, ବିନ୍ ବିନ୍ କାମ୍ ଆତେ । <sup>୫</sup> ସେନ୍ତାରିସେ ଆମେ ଜେଡ଼କି ଲକ୍ କିରିସ୍‌ତେଇ ମିସ୍‌ଲୁଆରୁ, ଆମେ ତାର ଗାଗଡ଼ ଅଇଲୁଆରୁ । ଗାଗଡ଼ର ଆଡ଼ ଗଡ଼ ପାରା ଆମେ ସବୁ ଲକ୍ ମିସିଆରୁ । <sup>୬</sup> ✽ସେଟାର ପାଇ ପରମେସର ଆମ୍‌କେ ଜିବନ୍ ଦୁକାଇ ଜେଡ଼କି ବିନ୍ ବିନ୍ ବପୁର ଦାନ୍ ଦେଲା ଆତେ, ସେ ସବୁ ବପୁ ଆମର କାମେ ଲାଗାଇବାର ଆତେ । ଜଦି ଆମ୍‌କେ ପରମେସରର ବାକିଅ ଜାନାଇବା ବପୁ ଦେଲାଆତେ, ସେନ୍ତାରିଆଲେ ଆମେ ପାଇରଇବା ବିସ୍‌ବାସ୍ ଇସାବେ ସେଟା କରବାର ଆତେ । <sup>୭</sup> ଜଦି ଆମର ସଙ୍ଗର ଲକ୍‌କେ ସାଇଜ କରବା ବପୁ ଦେଲାଆତେ, ତେବେ ସେଟା କରଡ଼େ ରଇବାର ଆତେ । ଜଦି ପରମେସରର ବାକିଅ ସିକାଇବାଟା ଦେଲାଆତେ, ତେବେ ସେଟା ଜିଉନ୍ ସଙ୍ଗ କରବାର ଆତେ । <sup>୮</sup> ବିନ୍ ଲକ୍‌ମନକେ ସାରଦା କରାଇବାକେ ବପୁ ଦେଇରଇଲେ,

✽ ୧୭:୪ ୧୭:୪ ମମ କରନ୍ତିୟ ୧୭:୧୭ ✽ ୧୭:୭ ୧୭:୭ ମମ କରନ୍ତିୟ ୧୭:୪-୧୧

ସେଟା କରତେ ରଉଁ । ଅରକିଡ଼ ଲକ୍ମନକେ ଦାନ କରବା ବପୁ ଦେଇରଇଲେ, କାଇଟା ନ ବାଦିକରି ଦାନ କରୁ । ବିନ୍ ଲକ୍ମନ କାମକେ ଦେକାରକା କରବା ଅଦିକାର ଦେଇରଇଲେ, ନିଜେ ବେସି କାମ କରବାରୁଆଟେ । ଜଦି ବିନ୍ ଲକ୍ମନକେ ଦୟା ଦେକାଇବା ବପୁ ଦେଲାଆଟେ, ବିଜାର ନ ଅଇ ସାରଦା ସଙ୍ଗ କରବାରୁ ଆଟେ ।

<sup>୯</sup> ବିନ୍ ଲକ୍ମନକେ ଆଲାଦ୍ କରବାରୁ ଆଲେ କାଇ କପଟ୍ ରଇବାର ନାଇ । କାରାପ୍ ଚଲାଚଲ୍ତି ଗିନ୍ କରି, ସଡ଼ ଚଲାଚଲ୍ତି ଚାଡ଼ବାରୁ ନାଇ ।

<sup>୧୦</sup> ତମେ କିରିସ୍ତରଟାନେ ବାଇବଇନି ଅଇଲାର ପାଇ, ଗଟେକ୍ ଲକ୍ ଆରି ଗଟେକ୍ ଲକ୍କେ ଆଲାଦ୍ କରି ସନ୍ମାନ କରା । <sup>୧୧</sup> ନିସଡ଼ ନଅଇକରି ଲାଗିରୁଆ । ଜିବନ୍ ପରାନ୍ ଦେଇକରି ପର୍ମେସର୍କେ ସେବା କରା । <sup>୧୨</sup> ଆମ୍ଭକେ ରଇବା ଆସାରୁ ଲାଗି ଆମେ ସାରଦା ଅଉଁ । ଦୁକ୍ କସ୍ଟ ଆଇଲେ ମୁରଚିକରି ରଉଁ । ସବୁବେଲା ପର୍ମେସର୍କେ ପାରତନା କରତେ ରଉଁ । <sup>୧୩</sup> ଆମ୍ଭ ଟାନେ ରଇବା ଅରକିଡ଼ ବାଇବଇନିମନକେ ସାଇଜ କରୁ । ନ ଜାନ୍ବା ଲକ୍ମନ ଆମ୍ଭ ଗରେ ଆଇଲେ ଗତିଆ କରି ଡାକିନେଉଁ ।

<sup>୧୪</sup> \*ଜନ୍‌ଲକ୍ମନ ତମ୍ଭକେ ନିନ୍ଦା କରବାଇ, ସେମନକେ ପରମେସର୍ ଆସିରବାଦ୍ କରବଲି ପାରତନା କରା । ସେମନକେ ଆସିରବାଦ୍ କରା, ସାଇପ୍ ଦିଆସ୍ ନାଇ । <sup>୧୫</sup> ଜଦି ଗଟେକ୍ ଲକ୍କେ ସାରଦାରୁ ଦିନ୍ ଆଇଲାଆଟେ, ତେବେ, ତାର ସଙ୍ଗ ମିସି ସାରଦା କରା, ଜଦି ଦୁକ୍ ଦିନ୍ ଆସିରଇଲେ, ସେ ଲକ୍ମନ ସଙ୍ଗ ମିସି ଦୁକ୍ କରା । <sup>୧୬</sup> ସବୁ ଲକ୍କେ ସମାନ୍ ଇସାବେ ଆଲାଦ୍ ଦେକାଆ । ଆଁକାର ବୁଦି ଚାଡ଼ିକରି ସଲ୍‌ଦ୍ ଅଇ ସାନ୍ ସାନ୍ କାମ୍ କରବାକେ ମିସା ରାଜି ଉଆ । ନିଜୁକେ ଗିଆନ୍ ରଇବାଲକ୍ ବଲି ଦେକାଇ ଉଆନାଇ ।

<sup>୧୭</sup> କେ ତମ୍ଭକେ ଅନିଆଇ କଲେ, ତାକେ ବେର୍ ଦାରବାରୁ ନାଇ, ଜନ୍ ଚଲାଚଲ୍ତି ସବୁର୍ ମନକେ ଜାଇସି, ସେଟା କରତେରଇବାରୁ । <sup>୧୮</sup> ସବୁ ଲକ୍ମନ ସଙ୍ଗ୍ ସୁସାରେ ଜିଇବାକେ ଜେଡେକ୍ ପାରାସ୍, ସେଡେକ୍ ଚେସ୍ଟା କରା । <sup>୧୯</sup> ମର୍ ଆଲାଦ୍ ବାଇବଇନିମନ, ଜଦି କେ ତମ୍ଭକେ ଅନିଆଇ କଲେ, ତମେ ବେର୍ ଦାରାନାଇ,

☆ ୧୨:୧୪ ୧୨:୧୪ ମାଡିଉ ୫:୪୪; ଲୁକ୍ ୬:୨୮

କାଈକେବଇଲେ, ପରମେସରସେ ଡଣ୍ଡ ଦେଇସି । କାଈକେ ବଇଲେ  
ସାସ୍ତରେ ଲେକା ଆତେ । ମାପୁରୁ କଇଲାନି, “ମୁଇ ବେର୍ ଦାର୍ବି  
। ମୁଇ ଡଣ୍ଡ ଦେବି ।” <sup>୨୦</sup> ଏଲେ ସାସ୍ତରର୍ ଲେକା ଇସାବେ “ତମ୍ବ  
ସତ୍ତୁ ବୁକେ ରଇଲେ, ତାକେ କାଈବାକେ ଦିଆସ୍, ସସେ ରଇଲେ,  
ପାନି କୁଆ । ଏନ୍ତାକଲେ ସେ ତମ୍ବକେ କରରଇବା ଅନିଆଇର୍ ଲାଗି  
ବେସି ଲାଜ୍ ଅଇଜାଇସି ।” <sup>୨୧</sup> ମିର୍ କାମ୍ କରି ଆରିଜାଆ ନାଇ, ସବୁ  
ବିସଇ ସତ୍ ବାବେ କରି ଜିତିକରି ରୁଆ ।

## ୧୩

### ସାସନ୍ କରୁମନ୍‌କେ ନାମ୍‌ବାଟା

<sup>୧</sup> ସାସନ୍‌କାରିଆମନ୍‌ର କାତା ସବୁ ଲକ୍ ମାନ୍‌ବାକେ ବାଦିଅ,  
କାଈକେବଇଲେ ପରମେସର୍ ଆଦେସ୍ ନ ଦେଲେ କେ ମିସା  
ସାସନ୍ କର୍‌ବାକେ ଅଦିକାର୍ ନ ପାଏ । ଗାଦିଟାନେ ରଇଲା  
ସାସନ୍‌କାରିଆମନ୍‌କେ ପରମେସର୍ ବସାଇଲା ଆତେ । <sup>୨</sup> ସେଟାର୍  
ପାଇ ଜେ ଗାଦିଡେଇ ବସ୍‌ଲା ସାସନ୍‌କାରିଆମନ୍‌କେ ବିରଦ୍ କର୍‌ସି,  
ସେ ପରମେସର୍ ତିଆରକଲା ଗାଦିର ବିରଦ୍ କଲାନି । ଜେ ଏଟା  
କର୍‌ସି ସେ ପରମେସରର୍ ବିଚାରନା ଜାଗାଇ ଚିଆଅଇସି । <sup>୩</sup> ଆମର୍  
ଚଲାଚଲ୍‌ତି ସତ୍ ରଇଲେ ସାସନ୍‌କାରିଆକେ ଡର୍‌ବାର୍ ଦର୍‌କାର୍  
ନାଇ । କାରାପ୍ ରଇଲେ ଡର୍‌ବାର୍ ଆତେ । ସାସନ୍‌କାରିଆମନ୍‌କେ  
ତମେ ଡର୍‌ବାକେ ମନ୍ କରାସ୍ ନାଇ, ସେନ୍ତାର୍‌ଆଲେ ନିକ କାମ୍  
କରା ଆରି ସେମନ୍ ତମ୍‌କେ ନାମ୍‌ବାଇ । <sup>୪</sup> ସେମନ୍ ପରମେସରର୍  
ଗତିଦାଙ୍ଗ୍‌ତାମନ୍ ଆରି ତମ୍‌ର୍ ନିକପାଇସେ କାମ୍ କଲାଇନି । ତମେ  
ଜଦି କାରାପ୍ କାମ୍ କର୍‌ଡେରଇସା, ତେବେ ସେମନ୍‌କେ ଡର୍‌ବାର୍  
ଆତେ । କାଈକେବଇଲେ ତମ୍‌କେ ଡଣ୍ଡ ଦେବାକେ ତାକର୍ ଅଦିକାର୍  
ଆତେ । ସେମନ୍ ପରମେସରର୍ ଗତିଦାଙ୍ଗ୍‌ତା ଆରି ଜେଡକି ଲକ୍  
କାରାପ୍ କାମ୍ କର୍‌ଡେରଇବାଇ, ସେମନ୍‌କେ ପରମେସର୍ ଡଣ୍ଡ  
ଦେବାଇ । <sup>୫</sup> ସେଟାର୍‌ପାଇ ତମେ ସାସନ୍‌କାରିଆମନ୍‌ର କାତା  
ମାନ୍‌ବାର୍ ଆତେ । ଉଜେ ପରମେସରର୍ ଡଣ୍ଡ ଡରିକରି ନାଇ, ମାତର୍  
ନିଜର୍ ବୁଦିସଙ୍ଗ୍ ଏଟା ଚିକ୍ କାମ୍ ବଲି ଜାନିକରି ମିସା ଏଟା କର୍‌ବାର୍  
ଆତେ ।

୬ ✨ ଏଟାରପାଇ ତମେ ସିସ୍ତୁ ମିସା ଦେଲାସ୍ନି, କାଇକେବଇଲେ ସାସନ୍‌କାରିଆମନ୍ ଟିକ୍‌ସଙ୍ଗ୍ କାମ୍ କଲାବେଲେ ପରମେସରର୍ ସେବା କର୍ତ୍ତେ ରଇବାଇ । ୭ ସେଟାର ପାଇ ସେମନ୍ ଜେଡ୍‌କି ପାଇବାର୍ ଆଟେ ସେଟା ସେମନ୍‌କେ ଦେଇଦିଆସ୍ । ତମେ ସିସ୍ତୁ କି ଅତି ଜାଇଟା ଦେବାର୍ ଆଟେ, ସେଟା ବାନ୍ଦିଦିଆସ୍ ଆରି ସେମନ୍‌କେ ନାମିକରି ସନ୍‌ମାନ୍ କରା ।

### ନିଜର୍ ନିଜର୍ ବିତ୍ତରେ ଆଲାଦ୍

୮ ନିଜର୍ ନିଜର୍ ବିତ୍ତରେ ଆଲାଦ୍ କରାକରି ଅଇବାଟା ଚାଡ଼ି ଆରି କାଇ ବିସଇ କାର୍ ଲଗେ ମିସା ଉଦାର୍ ଉଆ ନାଇ । ଜେ ଏଟା ବିନ୍ ଲକର୍‌ପାଇ କର୍‌ସି, ସେ ନିୟମ୍ ମାନ୍‌ସି । ୯ ନିୟମ୍‌ତେଇ ଲେକାଅଇଲା ଆଟେ, “ବେସିଆ କାମ୍ କର୍‌ବାର୍ ନାଇ, ନର୍ ମାର୍‌ବାର୍ ନାଇ, ଚରାଇବାର୍ ନାଇ, ବିନ୍ ଲକର୍ ଦିନ୍‌ସୁ ଲବାଇବାର୍ ନାଇ ।” ନିଜ୍‌କେ ଆଲାଦ୍ କଲାପାରା ବିନ୍ ଲକ୍‌ମନ୍‌କେ ଆଲାଦ୍ କରା । ଏ ଗଟେକ୍ ଆଦେସ୍ ଜଦି ତମେ ମାନ୍‌ସା, ନିୟମେ ରଇବା ସବୁ ଆଦେସ୍ ମାନ୍‌ଲାପାରା ଅଇସି । ୧୦ କାଇକେବଇଲେ ତମେ ଗଟେକ୍ ଲକ୍‌କେ ଆଲାଦ୍ କର୍ତ୍ତେ ରଇଲେ, କେବେ ମିସା ତାକେ ଅନିଆଇ ନ କରାସ୍ । ଆରି ତମେ ଜଦି ସେମନ୍‌କେ ଆଲାଦ୍ କର୍‌ସାବଇଲେ, ସବୁ ନିୟମ୍ ମାନିକରିଆଚାସ୍ ।

୧୧ ଏବେ ତମେ ଏଟା କର୍‌ବାର୍ ଆଟେ । କାଇକେବଇଲେ ବେଲା କେଟ୍‌ଲାଆଟେ । ଆମେ ସଇରଇବା ଲକର୍‌ପାରା ନ ଅଇକରି ଚେତା ଅଇ ଜାଗ୍‌ରଡ୍ ଅଇରଇବାର୍ ଆଟେ । ବିସ୍‌ବାସ୍ କର୍‌ବା ବେଲା ଆଗ୍‌ତୁ ରଇଲେ ମିସା ଆମର୍ ମୁକ୍ତି ପାଇବା ଦିନ୍ ଲଗେ ଅଇଆଟେ । ୧୨ ରାତି ଦାପ୍‌ରେ ସାରିଜାଇସିବେ, ସାକାଲ୍ ଅଇବାକେ ଗାଲାମି । ସେଟାରପାଇ ଆସା, ରାତିଆ କିରିରଇବା କାରାପ୍ କାମ୍ ସବୁ ଚାଡ଼ିକରି, ଉଜ୍‌ଲେ ଜୁଇଦ୍ କର୍‌ବା ଆଡ୍‌ଆଡ୍‌ଆର୍ ଦାରୁ । ୧୩ ବେସିଆମନ୍‌ର୍ ଦଲେ ମିସ୍‌ବାର୍ ନାଇ, ମାଡୁଆଲ୍‌ମନ୍‌ର୍ ଦଲେ ଜିବାର୍ ନାଇ, ବିନ୍ ମାଇଜିମନ୍‌ର୍ ସଙ୍ଗ୍ ମିସିରଇବାର୍ ନାଇ, ଲାଗାଜଡା ଅଇବାର୍ ନାଇ ଆରି ଛିସା ଅଇବାର୍ ନାଇ । ଆମେ ଜେଡ୍‌କି ଲକ୍ ଉଜ୍‌ଲେ ରଇଆଟୁ, ଟିକ୍ ସଙ୍ଗ୍ ଚଲାଚଲ୍‌ତି କରୁ ।

✨ ୧୩:୭ ୧୩:୭ ମାଡିଉ ୨୨:୨୧; ମାର୍‌କ ୧୨:୧୭; ଲୁକ୍ ୨୦:୨୫



୧୪ ମାପରୁ ଜିସୁକିରିସ୍‌ଟର ଆଡ଼ିଆଡ଼ିଆର ଦାରି ରଞ୍ଜି । ଆରି ଆମର ପାପର ଗୁନଟଲନ୍ ନ ମାନିକରି ଆମେ ମନ୍ କରବାଟା ପୁରାପୁରୁନ୍ ନ କରୁ ।

# ୧୪

## ବିନ୍‌ଲକର ଦସ୍ ଦାରାନାଇ

୧ \*ଜଦି କେତେକ୍ ଲକ୍ କିରିସ୍‌ଟକେ ବିସ୍‌ବାସ୍ କଲାଜନ୍ତି, ମାତରୁ ତାକର ବିସ୍‌ବାସ୍ ଡାଁଟନାଇ, ସେମନ୍‌କେ ମିସା ତାକି ମିସାଆ । ମାତରୁ ସେମନ୍‌ର ଚିନ୍ତା କରବାଟା ତମରୁପାରା ନ ରଇଲେ, ତାକର ସଙ୍ଗ୍ ଦଦାପେଲା ଉଆ ନାଇ । ୨ କେତେକ୍ ଲକ୍‌ର ବିସ୍‌ବାସ୍, ଜେନ୍ତୁ ରକାମର କାଦିକେ ମିସା ଡିଁ ବଲି କଇବାଇ । ମାତରୁ ଜାର ବିସ୍‌ବାସ୍ ଏବେଜାକ ଡାଁଟନାଇ ସେମନ୍ କାଇ ମାଉସ୍ ମିସା କାଇବାର ନଏଁ, ଅବ୍‌କା ସାଗ୍‌ତାଲ୍‌ସେ କାଇବାଇ । ୩ ଜନ୍ ଲକ୍‌ମନ୍ ସବୁଜାକ କାଇବାଇ, ସେମନ୍ ଆମେ ଅବ୍‌କା ସାଗ୍‌ତାଲ୍ କାଇବା ଲକ୍‌ରଟାନେଅନ୍ତି ବଡ଼ ବଲି ବାବ୍‌ବାର ନାଇ । ସେନ୍ତାରିସେ ଜନ୍‌ଲକ୍‌ମନ୍ ଅବ୍‌କା ସାଗ୍‌ତାଲ୍‌ସେ କାଇବାଇ, ସେମନ୍ ଆମେ ସବୁରକାମର କାଦିକାଇବା ଲକ୍‌ମନ୍‌ରଟାନେଅନ୍ତି ବଡ଼ ବଲି ବାବ୍‌ବାରନାଇ । କାଇକେବଇଲେ ପରମେସର୍ ଦୁଇ ଦଲର୍ ଲକ୍‌ମନ୍‌କେ ମିସା ବାବ୍‌ଲା ଆଟେ । ୪ ବିନ୍ ଲକ୍‌ର ଦାଈଁତାମନ୍‌କେ ଆମେ ବିଟାର କରବାର ନାଇ । କାଇକେବଇଲେ ସେମନ୍ କରବା କାମ୍ କଲାଇ ଆଟଡ଼ କି ନାଇ ବଲି ତାକର ସାଉକାର ଦେକ୍‌ସି । ଆରି ପରମେସର୍ ଜନ୍‌ଟା ମନ୍ କଲାନ୍ତି, ସେମନ୍ ସେଟା କରବାଇ । କାଇକେବଇଲେ ପରମେସର୍ ସେମନ୍‌କେ ସାଇଜ କଲାନ୍ତି ।

\* ସେନ୍ତାରିସେ, ବିନ୍‌ଦିନ୍ ମନରଟାନେଅନ୍ତି କନ୍‌ଆଲେ ଗଟେକ୍‌ଦିନ୍ ସୁବ୍‌ଦିନ୍ ବଲି କେତେ ଲକ୍ ବାବ୍‌ବାଇ । ବିନ୍ ଲକ୍‌ମନ୍ ସବୁଦିନ୍ ସମାନ୍ ବଲି ବାବ୍‌ବାଇ । କନ୍‌ଟା ଟିକ୍ ରଇସି ବଲି ଲକ୍‌ମନ୍ ନିଜେ ନିଜେ ବିଟାର କରବାର ଆଟେ । ୨ ଜନ୍ ଲକ୍‌ମନ୍ ବିନ୍‌ଦିନ୍ ମନରଟାନେଅନ୍ତି ଗଟେକ୍ ଦିନ୍ ସୁବ୍ ବଲି ବାବ୍‌ବାଇ, ସେମନ୍ ପରମେସର୍‌କେ ସାର୍‌ଦା କରାଇବାକେ ସେନ୍ତାରି ବାବ୍‌ବାଇ । ସେନ୍ତାରିସେ, ଜନ୍‌ଲକ୍‌ମନ୍ ସବୁ ରକାମ୍ କାଦି କାଇବାଇ, ସେଟା

☆ ୧୪:୧ ୧୪:୧ ରମିୟ ୨:୧୭

ପରମେସରକେ ସାର୍ଦ୍ଦା କରାଇବାକେ କର୍ବାଇ ଆରି ସେଟାର୍‌ପାଇ ତାକେ ଦନିଅବାଦ୍ ଦେବାଇ । ଆରି ଜନ୍‌ଲକ୍‌ମନ୍ ଅବ୍‌କା ସାଗ୍‌ଡାଲ୍ କାଇବାଇ, ସେମନ୍ ସେଟା ପରମେସର୍ ସାର୍ଦ୍ଦା ଅଇସି ବଲି କାଇଲାଇନି ଆରି ସେମନ୍ ମିସା ତାକେ ଦନିଅବାଦ୍ ଦେଲାଇନି । <sup>୭</sup> ଆମର୍ ବିତ୍‌ରେ ସବୁଲକ୍ ଦର୍‌ତନିତେଇ ବ୍‌ଟିରଇଲେ କି ମରିଗାଲେ ମିସା ପରମେସରର୍ । <sup>୮</sup> ଆମେ ବ୍‌ଟିରଇଲେ ପରମେସରର୍ ପାଇ, ମରିଗାଲେମିସା ସେନ୍ତାରିସେ । ତେବର୍‌ପାଇ ଆମେ ବ୍‌ଟିରଇଲେ କି ମରିଗାଲେ ପରମେସରର୍ ପାଇସେ । <sup>୯</sup> କାଇକେବଇଲେ କିରିସ୍‌ଟ ମରିଗାଲା ଆରି ମଲାତେଇଅନି ଆରିତରେକ୍ ଉର୍‌ଲା । ସେଟାର୍‌ପାଇ ସେ ମଲାଲକ୍‌ମନ୍‌କେ ଆରି ଜିବନ୍ ରଇଲା ଲକ୍‌ମନ୍‌କେ ସାସନ୍ କର୍‌ସି । <sup>୧୦</sup> \*ତେବେ ତମେ କାଇକେ ଅବ୍‌କା ସାଗ୍‌ଡାଲ୍ କାଇବା ବାଇମନ୍‌କେ ବିଚାର୍ କଲାସ୍‌ନି ? ଆରି ଜନ୍‌ଲକ୍‌ମନ୍ ସବୁ ରକାମ୍ କାଦି କାଇଲାସ୍‌ନି, ଅବ୍‌କା ସାଗ୍‌ଡାଲ୍ କାଇବା ଲକ୍‌ମନ୍‌କେ କାଇକେ ଗିନ୍ କଲାସ୍‌ନି ? କାଇକେବଇଲେ ଆମେ ସବୁଲକ୍ ପରମେସରର୍ ମୁଆଟେ ଚିଆ ଅଇଲେ, ସେ ଆମ୍‌କେ ବିଚାର୍ କର୍‌ସି । <sup>୧୧</sup> କାଇକେବଇଲେ ସାସ୍‌ତରେ ଲେକାଆତେ, “ମାପୁରୁ କଇଲାନି, ମୁଇ ଜିବନ୍ ରଇବା ପରମେସର୍, ତେବର୍‌ପାଇ ସବୁ ମୁନ୍‌ସକାତି ମର୍ ମୁଆଟେ ମାଣ୍ଡିକୁଟା ଦେବାଇ ।

ମୁଇ ପରମେସର୍ ବଲି ସବୁ ଲକ୍ ନାମ୍‌ବାଇ ।”

<sup>୧୨</sup> ସେବେଲେ ଆମେ ସବୁ ଲକ୍ ପରମେସରର୍ ଲଗେ ଚିଆଅଇ ଆମେ କରୁରଇବା କାମର୍ ଇସାବ୍ ଦେବାକେ ପଡ୍‌ସି ।

### ବାଇକେ ନସ୍‌ଟ ଅଇବାକେ ନ ଦିଆସ୍

<sup>୧୩</sup> ସେଟାର୍ ପାଇ ତମର୍ ବିତ୍‌ରେ ଗଟେକ୍ ଲକ୍ ଆରି ଗଟେକ୍ ଲକ୍‌କେ ବିଚାର୍ କରାନାଇ । ତାର୍ ବାଦୁଲେ ଆମର୍ ବାଇମନ୍‌ର୍ ତଲାଟଲ୍‌ତିତେଇ ବିନ୍ ଲକ୍‌କେ ପାପ୍ କରାଇବା କାଇମିସା ବିସଇ ଆଟେ କି ନାଇ, ସେଟା ଆମେ ନିଜେ ଦେକ୍‌ବାର୍ ଆଟେ । <sup>୧୪</sup> ଜିସୁ ମାପୁରୁର୍ ସଙ୍ଗ୍ ମିସ୍‌ଲାର୍‌ପାଇ ପରମେସର୍ ଦେକ୍‌ବା ଇସାବେ କାଇ କାଦି ମିସା ନିର୍‌ବାଟା ନାଇ ବଲି ମୁଇ ଜାନି । ମାତର୍ କାଇମିସା ଗଟେକ୍ କାଦି ପରମେସର୍ ନିର୍‌ଲା ଆଟେ ବଲି ଗଟେକ୍ ଲକ୍

ବିସ୍ୱାସ କଲେ, ସେଟା ସେ ନ କାଇଲେ ତାର୍ପାଇ ନିକ । ୧୫ ତମେ କାଇ କାଦି ମିସା କାଇଲାରପାଇବଲି ଜିଦି ତମର ଗଟେକ୍ ବାଇକେ ଦୁକ୍ କରାଇସା, ସେନ୍ତାର୍ଥାଲେ ତାର୍ପାଇ ତମର କାଇ ଆଲାଦ୍ ନାଇ ପାରା ଆଟେ । ତମର କାଇବା କାଦିରଲଗି ଆରିଗଟେକ୍ ଲକ୍ ମନ୍ କଲାନି । ସେଟା ନିକ ନର୍ସ । କାଇକେବଲେ ସେ ମିସା ତମର ସଙ୍ଗର୍ ବିସ୍ୱାସି । ଆରି ତାର୍ ଜାଗାଇମିସା କିରିସ୍ତ ମଲାଆଟେ । ୧୬ ଜିଦି ଆରି କନ୍ ରକାମ୍ ଚଲାଚଲ୍ତି ପର୍ମେସରର୍ ମନ୍କେ ଜାଏ ନାଇ ବଲି କେତେଟା ବିସ୍ୱାସି ବାବ୍ବାଇ, ମାତର୍ ସେଟା ବଲ୍ ବଲି ତମେ ବାବ୍ସା ବଲଲେ ସେଟା କରା ନାଇ । ସେନ୍ତାର୍ଥାଲେ ସେଟା ନିକ ନର୍ସ ବଲି କେ ବାବିନାପାରତ୍ । ୧୭ ପର୍ମେସରର୍ ରାଇଜର୍ ସାସନ୍ ଅବ୍କା ନ କାଇବା କାଦିପିଦିର୍ ନିଅମର୍ପାଇ ନାଇ । ମାତର୍ ତାର୍ ମୁଆଟେ ଦରମ୍ ବଲାଅଇବାଟା, ବିନ୍ ଲକ୍ମନର୍ ସଙ୍ଗ୍ ମିସି ସୁକ୍ସାନ୍ତିସଙ୍ଗ୍ ରଇବାଟା, ଆରି ସୁକ୍ଲଆଡ୍ମା ଦେଇରଇବା ସାର୍ଦା ବିସଇ ଆଟେ । ୧୮ ଆମେ କିରିସ୍ତକେ ଏ ରକାମ୍ ନାମ୍ଲେ, ପର୍ମେସର୍କେ ସାର୍ଦା କରାଇବୁ ଆରି ବିନ୍ ଲକ୍ମନ୍କେ ନାମାଇବୁ ।

୧୯ ସେଟାର୍ ପାଇ ଆସା, ଆମେ ଏନ୍ତାରି ଚଲାଚଲ୍ତି କରୁ, ଜେନ୍ତାରିକି ଆମର୍ ଆମର୍ ବିଡ୍ରେ ସୁକ୍ ସାନ୍ତିସଙ୍ଗ୍ ରଇଅଇସି । ଆରି ଆମର୍ ବିସ୍ୱାସ୍ ତାଟ୍ ରଇସି । ୨୦ ଜନ୍ କାଦି କାଇବାକେ ବିନ୍ ଲକ୍ମନ୍ ମନ୍ନାଇ, ସେ କାଦି କାଇକରି, ପର୍ମେସରର୍ କାମ୍ ନସାଆ ନାଇ । ଜନ୍ ରକାମ୍ କାଦିମିସା କାଇଅଇସି । ମାତର୍ ତମେ କାଇଲାରପାଇ ବିନ୍ ଲକ୍ମନ୍କେ ପାପ୍ବାଟେ ଡାକିନେଲେ, ସେଟା ବୁଲ୍ । ୨୧ ବିନ୍ ଲକ୍ମନ୍ ନିଡ୍ବା କାଦି ଆମେ କାଇବାର୍ ନାଇ । କି ମଦ୍ କାଇବାର୍ ନାଇ । ଆମର୍ ବିଡ୍ରେ ରଇବା ଗଟେକ୍ ବାଇ କି ବଇନିକେ ପାପ୍ବାଟେ ଜିବା ବିସଇ ନ କରୁ । ୨୨ ଏ ବିସଇନେଇ ତମେ କାଇଟା ବିସ୍ୱାସ୍ କଲାସିନି ସେଟା ପର୍ମେସରର୍ ଆରି ତମର୍ ବିଡ୍ରେ ରଅ । ଜନ୍ ଲକ୍ମନ୍ ନିଜର୍ ଚଲାଚଲ୍ତିର୍ପାଇ ନିଜର୍ ବିବେକ୍ ସେମନ୍କେ ଦସ୍ ନ ଦାରେ, ସେ କେଡେକ୍ କରମର୍ ଲକ୍ । ୨୩ ଜିଦି ଗଟେକ୍ ଲକ୍ ତାର୍ କାଇବାଟା ଟିକ୍ କି ନାଇ ବଲି ବାବ୍ଲାନି, ଆରି ମନ୍କେ ନ ଲାଗ୍ବା କାଦି କାଇସି, ସେନ୍ତାର୍ଥାଲେ ସେ, ପର୍ମେସରର୍ ବିରୁଦେ ପାପ୍କଲାନି । କାଇକେବଲେ ସେ

ନିଜର ବିବେକକେ ମାନେନାଇ । ଜନ୍ମଟା ନିକ ନଏଁ ବଲି ଆମେ  
ବିସ୍‌ବାସ୍ କଲୁନି, ଆରି ସେଟାସେ କରିଆଇଲୁନି, ସେନ୍ତାରୁଆଲେ  
ଆମେ ପାପକଲୁନି ।

## ୧୫

### ବିନ୍‌ଲକ୍‌କେ ସାର୍‌ଦା କରାଆ

<sup>୧</sup> ଏବେ ଆମେ, ଜାର ବିସ୍‌ବାସ୍ ଡାଟ୍ ଆଚେ, ଜନ୍‌ ଲକ୍‌ମନ୍  
ବିସ୍‌ବାସେ ଦୁର୍‌ବଲ୍ ଆଚଡ୍ ଆରି ଅସୁବିଦାଲ ଆଚଡ୍, ସେମନ୍‌କେ  
ଆମେ ସାଇଜ କର୍‌ବାର୍ ଆଚେ । ଆରି ନିଜେ ସାର୍‌ଦା ରଇବା  
ବିସଇ ଚିନ୍ତା କର୍‌ବାର୍ ନାଇ । <sup>୨</sup> ମାତର୍ ଆମର୍ ବାଇବଇନିମନ୍‌କେ  
ସାର୍‌ଦା କରାଇବାକେ ଆରି ସେମନ୍‌ର ବିସ୍‌ବାସ୍ ଡାଟ୍ କର୍‌ବାକେ  
ଡାକର୍ ପାଇ ନିକ ବିସଇ କର୍‌ବାର୍ ଆଚେ । <sup>୩</sup> କାଇକେବଇଲେ  
କିରିସ୍‌ଟ ନିଜ୍‌କେ ସାର୍‌ଦା କରାଏ ନାଇ । ମାତର୍ ସାସ୍‌ତରେ  
ଏନ୍ତାରି ଲେକାଅଇଲାଆଚେ, ଜନ୍‌ ଲକ୍‌ମନ୍‌ର୍ କାରାପ୍ କାତା ତମ୍‌କେ  
ନିନ୍ଦାକଲା, ସେଟା ମକେମିସା ନିନ୍ଦା କଲାଇ । <sup>୪</sup> କାଇକେବଇଲେ  
ସାସ୍‌ତରେ ଜେଡ୍‌କି ଲେକା ଅଇଲାଆଚେ, ସେ ସବୁ ଆମ୍‌କେ  
ସିକାଇବାକେ । ଜେନ୍ତାରିକି, ସାସ୍‌ତରେଅନି ଜନ୍‌ ମୁର୍‌ଚି ରଇବାଟା  
ଆରି ସାର୍‌ଦା କରାଇବାଟା ଆମେ ମିଲାଇଆରୁ, ତେଇଅନି ଆମର୍  
ଆସା ବଡ୍‌ସି । <sup>୫</sup> ପର୍‌ମେସର୍‌ସେ ଆମ୍‌କେ ମୁର୍‌ଚିରଇବାଟା ଆରି  
ସାର୍‌ଦା କରାଇବାଟା ଦେଇସି । ଆରି ଜିସୁକିରିସ୍‌ଟର୍ ବାଟେ ଇଣ୍ଡି  
କରି ସବୁର୍ ମନ୍ ଗଟେକ୍ ଅଇବାକେ ସାଇଜ କର । <sup>୬</sup> ଜଦି  
ସେଟା ଅଇଲେ ଆମର୍ ମାପ୍‌ରୁ ଜିସୁକିରିସ୍‌ଟର୍ ବାବା ଆରି ଆମର୍  
ପର୍‌ମେସର୍‌କେ ଡାକ୍‌ପୁଟା କର୍‌ବାଡେଇ ତମେ ସବୁ ଗଟେକ୍ ଅଇସା  
।

### ଜିଉଦି ଆରି ଜିଉଦିନଇଲା ଲକ୍‌ମନ୍‌ର୍ ପାଇ ସୁବ କବର୍

<sup>୭</sup> କିରିସ୍‌ଟ ଜେନ୍ତୁ ତମ୍‌କେ ଡାକ୍‌ଲା ଆଚେ, ତମେ ମିସା ସେନ୍ତି  
ତମର୍ ସଙ୍ଗର୍ ବିସ୍‌ବାସିମନ୍‌କେ ଡାକିନିଆ । ତମେ ଜଦି ଏନ୍ତି କଲେ  
ପର୍‌ମେସର୍ ଡାକ୍‌ପୁଟା ପାଇସି । <sup>୮</sup> କିରିସ୍‌ଟ ଜିଉଦିମନ୍‌ରଲଗେ  
ଗଟେକ୍ ଗତିଦାଙ୍ଗ୍‌ତାପାରା ଅଇଲା । ପର୍‌ମେସର୍ ଡାକର୍  
ଆନିଦାଦିମନ୍‌କେ ଜନ୍‌ କାତା ଦେଇରଇଲା, ସେଟା ସଡ୍‌ସଙ୍ଗ୍ ସେ  
ପୁରାପୁରୁନ୍ କର୍‌ସିଆକା ବଲି ଦେକାଇବାକେ ସେନ୍ତାରି କିରିରଇଲା

। ୯ ଜିଉଦି ନ ଅଇଲା ଲକ୍ମନକେ ପରମେସର ତାର ଦୟା ଦେକାଇସି, ଆରି ସେମନ୍ ତାକେ ଡାକ୍ପୁଟା କରବାଇ । ଜେନ୍ତାରି କି ସେମନ୍ ତାକେ ଡାକ୍ପୁଟା କରବାଇ । ଏ ବିସଇ ସାସ୍ତରେ ଲେକା ଆଚେ ।

ମୁଇ ଜିଉଦିନଇଲା ଲକ୍ମନର ବିତ୍ତରେ ତମକେ ଡାକ୍ପୁଟା କରବି,  
ସବୁବେଲା ତମର ଡାକ୍ପୁଟାର ଗିତ୍ ଗାଇବି ।

୧୦ ଆରି ଏନ୍ତାରିମିସା ଲେକାଆଚେ,

“ତମେ ଜିଉଦିନଇଲା ଲକ୍ମନ ଏ ସାରଦାଇ ମିସା  
କାଇକେବଇଲେ ଏବେ ତମେ ଜିଉଦିମନରପାରା ।  
ତମେ ପରମେସରର ବାଟିରଇବା ଜିଉଦିମନରପାରା ।”

୧୧ ଆରିତରେକ୍ ସେ କଇଲାଆଚେ

“ଜେଡ୍‌କି ଜିଉଦି ନ ଅଇଲା ଲକ୍ମନ ପରମେସରକେ ତୁସ୍ତକରା !”  
ଆରି ଗୁଲାଇ ମୁନୁସ୍ ଜାତି ତାକେ ଡାକ୍ପୁଟା କରା ।

୧୨ ଆରି ଜିସାଇଅ କଇଆଚେ,

“ଜେସିର କୁଟୁମେଅନି ଗଟେକ୍ ଲକ୍ ବାରଇସି,  
ସେ ଜିଉଦି ନଇଲା ଲକ୍ମନକେ ସାସନ୍ କରସି  
ଆରି ସେମନ୍ ତାକେ ବିସ୍‌ବାସ୍ କରବାଇ ।”

୧୩ ପରମେସର ଜେକି ସବୁ ଆସାର୍ ମୁଲ୍‌ଡେଲି । ତମର  
ବିସ୍‌ବାସ୍‌ର ଲାଗି ସେ ତମକେ ସବୁ ସାନ୍ତି ସାରଦା ଦେଅ । ସୁକଲ୍  
ଆଡ଼ମାର୍ ବପୁ ସଙ୍ଗ୍ ତମର ଆସା ଅଦିକ୍ ଅଇଜାଅ ।

ଜିଉଦିନଇଲା ଲକ୍ମନର ଟାନେ ପାଉଲର୍ ସେବାକାମ୍

୧୪ ଏ ବାଇବଇନିମନ୍ ତମର ବିସ୍‌ବାସ୍ ନିକଆଚେ, ବଲି  
ମୁଇ ଜାନିଆତି । ଆରି ପରମେସରର ବାକିଅ ତମେ ନିକସଙ୍ଗ୍  
ବୁଜଲାସନି ଆରି ଏବେ ତମେ ବିନ୍ ଲକ୍ମନକେ ମିସା  
ସିକାଇପାରସା । ୧୫ ମାତର୍ ଏ ଚିଟିତେଇ ତମକେ କେତେଟା  
ବିସଇନେଇ ଜାଗରତ୍ କରାଇବାକେ ମୁଇ ବପୁ ଅଇଲି ଆତି  
। କାଇକେବଇଲେ ପରମେସର୍ ମକେ ଅଦିକାର୍ ଦେଲାକେ  
ମୁଇ ତାଟ୍‌ସଙ୍ଗ୍ ଏଟା ତମକେ କଇଲିନି । ୧୬ କିରିସ୍‌ଟ ଜିସୁର୍  
ଦାଙ୍ଗ୍‌ଡା ଇସାବେ ଜିଉଦି ନଇଲା ଲକ୍ମନର ପାଇ କାମ୍  
କରବାକେ ପରମେସର ମକେ ବାଡ଼ଲାଆଚେ । ପରମେସରର  
ସୁବ୍‌କବର୍ ଜାନାଇବା ପାଇ ମୁଇ ଗଟେକ୍ ଦରମ୍ ଗୁରୁ ଇସାବେ

କାମ୍‌କଲିନି । ଜେନ୍ତାରିକି ଜିଉଦିନଇଲା ଲକ୍‌ମନ୍ ଗଟେକ୍ ସୁକଲ୍ ବଲି ଇସାବେ ପରମେସରକେ ସର୍ପିଦେବାଇ । ଏ କାମ୍ ସୁକଲ୍‌ଆଡ଼ମା ପୁରାପୁରୁନ୍ କରସି । ୧୭ କିରିସଟ ଜିସୁରତେଇ ମକେ ମିସାଇଲାର୍‌ପାଇ, ତାର୍ ଏ ସେବା କାମ୍ କରବାକେ ମୁଇ ମୁଲ୍‌କେ ଲାଜ୍ ଅଇନାଇ । ୧୮ ଜିଉଦି ନ ଅଇଲା ଲକ୍‌ମନ୍‌କେ ପରମେସର ଆଦେସ୍ ମାନବାକେ କିରିସଟ ମକେ ଦେଇକରି ଜନଟା ସାଦନ୍ କଲାଆଟେ, ଅବ୍‌କା ସେଟାସେ ମୁଇ ଡାଟ୍ ସଙ୍ଗ୍ କଇବି । କାଇଟା କଇବାର୍‌ଆଟେ, ଆରି କାଇଟା କରବାର୍‌ଆଟେ, ସେମକେ ଜାନାଇଲାକେ ଏଟା ଅଇଲା । ୧୯ ଚିନର୍ ଲାଗି, କାବାଅଇଜିବା କାମ୍‌ରଲାଗି ଆରି ସୁକଲ୍‌ଆଡ଼ମାର୍ ବପୁରଲାଗି ଏଟା ସବୁ କଲାଆଟେ । ସେଟାର୍ ପାଇ ମୁଇ ଜିରୁସାଲମେଅନି ଇଲିରିକମ୍‌କେ ଗାଲାବେଲେ ବାଟେ କିରିସଟର ସୁବ୍‌କବର୍ ପୁରାପୁରୁନ୍ ଜାନାଇଲି ଆଟି । ୨୦ ଜନ୍ ଜାଗାମନ୍‌କେ ଲକ୍‌ମନ୍ କିରିସଟର୍ ବିସଇ ସୁନଡ଼ନାଇ, ସିତି ତାର୍ କବର୍ ଜାନାଇବାର୍ ମର୍ ଆଦେସ୍ ରଇଲା । କାଇକେବଇଲେ ଜନ୍‌ଲକ୍‌ମନ୍‌କେ ସୁବ୍‌କବର୍ ବିନ୍‌ଲକ୍‌ମନ୍ ଜାନାଇ ସାରାଇଆଟଡ଼, ତେଇ ମୁଇ ଆରିତରେକ୍ କଇବାକେ ମନ୍ କରନାଇ । ୨୧ ଜେନ୍ତିକି ସାସ୍‌ତରେ ଲେକା ଆଟେ, “ଜନ୍‌ଲକ୍‌ମନ୍ ତାର୍ ନାଉଁ ଏବ୍‌କେଜାକ ସୁନଡ଼ନାଇ, ଏବେ ସେ କେ ବଲି ଜାନବାଇ ।

ଜନ୍‌ଲକ୍‌ମନ୍‌କେ ଏବେଜାକ ତାର୍ ବିସଇ ଜାନାଅଡ଼ନାଇ, ସେମନ୍ ବୁଜିବାଇ ।”

**ରମ୍‌ଦେସେ ଜିବାକେ ପାଉଲର୍ ଜଜ୍‌ନା**

୨୨ \*ମୁଇ ବେସିତର୍ ତମ୍‌କେ ଦେକିଆଇବାଟା ପିଟିଗାଲା ଆଟେ । ୨୩ ମାତର୍ ଏ ଜାଗା ଲଗେ ମର୍ କାମ୍ ସାରିଗାଲା ଆଟେ । ଆରି ତମ୍‌କେ ଦେକ୍‌ବାକେ ମର୍ ବେସି ବରସର୍ ଆସା ଏବେ ପୁରାପୁରୁନ୍ ଅଇସି । ୨୪ ସାରାସାରି ଏବେ ମୁଇ ତମ୍‌କେ ଦେକ୍‌ବାକେ ଆସିଅଇସି । ଏସ୍‌ପେନ୍ ଦେସେ ଜିବା ବାଟେ ତମ୍‌କେ ଦେକିଆଇବି ବଲି ବାବ୍‌ଲିଆଟି । ତମ୍‌ରଟାନେ ସାର୍‌ଦାସଙ୍ଗ୍ କେତେ ବେଲା ବିତାଇଲା ପଟେ ତମ୍‌ର୍ ସାଇଜେ ଏସ୍‌ପେନ୍ ଦେସେ ଉଟିଜିବି ।

☆ ୧୫:୨୨ ୧୫:୨୨ ରମିୟ ୧:୧୩

୨୫ ☆ ଏବେ ମୁଁ ପରତୁମ୍ ଜିରୁସାଲମେ ଗାଲିନି ।  
 କାଲକେବଇଲେ ତେଇର୍ ବିସ୍‌ବାସିମନ୍‌କେ ସେବାକାମେ ସାଇଜ  
 କର୍‌ବା କେତେକ୍ ଡାବୁ ନେଇଦେବାକେ ମକେ କଇଲାଇ ଆତଡ୍ ।  
 ୨୬ ମାକିଡନିଆ ଆରି ଗିରିସର୍ ଆକାୟାତେଇ ରଇବା ବିସ୍‌ବାସିମନ୍  
 ଜିରୁସାଲମେ ରଇବା ଅରକିଡ୍ ବିସ୍‌ବାସିମନ୍‌ପାଇ ଏ ସାଇଜ  
 ପାଟାଇବାଟା ନିକ ରଇସି ବଲି ବାବ୍‌ଲାଇ । ୨୭ ☆ ସେମନ୍  
 ବେସି ସାର୍‌ଦାଅଇ ଏ ସାଇଜ ଦେଲାଇନି । ଏଟା ଦେଇକରି  
 ସେମନ୍ ଟିକ୍ ବିସଇ କଲାଇ । କାଲକେବଇଲେ, ଜିରୁସାଲମେ  
 ରଇବା ବିସ୍‌ବାସିମନ୍‌ ଟାନେ ସେମନ୍ ରୁନି ଅଇଆତଡ୍ । ସେଟା  
 କେନ୍‌ଡିବଇଲେ ଜିଉଦିମନ୍‌ଟାନେଅନିସେ ପରମେସର୍  
 ବାକିଅ ଇଡିର୍ ଜିଉଦି ନ ଅଇଲା ଲକ୍‌ମନ୍‌କେ ଆନିରଇଲା ।  
 ସେଟାର୍‌ପାଇ ତେଇର୍ ଅରକିଡ୍ ଜିଉଦିମନ୍‌କେ କେତେକ୍ ଡାବୁ  
 ସାଇଜ ପାଟାଇବାଟା ନିକ ବିସଇ । ୨୮ ଆରି ମର୍ ଏ କାମ୍ ସାରାଇକରି  
 ସେମନ୍‌ର ସାଇଜର୍‌ପାଇ ଆନିରଇବା ଡାବୁ ସର୍‌ପିଦେଲା ପଟେ,  
 ମୁଁ ଇସ୍‌ପେନ୍‌ଦେସେ ଜିବାକେ ବାରଇବି । ଆରି ବାଟେ ତେବିକରି  
 ତମ୍‌କେ ଦେକ୍‌ବି । ୨୯ ମୁଁ ଜାନିଆଟି, ତମ୍‌ଟାନେ କେଟ୍‌ଲାବେଲେ  
 କିରିସଟର୍ ପୁରାପୁରୁନ୍ ଆସିର୍‌ବାଦନେଇ ମୁଁ ଅଇବି ।

୩୦ ଏ ମର୍ ଆଲାଦର୍ ବାଇବଇନିମନ୍ ! ଆମର୍ ମାପୁରୁ ଜିସୁ  
 କିରିସଟର୍ ନାଉଁ ଦାରି ଆରି ସୁକଲ୍‌ଆତ୍‌ମା ଦେଲା ଆଲାଦର୍ ପାଇ  
 ମୁଁ ତମ୍‌କେ ଗୁଆରି କଲିନି, ମର୍ ପାଇ ମନ୍‌ଦେଇ ପାର୍‌ତନା  
 କର୍‌ତେରୁଆ । ୩୧ ଜିଉଦା ଦେସେ ରଇବା ବିସ୍‌ବାସି ନ କଲା  
 ଲକ୍‌ମନ୍‌ ଟାନେଅନି ମକେ କାଇଟା ନ ଅଅ ବଲି ପାର୍‌ତନା କରା  
 । ଜିରୁସାଲମର୍ ବିସ୍‌ବାସିମନ୍‌କେ ଜନ୍ ସାଇଜ ମୁଁ ନେଇଦେଲିନି,  
 ସେଡ୍‌କିରେ ସେମନ୍ ସାର୍‌ଦାସଙ୍ଗ୍ ରଅଡ୍, ବଲି ସେଟାର୍‌ପାଇ ମିସା  
 ପାର୍‌ତନା କରା । ୩୨ ସେଟା ସାର୍‌ଲାପଟେ ପରମେସର୍ ମନ୍ କଲେ  
 ମୁଁ ତମ୍‌ ଲଗେ ଆଇବି । ଆରି ତମ୍ ସଙ୍ଗ୍ ସାର୍‌ଦାସଙ୍ଗ୍  
 କେତେଦିନ୍ ରଇକରି ମର୍ ମନେ ସାନ୍ତି ପାଇବି । ୩୩ ସାନ୍ତିଦେବା  
 ପରମେସର୍ ତମ୍‌ ସବୁ ଲକ୍‌ର ସଙ୍ଗ୍ ରଅ । ଆମେନ୍ ।

☆ ୧୫:୨୫ ୧୫:୨୫ ୧ମ କରନ୍ତିୟ ୧୭:୧-୪ ☆ ୧୫:୨୭ ୧୫:୨୭ ୧ମ କରନ୍ତିୟ ୯:୧୧

# ୧୭

## ଦୁଆର

<sup>୧</sup> ଏ ଚିଟିତେଇ ପିବି, ଜେ କି କିରିସ୍ତର ଲାଗି ଆମର ବଇନି ଅଇଲାଆତେ, ତାର ବିସଇ ଜାନାଇଲିନି । ସେ କେକ୍ ଜାଗାଇ ରଇବା ମଣ୍ଡୁଲିଟାନେ ଏବେ ସେବାକାମ୍ କଲାନି । ତାକେ ମୁଇ ତମରଲଗେ ପାଟାଇଲିନି । <sup>୨</sup> ଆମର ମାପୁରୁର ନାଉଁ ଦାରି ତାକେ ଡାକିନିଆ । କାଇକେବଇଲେ ଏଡ୍ରାରି ଚଲାଟଲିତି ବିସ୍ବାସିମନରପାଇ ନିକ । ତାକେ କାଇଆଲେ ଲୁଡ଼ା ରଇଲେ ସାଇଜ କରା । କାଇକେବଇଲେ ସେ ମକେ ଆରି ବେସି ବିସ୍ବାସିମନକେ ସାଇଜ କଲାଆତେ ।

<sup>୩</sup> ✧ କିରିସ୍ତର ମର ସଙ୍ଗ୍ କାମ୍‌କରୁମନ୍ ପିରିସକିଲା ଆରି ଆକିଲାକେ ମର ଦୁଆର ଜାନାଆ । <sup>୪</sup> ସେମନ୍ ମକେ ସାଇଜ କଲାପାଇ ନିଜର ଜିବନ୍ ବିପଦେ ପାକାଇ ଆତଡ଼ । ଏଟାରପାଇ ମୁଇ ସେମନ୍‌କେ ବେସି ଦୁଆର କଲିନି । ଅବକା ମୁଇସେ ନାଇ, ଇତି ରଇବା ସବୁ ଜିଉଦି ନଇଲା ମଣ୍ଡୁଲିମନ୍ ମିସା ସେମନ୍‌କେ ଦୁଆର ଜାନାଇଲାଇନି । <sup>୫</sup> ସେମନ୍‌ର ଗରେ ପାର୍ତନାକେ ରୁଣ୍ଡିବା ମଣ୍ଡୁଲିକେ ମିସା ମର ଦୁଆର ଜାନାଇଲିନି ।

ମର ଆଲାଦର ମଇତର ଏପାଇନେତନ୍‌କେ ମର ଦୁଆର ଜାନାଇଲିନି । ଆସିଆ ରାଇଜେ ସେ ସିଗ୍ ପର୍ତୁମ୍ କିରିସ୍ତ ବିସ୍ବାସି ଅଇରଇଲା । <sup>୬</sup> ତମର ନିକ ପାଇ ବେସି କସ୍ତ ପଡିରଇବା ମରିୟମକେ ମର ଦୁଆର ଜାନାଇ ଦିଆସ୍ । <sup>୭</sup> ଆନ୍‌ରନିକ୍ ଆରି ଯୁନିୟାକେ ମର ଦୁଆର ଜାନାଇଲିନି । ଏ ଦୁଇଟା ମର ସଙ୍ଗ୍‌ର ଜିଉଦିଲକ୍ । ସେମନ୍ ମର ସଙ୍ଗ୍ ବନ୍ଦିସାଲେ ରଇଲାଇ । ମର ଆଗତୁ ସେମନ୍ କିରିସ୍ତକେ ବିସ୍ବାସ୍ କଲାଇ । ଆରି ସବୁ ପେରିଡ଼ ସିସମନ୍ ସେମନ୍‌କେ ସନ୍‌ମାନ୍ ଦେବାଇ ।

<sup>୮</sup> ମାପୁରୁରଲଗେ ମର ଆଲାଦର ମଇତର ଆମ୍‌ପଲିଆକେ ଦୁଆର ଜାନାଇଦିଆସ୍ । <sup>୯</sup> କିରିସ୍ତର ସେବାଇ ମର ସଙ୍ଗାରି ଉରବାନ ଆରି ମର ଆଲାଦର ମଇତର ଡାକିୟକେ ମିସା ମର ଦୁଆର ଜାନାଇଦିଆସ୍ । <sup>୧୦</sup> କିରିସ୍ତକେ ବିସ୍ବାସକରି ସେବାକର୍ବା ଆପଲ ଆରି ଆରିସ୍ତବଲର୍ କୁରୁମର ସବୁକେ

---

✧ ୧୭:୩ ୧୭:୩ ପେରିଡ଼ ୧୮:୨



ମର ଜୁଆର୍ ଜାନାଇଦିଆସ୍ । ୧୧ ମର ସଙ୍ଗର୍ ଜିଉଦି ଏରଦିୟନ୍ ଆରି ନାରସିସର୍ ଗରେ ରୁଣ୍ଡବା ବିସ୍ବାସି ବାଇବଇନିମନ୍କେ ମର୍ ଜୁଆର୍ ଜାନାଇଦିଆସ୍ ।

୧୨ ମାପ୍‌ରୁର୍ ସେବାଇ ଲାଗିରଇଲା ତିରିପନ୍ ଆରି ତିରିପସା ଆରି ମାପ୍‌ରୁର୍ ପାଇ ବେସି କସ୍‌ଟ ପଡିରଇବା ଆଲାଦର୍ ପର୍ସିସକେ ମର୍ ଜୁଆର୍ ଜାନାଇଦିଆସ୍ । ୧୩ ✪ ମାପ୍‌ରୁର୍ ମୁକିଅ ଦାଙ୍ଗ୍‌ତା ରୁପସ୍ ଜେ କି ସେବା କାମ୍‌ଟାନେ ଆବଡ୍ ଅଇ କଲାଆଚେ । ଆରି ମର୍ ଆୟାପାରା ତାକର୍ ଆୟାକେ ମିସା ମର୍ ଜୁଆର୍ । ସେ ମକେ ନିଜର୍ ପଅ ପାରା ଦେକ୍‌ଲା । ୧୪ ଆସୁକିରି, ପେଲେଗନ୍, ଅର୍ମିସ୍, ପାଡ୍‌ରବା, ଅର୍ମାସ୍ ଆରି ସେମନ୍‌ର ସଙ୍ଗ୍ ରଇବା ସବୁ ବିସ୍ବାସି ବାଇବଇନିମନ୍କେ ଜୁଆର୍ ଜାନାଆ । ୧୫ ପିଲଲଗ୍ ଆରି ଜୁଲିଆ, ନିରୁସ୍ ଆରି ତାର୍ ବଇନି ଆରି ଅଲୁମ୍‌ପା ଆରି ସେମନ୍‌ର ସଙ୍ଗ୍ ରଇତେରଇବା ସବୁ ପର୍‌ମେସରର୍ ଲକ୍‌ମନ୍‌କେ ମର୍ ଜୁଆର୍ ଜାନାଆ ।

୧୬ ତମର୍ ବିଡ୍‌ରର୍ ଆଲାଦ୍ ଦେକାଇକରି ଗଟେକ୍ ଲକ୍ ଆରି ଗଟେକ୍ ଲକ୍‌କେ ଜୁଆରବେଟ୍ ଉଆ । କିରିସ୍‌ଟର୍ ସବୁ ମଣ୍ଡଲି ତମ୍‌କେ ଜୁଆର୍ ଜାନାଇଲାନି ।

### ପାଉଲର୍ ସାରାସାରି ଆଦେସ୍

୧୭ ଏ ମର୍ ବାଇବଇନିମନ୍, ମୁଇ ତମ୍‌କେ ବାବୁଜିଆ କଲିନି, ତମେ ଜାଗ୍‌ରଡ୍ ଅଇକରି ରୁଆ । ତମର୍ ବିସ୍ବାସ୍ ଆରି ଗଟେକ୍ ମନ୍ ଅଇରଇବାଟା ଜନ୍ ଲକ୍‌ମନ୍ ବେଗଲାଇବାକେ ଚେସ୍‌ଟା କଲାଇନି, ତାକର୍‌ଟାନେଅନି ଦୁରିକେ ରୁଆ । କାଇକେବଇଲେ, ତମେ ଜନ୍ ସିକିଆ ପାଇଆଚାସ୍, ତାର୍ ବିରଦ୍ କଲାଇନି । ୧୮ ଜନ୍ ଲକ୍‌ମନ୍ ଏନ୍ତାରି କାମେ ବୁଡି ଆଚଡ୍, ସେମନ୍ ଆମର୍ ମାପ୍‌ରୁ କିରିସ୍‌ଟର୍ ଆଦେସ୍ ମାନଡ୍ ନାଇ । ସେମନ୍ କାଲି ନିଜର୍ ମନ୍ କର୍‌ବାଟା ପୁରାପୁରନ୍ କର୍‌ବାକେ ତେରେପେତେ ଅଇଲାଇନି । ସୁଆଦ୍ କାତା ଆରି ତିପୁଲ୍ କାତା କଇ ଦରମ୍ ଲକ୍‌ମନ୍‌କେ ବୁଲ୍‌କାଇଦେଲାଇନି । ୧୯ ତମେ ପର୍‌ମେସରର୍ ଆଦେସ୍ ମାନ୍‌ଲାସ୍‌ନି ବଲି ତାର୍ ସୁବ୍‌କବର୍ ରୁଲାଇବାଟର୍ ଲକ୍ ଜାନ୍‌ଲାଇ । ସେଟାର୍ ପାଇ ମୁଇ ବେସି ସାର୍‌ଦା । ମୁଇ ମନ୍ କଲିନି, ତମେ ସଡ୍ ବିସଇତେଇ ଗିଆନି ଉଆ ଆରି କାରାପ୍

✪ ୧୭:୧୩ ୧୭:୧୩ ମାର୍‌କ ୧୫:୨୧

ବିସଇତେଇ ବୁଢ଼ି ରୁଆନାଇ । ୨୦ ଆରି ସାନ୍ତିଦେଉ ପରମେସର୍ ତମର୍ ଲାଗି ସଇତାନକେ ପୁରାପୁରୁନ୍ କୁରୁପ୍ନାସ୍ କର୍ସି ।

ଆମର୍ ମାପୁରୁ ଜିସୁକିରିସ୍ଟର୍ ଜିବନ୍ଦୁକାଇଲାଟା ତମର୍ ସଙ୍ଗ୍ ସବୁବେଲେ ରଅ ।

୨୧ ☆ମର୍ ସଙ୍ଗ୍ ମିସିକରି କାମ୍‌କର୍‌ବା ସଙ୍ଗାରି ତିମତି, ଆରି ଆମର୍ ଜିଉଦି ବାଇମନ୍ ଲୁକିଅ, ଜାସନ୍ ଆରି ସପିପାଡର୍ ତମ୍‌କେ ଜୁଆର୍ ଜାନାଇଲାଲିନି ।

୨୨ ମୁଇ ତର୍‌ତିଅ, ମର୍ ସଙ୍ଗାରି ପାଉଲ୍, କଇଦେଲାକେ ଏ ଚିଟି ଲେକ୍‌ଲିଆଟି । ମାପୁରୁର୍ ନାଉଁ ଦାରି ମୁଇ ତମ୍‌କେ ଜୁଆର୍ ଜାନାଇଲିନି ।

୨୩ ☆ଗାୟ୍‌ସ୍ ତମ୍‌କେ ଜୁଆର୍ ଜାନାଇଲାଲିନି । ମୁଇ ତାର୍ ଗରେ ରଇଲିନି ଆରି ତାର୍ ଗରେ ରୁଣ୍ଡବା ଇତିର୍ ବିସ୍‌ବାସିମନ୍ ତମ୍‌କେ ଜୁଆର୍ ଜାନାଇଲାଲିନି । ଏ ଗତର୍ ତାବୁ ଇସାବ୍‌କିତାବ୍ କରୁ ଏରାସ୍‌ଟ ଆରି ବାଇ କାର୍‌ତ ମିସା ତମ୍‌କେ ଜୁଆର୍ ଜାନାଇଲାଲିନି ।

୨୪ ମାପୁରୁ ଜିସୁକିରିସ୍ଟର୍ ଜିବନ୍ଦୁକାନି ତମର୍ ସବୁ ଲକର୍ ଲଗେ ରଅ ।

**ପାର୍‌ତନା ଆରି ସାର୍‌ଦାସଙ୍ଗ୍ ଏ ଚିଟି ସାର୍‌ଲାଟା**

୨୫ ଆସା, ପରମେସର୍‌କେ ଡାକ୍‌ପୁଟା କରୁ । ମୁଇ ଜାନାଇତେରଇବା ଜିସୁ କିରିସ୍ଟର୍ ବିସଇର୍ ସୁବ୍ କବର୍ ଆରି ଜୁଗ୍ ଜୁଗ୍ ଦାରି ଲୁଚି ରଇବା ଚିକିନିକିର୍ ସଡ୍ ଇସାବେ ରଇବା ତମର୍ ବିସ୍‌ବାସ୍ ପରମେସର୍ ତାବ୍‌କରି ସଙ୍ଗାଇବାକେ ପାରେ ।

୨୬ ସେ ଚିକିନିକିର୍ ସବୁ ସଡ୍ ବବିସଡ୍‌ବକ୍‌ତାମନ୍‌ର୍ ସାସ୍‌ତରେ ସେ ଜାନାଇଲା ଆଟେ । ଆରି ଏବେ ମାପୁରୁ ପରମେସର୍‌ର୍ ସଡ୍ ଜୁଗ୍ ଜୁଗ୍ ଅନି ସବୁ ଲକ୍‌ମନ୍‌ର୍ ବିଡ୍‌ରେ ଜାନାଇଆଟେ । ଇତିଅନି ସବୁ ବିସ୍‌ବାସ୍ କରି ପରମେସର୍‌ର୍ କାତାମାନି ଚାଲି ପାର୍‌ବାଇ ।

୨୭ ମାପୁରୁ ଜିସୁ କିରିସ୍ଟର୍‌ଡେଇଅନି ସବୁ ଜାନବା ଗଟେକ୍‌ସେ ପରମେସର୍ କାଲେ କାଲେ ଜୁଗେ ଜୁଗେ ଡାକ୍‌ପୁଟା ପାଅ । ଆମେନ୍ !

☆ ୧୭:୨୧ ୧୭:୨୧ ପେରିଡ୍ ୧୭:୧ ☆ ୧୭:୨୩ ୧୭:୨୩ ପେରିଡ୍ ୧୯:୨୯; ୧ମ କରନ୍ତିୟ ୧:୧୪; ୨ୟ ତିମତି ୪:୨୦

**ସତ୍ତ୍ୱିୟ ବାବ୍**  
**The New Testament in the Desiya language of India:**  
**ସତ୍ତ୍ୱିୟ ବାବ୍ (Bible)**

copyright © 2020 The Word for the World International

Language: ଦେଶିଆ (Desiya)

Contributor: The Word for the World International

**ସତ୍ତ୍ୱିୟ ବାବ୍**  
**ଦ୍ୱିତୀୟ ନିୟମ, 2020**

The New Testament in Desiya Language

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-08

---

PDF generated using Haiola and XeLaTeX on 21 Feb 2024 from source files dated 9 Apr 2023

cd4d7c1f-dc97-5fb4-a0ba-ab968fde9cde